


BUKOLÈ BWÀ NZAMBI

BWÀ KUSHINTULULA

 Twasàkidila, mwanèètù. [Mwanèètù Carl Williams ùdi wàmba ne: “Ncyà bushùwà ne ndyèsè dyà menemene bwà kwenza ne Mwanèètù Branham ìkalèku ùlwalwalwa misangu yàbúngì mu Phoenix. Ngeela meeji ne yèyè ùdi ùtàmà kulwa mu Phoenix kutàmà myaba mikwàbò kanà yònsò eyi. Ne twètù tudi baswè bwà àtungunukè ànu ne kwikala kulwa, nangànangà pàncidì mèmè muneemu apa, nànsha bìshi. Nzambi àkubènèshèku, Mwanèètù Branham.”—Muf.] Twasàkidila—twasàkidila, Mwanèètù Williams.

Bèetwabu mu dindà emu, balundà bàànyì. Ndi . . . Bwà dîku dyà Shakarian, Mwanèètù wa balùme ne Mwanèètù wa bakàjì Williams ne bààbúngì bààbò kaaba aka mbamanyè bwalu abu. Ngàkacimòna mu cikèènà-kumòna, bidimu bu bìbìdì anyi bisàtù nàнку kumpàlà kwà kubangayè kusaama, ne cyenzèkì.

² Ne cidimu cishààle eci patùvwà kaaba aka, ngeela meeji ne mùvwa mmu ngondo wa kumpàla, ku mpungilu awu, cìvwa ncikondo cìvwà nsaserdòsè awu (Dyèndè nganyi apa? Dîna dyèndè dyàmpù mwoyi mpindyewu.) mwikàla kaaba aka. [Muntu kampàndà ùdi wàmba ne: “Stanley.”—Muf.] Stanley, Mwèpiskòpò Stanley, wa mu èkèleeziyà wa Kàtòlikè. Nudi bavùlùke pààkantwàdilàye Bible, nudi bamanyè’s, ki kungambilayè . . .

Bantu kabùkabù bàvwa cipròfetà bàmba ne: “Mwanàànyì wa bakàjì, udi mwondòpiibwe.”

³ Kàdi pèndè mumanyè ne cikèènà-kumòna aci cìvwa cyambè ne yèyè kàvwa mwà kusàngala to. “Yèyè ùvwa mwà kufwà pankaci pàà díbà ìbìdì ne díbà isàtù wa dindà.” Nudi bavùlùke aci anyi? [Muntu kampàndà ùdi wàmba ne: “Èyowà.”—Muf.] Pa nàнку, díbà ìbìdì anyi isàtù.

⁴ Nènku ncìvwa mwà kwambila Demos to. Kàdi nànsha nàнку ngàkambila mukàjì wa tatwèndè, ànu mu cibambalu amu, dìnsambù mene dyà kaaba aka edi. Mèmè kwamba ne: “Kààkusàngala to.”

Màndàmù Shakarian kwambayè ne: “Èè, bantu bònsò’s nyewù bàmba bipròfetà.”

⁵ Mèmè kwamba ne: “Mu bushùwà bwà bwalu, mèmè ndi mufwànyine kutùpakana, mèmè mwinè, kàdi mèmè kucyamba. Yèyè kààkusàngala to.”

6 Mémè kwambila bààbûngi bàà kùdìbo, kùkaadi bidimu bitwè ku bisàtù ne: “Mvwa mumumòne ùlwangana bwà kwikalayè ne mwoyi, nènku kudyèlayè mu bulààlù. Ne kwelayè byanza muulu ne kwelayè lubilà lukolè kùndì, mùshindù ewu. Kàdi mémè—mémè ncivwakù mufwànyine kufika pàvwàye apu to. Ki pashìishe mémè kumumòna ùfwa. Ki mémè kutàngila, nyawù kùvwa cintu kampànda, kùvwa ntankù, ne mwikàle ùleeja ne tudi bu pankaci pàà dîbà ibìdì ne isàtù jaajaaja nànkawawu.”

7 Ki pa nàнку mwèpiskòpò awu kwambayè ne: “Èè, mémè nèntangilè ànu bwà kumòna mwàkùmbanà bwalu abu.” Pa nàнку, s’mbukùmbàne ànu lapàlapà.

8 Ncyà bushùwà ne mbitùtonde’s. Ndi ndyùmvwa ne èkèleeziyà mmujìmiye muntu munène, mu Mwanèètù wa bakàji Florence Shakarian awu. Kàdi, ùvwa kangimbà kanène, ùvwa mukàji mùle tètè ne Nyumà.

9 Mvwa ne mamwèndè; mamwèndè ùvwa umwe wa ku bantu bàà nzànzànzà bàngààkatwilanganà naabò ku Côte Ouest, pààkondopiibwà mamwèndè. Pàvwà bangàngàbukà. . . Ùvwa mu kómá, ne mutuntùle yéyè yònsò. Ki ngàngàbukà uvwa kaaba aku awu—awu kungambilayè, ne: “Ikàlàku mupùwe ànu menemene paùdì usambila apu. Kwenjikù mutooyi wàbûngi to. Mukàji awu ùdì ùpùnga ne lufù.”

Mémè kwamba ne: “Èyowà’s, mukalenge.”

10 Ki kwambayè, dîbà adi, kutùngunukayè ànu ne kungambila. Nènku, èè, ncyàkapetakù nànsha mpùngà wa kubuulula mukana to, mushindu awu.

11 Pa nàнку, Mwanèètù Demos ngwàkangambila bwà kubànda bwà kuya kamòna maamù awu.

12 Pa nàнку, mémè kubànda ku nzùbu wa kuulu awu aku. Nènku Florence ùvwa mutwè binù panshì apu, mwànà mukèsè wa bakàji mulenga mwinè musangu awu, ne bakàji bakwàbò. Ki mémè kuya e kumusambidila, ne kucyàmba. Kàdi yéyè kavva umanya muntu to. Nènku mémè kumwambila mùvwàye mwà kujuukila kuulu cyàkàbìdì. Ne yéyè wàkajuukila kuulu cyàkàbìdì. Paanyimà pàà ndambù wa bidimu, kufwàye. Nàнку mpindyewu Nzambì ùtu wàndamuna ku masambila ètù.

13 Ne tudi bamanyè nàнку, tudi twitabuuja bònsò ne tudi balwè pànwapa nku diswa dyà Nzambì, ne mu mùshindù wùmwèwùmwè awu ngutùdì tuumuka. Ku umwè ku umwè, muntu ne muntu netùpicilè mu ciibi aci. Nènku ki bwà cinyi tudi kaaba aka mu dindà emu, badìsangìshe mu Bwobùmwè bwà Beena Kilistò bàà Kantu-ku-byanza ebu, mbwà kwakulakù pa maaluu aa, ne kudìlongolola ku òwò, bwalu tudi bamanyè ne àdi ne cyà kwenzeka bulelèlà.

14 Mpindyewu Mwanèètu wa bakàjì Florence mmukàjì mutekète, wa bidimu makùmi ànaayi ne bibìdì, mùdì Mwanèètu Williams ùfùma ku dingambila, ne mutekète bikolè. Kàdì kumpalà kwà bôbò . . .yèyè ùvwa mumanyè ne ùvwa ne diinè disaamà edi, mòna's, ngákamòna cikèènà-kumòna cyèndè aci, ne cingambile ndekeelu wendè. Pashiishe, bivwa mwà kwenzeka ne . . .Nzambì mmumanyè byònsò, ne mwàkamònàye Yesù mu cibambalu amu kumpalà kwà kufwàye. Katwèna ànu baswè bwà kumusambidila to, bwalu aci tukaàdi bacyènzè bikolè. Tudi baswè ànu kusàkidila Nzambì bwà nsòmbelu uvwakù munkacì mwètù, utu mushiye bwenzeji bwàbùngì pa twètù bònsò awu, mùdì wa Mwanèètu wa bakàjì Shakarian.

15 Kàdì tudi baswè kusambidila Mwanèètu wa balùme Demos ne Mwanèètu wa bakàjì Rose. Ne nwavùlukaayi ne, bôbò mbapicile mu lutàtù lukolè mu nsòmbelu wabò, mu àdì mashààla aa . . .ntatwèndè, ne mwanààbò wa bakàjì mpindyewu mu . . .bidimu bishààle ebi. [Muntu kampànda ùdi wàkula ne Mwanèètu Branham—Muf.] Kàdì, nènku, èyowà, mishààdile ku . . .mishààdile ku, ngondo dikùmi; ne Mwanèètu wa bakàjì—Mwanèètu wa bakàjì Edna, kàbidì.

16 Pa nàнку, mèmè ndi mumanyè mwà kwabanyanganakù dikenga ne Mwanèètu Demos. Mèmè mvwa ne taatù, ne mwanèètu wa balùme, ne mukàjàànyì, ne mwanàànyì wa mu dibòko, bàakafwà munda mwà matùkù makesè cyanàànà, pa nàнку ndi—ndi mumanyè mùdiye ùdyùmvwa mu dindà emu. Udi umanya ànu paùdì usanganyibwa mu lwòlù lutàtù alu, ki paùdì umanya mwà kwabanyangana dikenga. Nènku . . .

17 [Ndongolwelu wa dibàndisha dyà mèyi a bisanji ùdi wèla nshibà—Muf.] Mèmè mwinè ngwenjì aci awu. Nwàmfwilaayikù luse. Ndi mukatuutè pa kaacintu kakesè kwínshì eku mwaba kampànda, ne cyanza. Pa nàнку ndi—ndi ndòmba luse mùndì mukakàfikishe ku didila ne díyi dipitèpite bukolè, kàdì pàànyì ncìyi ne meeji a kwenza nàнку to.

18 Pa nàнку tùjuukilààyaaku kuulu patùdì . . .panwikalà ne mùshindù, pìikalàbi ne . . .Twìnyikààyi mitù yètù.

19 Taatù wa mu Dyulu, tudi badìsangishe kaaba aka mu dindà emu bwà kuKukuukwila, ne kuKwela twasàkidila ne kuKupà butùmbi, bwà ditùmà dyà Yesù Mupikudi wetù, mu mùshindù wà ne tudikù ne ditèkemenà pààjikà mwoyi ewu, bu mùdìbi ne mbyà kabiyi bishìndikìibwe ne netùsombè pànwapa dìbà dyònsò. Nènku, Taatù, pa kumòna ngiikàdìlù yà dikènguluka yìdì mibidi eyi mwà kubwela, tudi ne disànkà dyà ne katwèna ne cyà kushààla pànwapa dìbà dyònsò to. Wèwè udi musebèle njila wa dipàndukila, upìcila mu cibandabanda cyà lufù.

20 Nènku, Taatù, tudi ne kusàkidila Kùdì mu dindà emu, bwà nsòmbelu wa muntu uvwakù mwimàna pàmwè neetù, kí nkwanji kupita nànsha cidimu to, wimba butùmbi Bwèbè; Mwanèètu wa

bakàjì Florence Shakarian, mutùvwà bamumanyè. Kàdi Wèwè ukàávwa mutwàmbile ntàntà mule kumpàla, bidimu mene ne, cyôci eci cívwa ne cyà kwenzeka, mu mùshindù wà kaciyi cifwànyine kwikala cikùmà cipitèpìte bukòlè bwètù twètù to. Ne tudi bamanyè ne cyùdi Wèwè wamba ncìdi cilelèlà. Ne pashiishe Dīyī Dyèbè didi dyàmba ne: “Muntu udi mulela kùdi mukàjì, mmùle tètè ne matùkù makesè ne mùle tètè ne ntàtu.” Tudi bamanyè kàbìdi ne, aci ncilelèlà, Mukalenge. Tudi bamanyè ne twètù bônso tudi ne cyà kupwekela mu cyôci cibandabanda aci. Pa nàнку tudi tuKwela twasàkidila bwà nsòmbelu wendè uvwa pànu pa buloba awu. Ne biikàle twitabuuja ku diitabuuja ne, patùdi twakulangana apa, mu dindà emu, yèyè wàmányi kuumuka mu nzùbu wa cikupi wa makènga ewu, mubwelè mu mubidi wà butùmbì wùdi kawùyikù mwà kusaama nànsha. Ne mapà èndè a dimba dyà misambu awu, ne dīyī divwàye naadi adi, ne nyumà wendè wa ngàsà mubanjike ne Kilistò awu! Bwà yèyè kwalukilakù mu dindà emu, yèyè kī mmufwànyineku kucyènza to nànsha byà munyi; mmufwànyine kupicila cyàkàbìdi mu byònsò ebi. Pààbì, bikaadi bijika mpindyewu, yèyè ùkaadi pàmwè ne mamwèndè ne pàpà wendè. Bóbò mbàdi babiikidishè mwanààbò wa mu dibòko bwà kwalukilaye kwàbò kumbèlu. Pa nàнку, tudi—tudi tuKusàkidila.

²¹ Tudi kàbìdi baswè kulòmba bwà busàmbi, bwà Mwanèètù Shakarian, mwanèètù wa balùme munanga ewu, bamanyè nsòmbelu utuye nendè awu—awu, ne ntàtu yìdiye ùpicila mu matùkù à ndekeelu aa, ne mùshindù mwìnè wùdiye; patùdi tumòmòna wènda wèla bidimu, ne nsuki yèndè yènda yitùuka, ne makaaya ènda àkòbama, kàdi nànsha nàнку ùteeta bwà kushààla mu budimi bwà bwambi bwà Nzambì. Nzambì, mupèèshèku dikàndà leelù ewu. Tudi tulòmba, Nzambì, bwà Wèwè kumupèèshadi. Aba bônso bàdi babungàmijìbwe bwà diya dyà nsongààkàjì ewu, tudi tulòmba bwà muntu ne muntu.

²² Nènku enzàku, Mukalenge, patùdi twelangana meeji ku cyôci eci apa, bwà tùvùlukèku ne dīngà ditùkù netwikalè pèètù ne cyà kuya. Patùcìdi basòmbè pàmwè kaaba aka mu Bwikadi bwà Mukalenge Yesù apa, tudi baswè kulòmbakù bwà Wèwè kutùvùlwija cyàkàbìdi cyôci eci. Nènku tùdikenkètèku, mutùdi mwà kwamba, anyi kubalulula kantu ne kantu kàà mu nsòmbelu yètù twètù biine, bwà twamònakù mwà kwikala mwìnshì mwà Mashi ne mu Diitabuuja. Enzàku nàнку, Mukalenge.

²³ Mpindyewu pàndi nteeta mu mùshindù wùdi maalu ewu bwà kutwàdilakù bantu kaadiyiisha kakesè apa, leelù ewu, ndi ndòmba bwà Ùnkwàcisheku, Mukalenge. Mpèèshèku dikàndà, bwalu ndi—ndi—ndi naadi dikèngela, Mukalenge. Ne ndi ndòmba bwà Wènzèku nàнку. Ne cintu kampàndà cyàmbiibwèku cìdi cifwànyine ànu kuKupà luumù. Ne kwòkò kwikàle muntu kampànda munkaci mwà kutèleja lubilà lwà dīyī dyètù mu dindà emu, udi kàyi mudìlongòlòle bwà

kukùngamangana ne díbà didì disanganyibwà kumpàlà kwèndè to, eci ciikalèku cikondo cyàdilekelelaye kùdi Ewu Wákamba ne: “Ndi Njila, Mwoyi, Bulelèlà,” Mukalenge wetù Yesù Kilistò mene awu. Bwalu tudi tulòmba nùnkù mu Dìna Dyèndè. Amen. (Nudi mwà kusòmbaayi.)

²⁴ [Muntu kampànda pa cibùmbà cyà ku cyambilu ùdi wàkula ne Mwanèètù Branham—Muf.] Mwanèètù wa balùme ewu mmuswè kumanya bantu bònsò ní bàdiku mwà kuumvwa bìmpè. Ùdi ne bikòlokolo bìbìdì bikàngula. Mbìmpè nànkù anyì? Nudi mwà kuumvwa anyì? Elàayi byanzà muulu panwikalà mwà kuumvwa. Nudi mwà kuumvwa anyì? Elàayi byanza muulu. Èyo.

²⁵ Bidi bintàcisha mutùdi katùyikù ne myaba yà kusòmba bwà bantu bònsò mu dindà emu. Nènku tudi ne dyeyemena ne ncyàkushààla mwimàne kaaba aka ntàntà mupitèpite bule to, ànu ntàntà bule bukùmbàne bwà kutùfikishaku pàmwàpa ku dibala dyà Dìyi; bwà Mukalenge Nzambi wàtwakù Dìyi Dyèndè dyàbadiibwà adi mushinga, ne wàtùpèèshakù ngàsà Wendè, bwà twamònakù mwà kuMukwàcila nendè mudimu.

²⁶ Mpindyewu bàvwa bangambile kùdi Billy Paul, mu dindà emu ne, mbifwànyine kwenzeka ne twàkulè mu dyalumingu dilwalwà edi ku Assemblée de Dieu wa ku Grantway, mu Tucson. Kwòkò mwab’ewu muntu wa mu Tucson, mbifwànyine kwenzeka ne ncimonwanganyì neenù mu lumingu elu to. Nèngùikalè ku Assemblée de Dieu wa ku Grantway, mu dyalumingu dilwalwà edi.

²⁷ Pa nànkù mpindyewu tucìdi tufùminakù ku Esètè kwaka, ne ndi mudyènzele bibi ànu mèmè mwine ndambù, ku didyà dipicisha, ne musàngeeleu mwìnè wà wùyiila ne panshì wà bantu bàà ku mikùnà bàba. Nènku—nènku ndi musaamè, pa nànkù ncíwa mudyùmvwè bìmpè lumingu elu to. Pa nanku, nwànsambidilaayikù. Ne. . .

²⁸ [Muntu kampànda ùdi wamba ne: “Opossums búngì cyanààna’s.”—Muf.] Wamba ne? [“Opossums búngì cyanààna.”] Kì Mwanèètù Carl Williams pèndè ne mapikù èndè awu’s, ne ngeela meeji ne tudi naawù dijinga bwà mpindyewu, yèyè’s ngwàmbì awu ne: “Opossums búngì cyanààna.” Bwà aci ncyèna mumanyè to, Mwanèètù Carl, kàdi nshìndì búngì cyanààna.

²⁹ Pa nànkù nwènù baswè kusambidilakù muntu mu dindà emu, mòna’s, ncyà bushùwà ne mèmè—mèmè ngudi wanyisha bu kwòkò mwà kwikalakù ndambù wa masambila ènù bwànyì mèmè, bwalu ndi—ndi naawù dijinga.

Mpindyewu tudi baswè kubwela lùkàsà mu Dìyi.

³⁰ Ne mèmè ncyèna muswè kunùlama kaaba aka ntàntà mupitèpite bule nànsha, bwalu ndi ngeela meeji ne kùdi bàdì bàteelejila cyòci eci ku maatèlèfonè mu ditùngà dijimà, mu dindà emu, kuumukila ànu ku Côte Ouest too ne ku Côte Est, ku Nord

too ne ku Sud. Masangisha àbúngì menemene àdi ne dipetangana edi ànu munùdi nwènú bónsò naadi kaaba aka kuumukila ku tabernacle. Bàdi kàbìdi ku nshinga mu Phoenix mwàmwa, mu myaba yónsò mùdi masangisha ènzekela amu, cidi cifikamù buludì kùdi. . . Ne bàdi bàdisangishila mu maèkèleeziyà ne mu nzùbu, ne bintu byà mùshindù awu, ku divwala dilenga dyà dikèma. Bàdi bàmba ne mbilenga kutàmba ne byà ku tudyòmba. Ndilamakaja dyà maatèlèfonè, bàdi bàtèèka kasanji kakwàci kàà mèyi anyi kaacikòlokolo, anyi cyónsò cidiku aci, mu cibambalu amu. Ne bàdi. . . Mukàjàànyì úvwa wàmba, mu difùmà dyà ku Indiana lumingu lushààle elu, tuya ku Tucson ne, bìvwa ànu mwomùmwe ne biikàle mu cibambalu amu mene. Pa nàнку tudi tulòmba ne Nzambì wàbèneshakù bónsò bàdi ku nshinga mu dindà emu abu, mu myaba yónsò yidìbo basanganyiibwa ayi. Mu New York mwàmwa patùdi twakulangana apa nebiikalè, kaa, mu mapingaja, ne pa mèbà mashiilèshiilàngàne pàdici cikòsolola ditungà dijimà apu.

³¹ Mpindyewu mu Mukàndà wà Loomò, nshapitá wa 12, ku mvensá wa kumpàlà ne mwi2, tudi tujinga—tujinga kubala Mufùndu ewu.

Ki bwà cinyi ndi nnùsèngeleela, bânà bèètù, ku luse lwà Nzambì, bwà nwènú kufila mibidi yènu bu mulàmbù wùdi ne mwoyi, wà cijila, ne mwitàbùjùbwe kùdi Nzambì, cidi ciikàle ntèndèleelu wènu wà meeji.

Nèuku kanùdìfwànyikiji ne maalu a pa buloba to, kàdi nwikalè bashintùlùke ku divwija dyà meeji ènú mpyamàpyà, bwà nwènú nwamòna mwà kujaadika ne, diswa dyà Nzambì didi dimpè, ne dipwàngàne. . . dimpè, diitàbùjùbwe, ne dipwàngàne ne, didi cinyi.

³² Mpindyewu, bu Mukalenge mwà kwanyisha, ndi muswè kwangata cyena-bwalu cyànyì bwà mu dindà emu, pa: *Bukolè Bwà Nzambì Bwà Kushintulula.*

Bwà nwènú kanùdìfwànyikiji ne maalu a pa buloba to, kàdi nwikalè. . . bashintùlùke ku divwija dyà meeji ènú mpyamàpyà, mpindyewu, ne kujaadika ne diswa dyà Nzambì didi dimpè, dipwàngàne, ne diitàbùjùbwe, didi cinyi.

³³ Mmufùndù wà kale wà ciibidilu wùkaadi bààbúngì bàà ku bampaasàtà bèènú bakwàtèkwàte naawù mudimu mu cikondo cyènú cyónsò. Bàtu bakwàtèkwàte naawù mudimu ànu kacya Wàfùndiibwa. Kàdi pààbì, cintu cìmwèpelè cidi naaci Dìyì dyà Nzambì cidi ne, kaDitu dikùlakajakù to, bwalu Dyòdi didi Nzambì. KaDitu dikùlakajakù to. Mu lukòngò ne lukòngò lwónsò mpindyewu, bwalu, pabwîpi ne bidimu binunu bìbìdi ne nkàmà mwandamukùlù, anyi bipite apu, Dìyì dyà Nzambì edi ndibadiibwe kùdi bantu, bansaserdòsè, ne bakwàbò, kàdi kaDiyikù dikùlakaja to. Nkàadi muDibalèbàle, mèmè mwinè,

bidimu bitwè ku makùmi àsàtù ne bitaanu. Kàdi musangu wònsò wúndi nDibala, ndi ànu mpeta cintu kampànda cyà cipyacìpyà cìmvwà nciyi mumona musangu wà kumpàla. Bwalu, nDisonsola, Didi Nzambi mu mmwènekeli wà màleetà. Nwamònu's, Didi mbyambiibwà byà Nzambi munkaci mwà kwakula, kàdi bifùndiibwe pa mabèji.

³⁴ Misangu yàbùngi, bantu bàtu bàmba ne: “Èè, mpindyewu, muntu's ngwákafùnda Bible ewu.” To. Bible ùdi wàmba, Yèyè mwinè ne, Nzambi ngutu mufunde Bible. N'Diyi dyà Nzambi.

³⁵ Ne Dyòdi kadyèna mwà kupangilakù to. Yesù wákamba ne: “Maulu ne buloba nebìpangilè, nebìjiminè, kàdi Mèyi Àanyi kaàdyàkupangilakù nànsha.” Nènku kaDyèna mwà kupangila, kàdi kwikalaDi Nzambi to, bwalu Didi citùpa cyà ku Yèyè.

³⁶ Nènku díbà adi bu múdi mwan'Èndè wa balùme ne wa bakàji, udi citùpa cyà ku Dyòdi, ne aci cidi cikuvwija citùpa cyà ku Yèyè. Pa nànkù ki bwà cinyi tudi tulwa bwà kwenza pàmwè bwobùmwe banyùngùlùkile Diyì dyà Nzambi.

³⁷ Mpindyewu mwakù ewu *bashintùlùke*, ndi mutàngile mu nkòngamyakù, makèèlèlè awu. Díbà adi, mèmè kwamba kupwa mwoyi díbà divwà dikèngelà bwà mèmè kulwa kaaba aka, pàmvwà nkèba mutù wà mwandà kampànda, ki mèmè kupeta mwakù ewu, mutù wà mwandà ewu's wè, Mufundu. Ne mu nkòngamyakù amu mbambè ne “ncintu kampànda cidi cishintùlùdiibwe.” Nkwikala “cishintùlùdiibwe.” *Cishintùlùke*, “civwijiibwe cishiilàngàne ne cìvwàci, citu . . . ngiikàdilù waci ne byònsò mbishintùlùdiibwe mu cyòci amu,” *kushintulula*.

³⁸ Ne mvwa ngeelangana meeji mu dindà emu, mu Genèsè 1. Buloba ebu kabùvwa ne mbùngakeenu to, ne bùvwa munda mutupù, ne mídimà yìvwa pa buloba; kaciyyikù cìngà cintu to ànu cimvundù pa cyòci. Nènku pàvwà buloba ebu mu ngiikàdilù awu apu, Nyumà wa Nzambi ùvwa wèndakana pamutù pàà màyi, ne cimfwànyi cijimà cyàkashintuluka; kuumuka ku cimvundù cyònsò nkòong, kuya ku budimi bwà Edènà. Ki Bukolè bushintuludi bwà Nzambi mbwòbù abu, bùdi mwà kwangata cintu kampànda cyà kaciyi mushinga nànsha ùmwè aci kàdi kucìvwija cintu kampànda cyà cilenga be. Bukolè bushintuludi bwà Nzambi's!

³⁹ Nènku tudi tuumvwa ne, ku dibala dyà Mifundu ne, Nzambi wàkenza bidimu binunu bisambòmbò—bisambòmbò mu kulongolola kwà Edènà ewu eku. Mpindyewu, Yèyè kàvwa mufwànyine kwikala mwenzè ntàntà bule nànkù to; kàdi bìdi ànu ndidicinkila cyanààna, ne dicyàngacila ku Mufundu mwaba wùdiWu mwambè ne “ditùkù dímwè kùdi Nzambi, mbidimu cinunu pa buloba,” mbwena kwamba ne, bu ne bìvwa bikèngela bwà Nzambi kubalaYè bikondo. Ne kwamba ne bìvwa mbidimu binunu bisambòmbò byàkangatàYe bwà kwenza buloba, ne

bìvwàYe mukùne mamiinu ònsò mímpè awu pa buloba. Kùvwa bintu byònsò ànu bipwàngàne.

⁴⁰ Ngeela meeji ne, misangu yàbùngì, nànsha mene badyudi pàdibo bàbanga kubala Mukàndà wà Genèsè, bàdi bàbanga kuWùdyula's, bwalu bìdi bimwèka ànu bu ne Wòwò wùdi ànu wenza kwambulula bìdiWu mwambè, anyì wùkushìya mu cibèndà eku ne kwàka.

⁴¹ Kàdi bu twètù ànu mwà kumòna bwà katanci kakesè, kumpàlà kwà twètù kubwela mu kubala kwètù, ne, Mòsà wàkamòna cikèenà-kumòna. Ne Nzambi nguvwa wakula nèndè. Nzambi ùvwa wàkula ne Mòsà mpàla ne mpàla, mishiku ne ku dici. Mpindyewu, kacya Yèyè kààkaakulakù ne muntu mukwàbò mùshindù awu, mwàkaakulàYe ne Mòsà amu to. Mpindyewu, Mòsà ùvwa munène, umwe wa ku baprófetà bàà batambe bunène ku bònsò. Yèyè ùvwa cifwànyikijilu cyà Kilistò. Nènku mpindyewu Nzambi udi mwà kwakula, Yèyè ùtu ne dìyì dyà mukana. Batu bàkaadi baDyùmwekù. Nzambi ùdi mwà kwakula.

⁴² Ne Nzambi ùdi mwà kufùnda. Nzambi wàkafùnda Mikenji dikùmi ne munu Wèndè Yèyè mwinè. Wàkafùndakù ku bimanu byà—byà Babùlòna musangu kampànda, ne munu Wèndè. Wàkiinama panshì ne kufùnda mu lusenga musangu kampànda, ne munu Wèndè. Nzambi ùdi mwà kwakula. Nzambi ùdi mwà kubala. Nzambi ùdi mwà kufùnda.

⁴³ Nzambi ùdi Mpokolo wa ngàsà yònsò ne Bukolè, ne wa lungènyi lwònsò lwà buNzambi, bìdi mu Nzambi. Ki bwà cinyì, mumanyè cyòci aci, Yèyè ke Mufùki umwèpelè udikù. Kakwènakù mufùki mukwàbò to pa kuumusha Nzambi. Sàtaanà kèna mwà kufùkakù to, nànsha kakesè, yèyè ùdi ànu ùnyangakaja bikaadi bimana kufùka abi. Kàdi Nzambi ki Mufùki umwèpelè.

⁴⁴ Ki bwà cinyì, Yèyè wàkafùka ku Dìyì Dyèndè. Wàkatùma Dìyì Dyèndè. Pa nàнку mamiinu ònsò àkatèèkàYe pa buloba awu, Yèyè wàkenza mamiinu awu ku Dìyì Dyèndè Yèyè mwinè, bwalu kakùvwakù cintu cikwàbò nànsha cimwè bwà kwenzelakù mamiinu to. Wàkaàtèèka, ne òwò àvwa mwinshì mwà màyi. Wàkamba ànu ne: “*Cikampànda* ciikalèku, ne *cikansanga* ciikalèku.”

⁴⁵ Mpindyewu tudi tujandula ne, misangu yàbùngì, bìdi bimwèka bu ne Bible ùdi ùdyambulula anyì wàmba cintu kampànda ku cidìYe kàyi wàmba to. Cileejilu, mu Genèsè 1 tudi tusangana ne: “Nzambi wàkafùka muntu mu cimfwànyì Cyèndè Yèyè mwinè, mu cimfwànyì cyà Nzambi Yèyè wàkamufùka; Yèyè wàkabàfùka mulwè ne mukàji.” Ne pashìshe Ùtùngunuka, ne bintu byàbùngì kwenzekabi pa buloba.

⁴⁶ Pashìshe tudi tulwa kujandula ne, kakùvwa muntu nànsha umwe bwà kudima buloba to. “Ke Nzambi kufùka muntu ku

lupwishi lwà buloba.” Awu ùvwa mmuntu mushiilàngàne. “Ne Wàkeela mupùyyà wà nyumà wa mwoyi munda mwèndè, ne yéyè wàkalwa musùkà wùdi ne mwoyi.”

47 Muntu wa kumpàla awu ùvwa mu cimfwànyì cyà Nzambì, udi mwikàle Nyumà. Yone 4, ùdi wàmba ne: “Nzambì ùdi Nyumà, ne aba bàdi bàMukuukwilà bàdi ne cyà kuMukuukwila mu Nyumà ne mu Bulelèlà.” Kàdi Nzambì ùdi Nyumà. Nènku muntu wa kumpàla, wàkafùkaYè awu, ùvwa muntu-nyumà, ne yéyè ùvwa mu cimfwànyì ne cimwènekèlu cyà Nzambì.

48 Ne pashiishe Wàkatèèka muntu ewu mu musunyà, ki muntu awu kudishìndayè. Pa nànkù ke Nzambì kutùulukaYè ne kulwa mu cimfwànyì cyà muntu, bwà Wàmòna mwà kupikula muntu ùvwa mudishinde awu. Bwalu-bulonda bwà Èvànjeeliyò mulelèlà ki bwòbù abu, bwà ku dyànyì—bwà ku dyànyì dimòna.

49 Mpindyewu, Nzambì, munda mwà bidimu binunu bisambòmbò, wàkakùna mamiinu ònsò malenga aa, anyì Wàkaakula Dìyì Dyèndè. “Nebìikalè mùshindù *kampànda*. Muci *kampànda* newìkalèku. *Cikansanga* neciikalèku.” Byònsò bìvwa bipwàngàne. Bìvwa ànu bìmpè. Nènku Yéyè wàkatùmina dyònsò dyà ku mamiinu awu dìyì bwà dyòdi kwikaladiku, bwa ówò miinè kudishintulula kulwawù mici yà mùshindù wà mwoyi wà bwena wùvwà Dìyì dyà Nzambì dyambè bwà kwikalayì awu. Ní divwa mucì wa lusàngà, divwa ne cyà kupàtula lusàngà. Ní divwa dibwè dyà ngaji, divwa ne cyà kupàtula dibwè dyà ngaji.

50 Bwalu, Mufùki munène ùvwa ùfùma ku ditùma Dìyì Dyèndè, ne dimiinu-Dìyì dikaavwamù kumpalà kwà dimiinu dilelèlà kwikaladì dyenjùbwe. Nènku Dìyì ndyàkenzà dimiinu adi. Nwamònu’s: “Yéyè wàkenza buloba ku bintu bidì kabìyi bìmwènèka.” Nwamònu’s, Yéyè—Yéyè wàkenza buloba ku Dìyì Dyèndè. Nzambì wàkaakula ne kufikisha bintu byònsò ku diikalaku.

51 Nènku Yéyè mwikàle Nzambì, Mufùki awu, wàkula ne ufikisha bintu byònsò ku diikalaku, s’cìvwa ne cyà kwikala buloba bupwàngàne. Cìvwa mwa—mwaba mulènga. Cìvwa mpà—mpalàdiizò mushùwashùwàlè mulelèlà pànu pa buloba.

52 Mpindyewu, bu mudibi ne, bìkèngela bwà mwaba ne mwaba wònsò kwikalawù ne ciimamwèndè wa bukalenge mwaba kampànda. Mpwilu ewu ùdi ne ciimamwèndè wa bukalenge, ne dyàpà edi dìdi ne ciimamwèndè wa bukalenge, ne èkèleeziyà ùdi ne ciimamwèndè wa bukalenge. Ne Nzambì ùdi ne ciimamwèndè wa bukalenge. Ne pa nànkù mwaba munène ewu, ditunga ditùdi basòmbèlemù edi, dìdi ne ciimamwèndè wa bukalenge. Ne pa nànkù Edènà munène ewu ùvwa ne ciimamwèndè wa bukalenge, ne cyèndè ciimamwèndè wa bukalenge cìvwa cilombòdìbwe mu budimi bwà Edènà, anyì mu Edènà, ku esètè wa budimi.

⁵³ Nènkù Nzambì kutèekaYè kumutu kwa cyôci eci, bwà kukòokesha bufùki Bwèndè bunènè bwónsò pa buloba apa, mwan'Èndè wa balùmè ne mukàjì-musela wa mwan'Èndè, Adama ne Evà.

⁵⁴ Nzambì nguvwa Tatwèndè wa Adama. “Adama uvwa... mwànà wa Nzambì,” bilondeshile Mifundu. Yèyè uvwa mwànà wa Nzambì.

⁵⁵ Ki Nzambì kumwenzelaYè mumukwàcishi, mufùmìne ku mubidi wèndè sungasunga; pàmwápa lubadi lwà kumutù kwà mwoyi wèndè, bwà wàmóna mwà kwikala pabwípi nendè, ne kumwenzelaYè mumukwàcishi awu. Kàvwa ànu mwanjì kwikala mukàjèndè to, ànu mùdìbi ne kacivwa cyanjì kwikala mulùme to; Yèyè úvwa mucyàmbè nànkù cyanàànà. Nènkù mwaba awu kì wàkabwelelà lutàtù's, Sàtaanà wàkapetangana nendè kumpàlà kwà Adàmà kupetanganayè nendè. Pa nànkù, civwa ànu Dìyì Dyèndè cyanàànà òvwaYe mwakùle.

⁵⁶ Ndi ngamba aci, ncyèna muswè kupicishilapù díbà dyàbúngì to. Kàdi bàmwè bàà kunùdì mbafwànyìne kupeta ndambù wa cibwejàkàjì, nangàngà bàmwè bàà ku bantu bàà mu—bàà mu Sud mwàmwa, mbimwèke bu ne bôbò bàdi bàpetapù ndambù wa cibwejàkàjì, pa Mukenjì wùndì mupetè kùdì Nzambì leelù ewu ewu, bwà cisàmbà, wa pa dimiinu dyà nyòka awu. Nènkù mèmè nèngìkalè mwà kwalukila kwànyì, bu Mukalenge mwà kwanyisha, òmwè dyà ku matùkù àdi panshì aa, ku Jeffersonville. Ndi muswè diyìisha dyà mèbà matwè ku àsambòmbò, bwà kwolola cyónsò aci, nwamònu's, pa nànkù nedicitèekè ànu mu mmwènekelu mwimpè bwà nwènu kumanya citùdì twamba. Ne cìdi ng'EMU MMÙDÌ MUKALENGÈ WÀMBA. Ncilelèlà ànu mùvwàci pàvwàCi cimòne Mwanèètù wa bakàjì Florence kumpàlà kwà kufwàye apu, bidimu byàbúngì. Nwamònu's, Cidi Bulelèlà. Nènkù mpindyewu, twètù... pàmwápa bàdi bàcyùmvwà bibì.

⁵⁷ Bu muntu mwà kulwa kùndì, ne cintu cyà cibèngàngàne, s'ndi ànu mufwànyìne kucyùmvwà bibì mu mùshindù kampànda, mèmè mwinè. Ncyèna muswè kudyula cìdì muntu kanà yònsò wàmba to. Kabyèna bikèngela bwà twètù kwikala tudyulangana muntu ne mukwèndè to. Mèmè ncìtu ne dipiilà dyà kwikalakù mwenzè aci to; ndi nsàkidila Mukalenge. Nkààdikù mudyulèdyùle mpèkaatù ne bupidyà; kàdi kí mmuntu nànsha umwe wa muntu-nkààyà ewu to, nwamònu's, ncìtu—ncìtu ncyènza to. Tudi—tudi bânà bàà muntu balùmè ne bakàjì, biikàle tudyènzeja, tudi tuya batàngile kùdì Mwanèètù wa bakàjì Florence mukafikè makèlèlèlà mu dindà aku, nwamònu's. Yèyè...Bi—bikèngela tuye bònsò mu njila awu. Kàdi kí nkiipàcìlà kàndì naakù bwà—bwà kuteeta kudyula mwanèètù wa balùme anyì mwanèètù wa bakàjì kampànda udi kàyi muswè kutwà ku cyèbè to. To, abi byàyiila kule! Ncyèna ngeela meeji ne nenùsanganèkù mukàbà wà mèyi múnkaadiku mutèele dìnà dyà

muntu nànsha yéyè nganyi to. Pààbi, nkààdikù mudyũmwè misangu yàbũngì ne muntu awu mmutupàkàne, kàdi abu mbumutangile yéyè ne Nzambi. Kàdi cidì cibì, mu mùshindù wà mpèkaatù ne . . . Ne dyumvwa dibì misangu mikwàbò kadìtu nànsha mene mpèkaatù to, cidì ànu ndyumvwa dibì dyà bantu. Ne ndi—ndi ngeela meeji ne muntu ne muntu wa kutùdì ùdi ne bukenji bwà kwamba yéyè mwinè patòòke maalu bilondèshile dyumvwa dyèndè.

⁵⁸ Mpindyewu, Mufùki munène ewu wàkatèèka mwan'Èndè wa balùme mufùka awu. Mpindyewu, Adàmà nguvwa mwan'Èndè wa balùme mufùka wa nzànzànzà. Yesù ùvwa Mwan'Èndè umwèpelè *mulela*, nwamònu's, Wàkalediibwa kùdì mukàjì. Kàdi Adàmà ùvwa yéyè mufùmìne buludi ku cyanza cyà Nzambi, mu bufùki amu.

⁵⁹ Mpindyewu ciimamwèndè wa bukalenge aci, ne mwan'Èndè—Èndè wa balùmè ne mukàjì-musèla wa mwan'Èndè kumutù kwà byònsò, bìvwa bimwèke bipwàngàne. Kùvwa mu—muntu mulùme, mfùmù wabi byònsò abi, mwan'Èndè Sungasunga ne mukàjèndè-musèla.

⁶⁰ Ne dimiinu dyònsò dìvwa dipwàngàne, mabwè à ngaji, ne micì yà nsàngà, ne mashinda, ne nyuunyi, ne nyama. Ne bintu byònsò bìvwa mu bulongàme bupwàngàne ne Dìyì ditùmà dyà Nzambi ne: “Kùshintululu ngiikàdilù webè to. Dìvulanganè bilondèshile mùshindù wàdì, dimiinu dyònsò! Wèwè mucì wà lusàngà, kùnyangakajiibukù wàlwa mucì wà cìnkwennda to.” Nwamònu anyi? “Wèwè dibwè dyà ngaji, kùnyangakajiibukù wàlwa cìngà cintu to. Kàdi dimiinu dyònsò bilondèshile mùshindù wàdì!” Nènku Yéyè ùvwa—Yéyè ùvwa mucitàbàlèèle munda mwà bikondo amu.

⁶¹ Ne Yéyè ùkaavwa mwambè Dìyì. Ne Bukolè Bwèndè bunènè bwà difùka abu mbùvwa bwenzè bintu byàkatòlokà ebi, ne too ne mulùmè ne mukàjì mene. Ne bòbò mbàvwa mutù bwalu bòbò mbàvwa . . . bòbò mbàvwa batàmbidile ku mishindù mikwàbò yònsò yà bifùkiibwa. Ki Yéyè kubatèèka kàbidì mwînshì mwà bukùbì bùmwebùmwè mùvwaYe mutèèke micì, nyama, ne bikwàbò amu: Dìyì Dyèndè. Kabàvwakù, nànsha byà munyi, ne cyà kushipa Dìyì adi to. Bàvwa ne cyà kushààla ànu Mwómò amu. “KanùumushidiKù kantu nànsha kàmwè, anyi kanùsàkididiKù kantu nànsha kàmwè to! Nudi ne cyà kwikala ne mwoyi ku Dìyì edi.”

⁶² Nènku pàcìvwa bufùki abu bufwànyine ànu kwikalakù mùshindù awu, nùnkù Mwanèètù wa bakàjì Shakarian kì mmufwè mu dindà emu to, pàcìvwa ànu bufwànyine kwikala bushààlè mùshindù awu, cibùcilu cinènè cyà Nzambi's! Ki citùdì twitabuuja ne kwòkò aku ki kutùdì twenda twalukila. Tudi twenda twalukila ku kaaba aku, mwaba awu.

⁶³ Ku dindà dyà mwandamutekète adi, pàakatàngilà Nzambì pa byònsò, ne kwambaYè ne: “Mbìmpè. Ndi—Ndi musànkishìibwe kùdìbi. Èyowà’s, Ndi—Ndi—Ndi ne disànkà dyà kwikala mubyènzè. Ne byònsò nebiikalè mpindyewu mu bukòntononyi. Ne Ndi mutèèke dyeyemena mu mwan’Aànyì wa balùmè ne mu mukàjèndè, bwà ne—bwà ne bòbò (mubàvwijè bamfùmù bààbi byònsò), bwà ne bòbò nebàbitàngilè byònsò ne nebènzè bwà kwikalabi bilenga, bwà cintu ne cintu kuvulanganaci bilondèshìle mùshindù wàci. Mpindyewu yèyè ngudi ne bukòòkeshi bwà kwenza nànkù.” Pashìishe Nzambì kwambaYè ne: “Èè, pìikalabi byònsò bìmpè mùshindù awu, ne kabyènakù mwa kwikala mungà mùshindù to, bwalu ndijinga Dyànyì Sungasunga. Ki mùshindù wùndì Mèmè muciswe. Ne mùshindù awu ngùNdi mucyàmbè, ne Mèyì Aànyì mmacìpàtùle ànu menemene mùmvwà muswè bwà kwikalaci. Kàdi’s ki cyòci aci. Cyònsò ncìmpè!” Pa nànkù Bible mmwambè ne: “Nzambì wàkiikisha mu ditùkù dyà mwandamutekète, ku midimu Yèndè yònsò.”

⁶⁴ Nènku cintu ne cintu cyònsò mu bukòntononyi, bwà kuvulanganaci bilondèshìle mùshindù wàci. Mpindyewu vùlukààyi, “kuvulàngana.” PàakeelàYe dimiinu mu buloba, dimiinu didi mwà kupàtuka ànu ne bukòlè bwà mwoyi wùdì munda mwàdì awu, bwà kudìshintulula kudyùmusha ku dimiinu ne kudifikisha ku mucì, anyì cyònsò cìvwàci aci. Bukòlè Bwèndè bushintuludì’s! Mpindyewu, Nzambì wàkatèekamù dimiinu, diikàle ne dikùmbanyina dyà ne dyòdì divwa mwà kwikala cìvwà Nzambì mwambè bwà kwikaladi aci. Ne pàcìvwàdì ànu dishààle mu mùshindù wàdì mujaalàme apu, divwa mwà kwikala menemene ànu cìvwà Nzambì mwambè ne nedìikalè aci. Bìvwa bikèngela bwà kwikaladi mùshindù awu, bwalu Yèyè wàkadyènza mùshindù awu, ne mwenzè kajila. Bwalu, cintu cyònsò cìdì cishààla mu kajila Kèndè aci, mu njila Wèndè wa Dìyì aci, neciikalè ne cyà kuvulàngana menemene ànu mùdì Dìyì Dyèndè dyambè ne neciikalè mwà kuvulàngana amu. Kacyènakù mwà kutentemuka kuumuka apu to. Ncilulamìjìibwe ànu menemene mu kajila amu. Pa nànkù, mwikàle ne byònsò mu dyeyemena mu mwan’Èndè Sungasunga awu ne, nebiikalè mùshindù awu, dìbà adi Nzambì kwambaYè ne: “Byònsò mbìmpè, pa nànkù Nèngànji ànu kwikisha. Nènku dyònsò dyà ku mamiinu awu didi ne bukòlè munda mwàdì dyòdì diinè, bwà kudìshintululadi dyòdì diinè kulwadi mùshindù wùNdi njinga bwà kwikaladi awu. Ki cìdìdì ne cyà kwikala ncyòci aci, bwalu Ndi mupèeshe dimiinu ne dimiinu dyònsò bukòlè bushintuludì, bwà kudyènzèladi dyòdì diinè, mu dikùmbanyina dyàdì mpindyewu bwà kudìvwijadi dyòdì diinè ànu menemene cìNdi muswè bwà kwikaladi.”

⁶⁵ Kacya Nzambì kàtukù mushintùlùke to. Umwèumwè awu leelù ànu mùvwàYe musangu awu amu! Nzambì mmupàngàdike

bwà kwenza cintu kampànda. Yèyè neàcyènzè. Cintu nànsha cimwè kacýàkuMupangishakù to. Yèyè neàcyènzè!

⁶⁶ Mpindyewu paanyimà pàà byònsò bimanè kwikala bîmpè menemene ne bitèèkiibwe mu bulongame, Nzambi kudyùmvwàYè mpindyewu mutwishiiibwe ne nebiiikalè byònsò bilenga, ne díbà adi, pàakadyùmvwàYe nàнку awu, ki pashiishe mwena lukunà kubwelayè. Nèngiikalè mwà... Nzambi ùvwa mufile bukolè bwà kushintulula. Nènku nèngiikalè mwà kubiikila mmyàna ewu, udi kàyi ne bukolè bwà—bwà kufùka cyàkàbìdi ewu, kàdi ndi... Ùvwa yèyè ne bukolè bwà kukònyangaja, kí mbwà kushintulula to; kàdi bwà kukònyangaja. Mpindyewu, cyònsò cìdi cikònyangaja ncyumùshiiibwe ku ngiikàdìlù waci wa ku cibangidilu, kùdi cintu kampànda cìdi cipampàlàmmùke mu cyòci amu.

⁶⁷ Kùkaadi ndambù wa bidimu, mu mudimu wa bukontononyi, pàmvwà ngenda nkòsolwela mu madimi à matalà, mvwa ngeela meeji ku, kùvwa ditàmbà divwàbo bakòse ku mucì kùdi lupeepèle, ne dikapònène pa cicolakola cyà ditalà. Kàdi cicolakola aci cívwa citeeta ne mwàci mwònsò bwà kajuuka kululamaci mùvwàci ne cyà kwikala amu, kàdi cívwa cikònyàngàle bwalu cintu kampànda cívwa cyenzèke. Ne mucì awu wùvwa mucilàadìle.

⁶⁸ Pashiishe tudi tusangana cilàmbalàmbà cyà cisuku mu budimi amu. Cìdi, bààbùngì bàà kunùdi nwènù balùme bàdi kaaba aka, ne pàmwàpa bàmwè bàà ku bakàji... panwikalà bafùmìne ku Kentucky. Bantu bakàji bàtu bàkwàta mudimu kuntwaku ne lukàsù ànu mùdi muntu mulùme amu, bàya ku budimi ne—ne lukàsù, lutùdi tubiiikila ne ndukàsù lwà mulabi mule alu, nènku bàkòsa bì—bilàmbalàmba abi. Bwalu, wèwè kùyi muumùshe bilàmbalàmba abi to, mwaba wùdi matalà meelè mulongo, mùshindù ewu awu, díbà adi cilàmbalàmba aci ncifwànyine kuya too, kukwàta ditalà adi, ne cidìjìngilakù ku kakesè ku kakesè, ànu bipeepèle nùku, ne budimù bwà menemene, mu mùshindù wà wèwè mufwànyine kupanga kumanya ne cívwa cidìjìngilekù. Ne ndekeelu wa byònsò cìdi cibanga cyènda cicolakana ànu kukolakana, ne cikòka ditalà adi too ne mwàkònyangalàdi. Cìdi cidikòka cidilamakajila kùdici aku, cidìjìngila pambidi pàà cicolakola cyàdi apu; cìcikònyangaja cìcyùmusha ku mùshindù wùvwàci awu, cìcìvwija cintu cyà cyanàànà. Pàadi diikàle ànu ditalà, kàdi nditalà dikònyàngàle.

⁶⁹ Kàdi tucìdi bònsò ànu mu cimfwànyì cyà Nzambi. Kàdi bàmwè mbakònyàngàle, bu bàna bàà Nzambi, bàdi benda bibèngàngàne ne Díyi Dyèndè ne mùshindù wùvwàYe mutwènzè ne—ne wùvwàYe mulongòlòle bwà twètù kwenda awu. Kutèeka cintu kampànda, maalù a pa buloba àtùkònyangaja àtùpàtula mu njila, àtùkòka pabwìpi naawù, ne àtùshiya kule ne mùsèèsù mululàme, mubùmbàkàne, mùvwàYe mutùkùne, bwà twètù

kwikala bânà bàà balùmè ne bàà bakàji bàà Nzambì amu. Mpèkaatù ngudi mwenzèle bânà bàà balùmè ne bàà bakàji bàà Nzambì cintu cibì eci.

⁷⁰ Mukònyangaji's! Ndi mumanyè ne eci cidi cimwèka bu cyà pabwàci bwà kucyàmba mùshindù ewu, “ku—kukònyangaja,” kadi's ki cìvwàyè; yèyè wàkakònyangaja, anyì wàkanyangakaja. *Kunyangakaja* mbwena kwamba ne “kushintuludiibwa yònsò, muvwijiibwe cintu kampàndà cyà cishiilàngàne.” Ne *kukònyangaja* ncintu ànu cyòci cimwècimwè aci, bwà ne nciwàdiibwe cyàkàbìdì ne cikònyàngàjiibwe, ne “cìvwijiibwe mu mùshindù wà cyanààna.” Kàdi cìcidi dimiinu ànu dyòdi òmòwèdimwè adi, kàdi ndikònyàngàjiibwe.

⁷¹ Mpindyewu tudì tusangana ne mukònyangaji ewu mmwangàte pèndè mukùngulù wà díbà ànu wùm wèwùm wè awu, bwà kukònyangaja, wùvwà Nzambì mmwangàte bwà kushintulula awu. Mpindyewu kukùnayè dyèndè dimiinu, anyì, kàakakùnakù dyèndè dimiinu to, yèyè...mu budimi bwà Edènà amu. Kacya ànu ku ciinè cikondo aci, mmwangàte bidimu binunu bisambòmbò byà dikònyangaja dyà Dimiinu dyà Nzambì, Dìyì dyà Nzambì; bwà kuDìkònyangaja, kuDìvwija cintu kampàndà cyà cishiilàngàne; pàvwàyè...musangu ànu wà nzànzànzà wàkamutèèlejà Evà, ne mukàji awu kudipetelayè ànu katùpà kàà cyambilu kakesè cyanààna.

⁷² Vùlukàayi ne, musangu wà kumpàla Sàtaanà wàkatèèlè Mufundu ànu bitòoke too ne mwèndè mwònsò ne: “Nzambì mmwambè ne: ‘Kanùdi ku mucì ne mucì wònsò wà mu budimi bwà Edènà’ anyì?” Nwamònu anyì? “Kanùdi ku mucì ne mucì wònsò anyì?”

⁷³ Kàdi vùlukàayi mpindyewu ne, Evà wàkamba ne: “Èyowà, tudì mwà kudyà ku mucì ne mucì wònsò; kàdi mucì wùdì munkaci mwà budimi awu, katwèna nànsha mene ne cyà kuwùlenga to.” Mpindyewu anjì mutàngilaayi nùmonè, mu dyèndè diyiisha adi, ùkònyangaja Dìyì adi ànu kakesè cyanààna. Mu kwamba...Evà wàkamba ne: “Bwalu Nzambì mmwambè ne, twètù benzè cyòci eci, ditùkù adi tudì ‘tufwà.’”

⁷⁴ Kwambayè ne: “Kaa, ncyà bushùwà ne kanwàkufwàku to.” Nwamònu's, yèyè ùvwà mu—muntu, kwambayè ne: “Anjì—anjì—anjì enzàbi eci mpindyewu. Ne, nwènù—nwènù nudi—nwènù nudi bu bantu bapangi's. Nwènù, mu bushùwà bwà bwalu, kanwèna bamanyè maalu ónsò to. Kàdi bu nwènù ànu mwà kulwa baabanyanganyi bàà eci, díbà adi's nuvwà bafwànyine kwikala ne lungènyi, s'nuvwà bafwànyine kwikala ne dimanya. Nuvwakù bafwànyine kumanya dishiilangana pankaci pàa maalu mîmpè ne maalu mabi ne kwikalakù bu banzambì, nwènù aba, bu nwènù ànu mwà kulwa baabanyanganyi bàà lungènyi lùndì mèmè naalù elu. Mèmè ndi mumanyè, kàdi nwènù kanwena bamanyè to.”

⁷⁵ Pààbì, bitu ànu bîmpè bwà kwikala ne lungènyi. Kàdi lungènyi lwólò lwikàle lubèngàngàne, lungènyi lwólò kalùyi lungènyi lujaalàmè lwà kùdì Nzambi to, lungènyi lwà Nzambi, kàdi lùlwa lungènyi lwà mu mubidi emu; nànsha twètù ne maalu a mamanya búngì bishi, ne bikwàbo byònsò, anyì dilonga dyà tùlaasà, abi mbyà kùdì dyabùlù. Mémè nènnùjaadikilèci, bu Mukalenge mwà kwanyisha, mu tusunsa takesè emu. Alu ndwà kùdì dyabùlù.

⁷⁶ Dishidimuka ndyà kùdì dyabùlù. Ndi mufùme ku diyisha pa cyòci aci. Nkolèshilù mulenga yònsò pa buloba, makolè ònsò à maalu àà mamanya, ne byònsò, mbyà kùdì dyabùlù. Ki èvànjeeliyò wendè wàkayiishàye nyèye awu, wa dimanya, mu budimi bwà Edènà. Kàdi yèye mmwangàte dimanya adi, dimanya dinyangakaja adi, dyà dibèngàngana ne Dìyi ne diswa ne ndongamu wa Nzambi. Nèku mpindyewu mmwangàte bidimu binunu bisambòmbò bwà kwenzayè ànu menemene cyàkenzà Nzambi aci, cìbì mu mùshindù munyangakaja, ne mwangàte mukùngùlù wa dibà ànu wùmwèwùmwe awu bwà kubweja wendè Edènà wa sungasunga. Patùdì twakulangana apa yèye ùkaadi ne Edènà kampànda pa buloba apa, kàdi mmùle tètè ne lungènyi, ne dimanya. Aci ki cìvwà wendè èvànjeeliyò ku cibangidilu, dimanya, lungènyi, maalu à mamanya. Kacya Nzambi kàtukù mutwè byà nànkù abi nyama ku mikòlò to. Nèku ndi—ndi muswè bwà nùtangilèku katanci. Yèye wàkenza cyòci eci, kàdi mbwalu ùvwa muntu wa lungènyi lwà pa buloba.

⁷⁷ Mpindyewu, mbikolè bwà kwamba eci. Mbi—mbikolè be, bu mùndì ngaakula ne bantu bàdì bàdyùmvwà mùshindù wùmwèwùmwe naanyi, ne mùshindù wùntù mudyùmvwumvwe bidimu byàbùngì. Kàdi kacya ku dikàngula dyà Bitampì Mwandamutekète abi, dyà Banjèlo abu ànu paanyimà pàa mukùnà pààpa adi, *Eci* ncilwè Mukàndà mupyamùpyà. Mbintu bìvwà bisokoka, bìdì munkaci mwà kusokolodiibwa mùvwà Nzambi mulayè mu Bwàkabuulwibwà 10 ne, Yèye ùvwa mwà kucyènza. Nèku twètù tudi bantu bàà dyèsè bàdì Nzambi musungùle, bàà pa buloba, bwà twikalakù mwà kumòna ne kuumvwà bintu ebi; bìdì kabiyi byà meeji kampànda makwatakaja, à musunya à muntu wa ùteeta kubikwatakaja to. N'Diyi dyà Nzambi dimwènèshùbwe, dijaadikùbwe ne, nDyà cyà bushùwà. Dijaadikùbwe, kabiyi ku maalu à mamanya to; kàdi kùdì Nzambi ne, nDyà cyà bushùwà. Nzambi, mungàmbi kumpàlà mu Diyisha kampàndà, Nzambi kàtu dìjinga ne muntu kampàndà bwà kuumvwijayè Dìyi Dyèndè to. Yèye m'Mudyùmvwijidi wa Yèye Mwinè. Yèye ùdi wàmba ne necyènzekè, pààci cyènzeka. Mbwena kwamba ne, Yèye—Yèye ngudi ucishindika, ngudi ucyùmvwija.

⁷⁸ Kùkaadi ndambù wa bidimu, patùvwà twètù beena Mpenta aba, pàvwà èkéleeziyà mi—mikwàbò yìtwàmba ne twètù tuvwa “bapàlè,” twètù “katùvwà bakùmbàne to, Nyumà Mwimpè ùvwa

cintu cimanè kupita.” Kàdi twètù kujandula ne mulayi wa Nzambi wùvwa bwà ewu yònsò udi muswè, ne mpindyewu tudi bamanyè bishiiàngàne. Nwamònu’s, ne ciinè aci cidi ànu ku kakesè ku kakesè, kùdi cintu eci cikàngùke.

⁷⁹ Nènku mpindyewu Yéyè wàkalaya ne maalu-masokoka àvwà masokoka munda mwà bikondo, bikondo byònsò byà èkèleeziyà abi awu, àvwà mwà kubuuludiibwa ànu ku cikondo cyà nshiiکیدیلو menemene. Nènku Yéyè ùdi ùtùmanyisha mpindyewu. Tudi ku cikondo cyà nshiiکیدیلو. Tukààdikù mpindyewu.

⁸⁰ Mpindyewu, Sàtaanà ngudi mfukyaamukele wa dishidimuka. Yéyè ki mfukyaamukele wa maalu à mamanya. Yéyè ki mfukyaamukele wa dilonga dyà tulaasà.

Wèwè udi wamba ne: “Aci ncilelèlà anyi?”

⁸¹ Èyò, tùbalàayi mu Dìyì dyà Nzambi mpindyewu, Genèsè 4, nènku twàlukilàayi paanyimà ne twánjàayi ànu kumòna bwà katancì kakesè. Ndi mumanyè ne ndi mwà... bu mémè mwà kutàmba kuleepesha, Mwanèètù Carl pàmwàpa neàngambile. Kàdi, Genèsè, nshapità mwi4, ku mvensà wa 16, ùdi ùtùngunuka ne kwamba mwab’ewu, ku cibangidilu, cyàkenzà Nzambi, bwà kwela mulùmè ne mukàji mulawu, ne cyònsò cìvwà cikèngelà bwà kwenzabò aci; kacyi *mulawu* mubèèla to, kàdi kubàmbila cìvwà mwà kwenzeka, ne kwela buloba mulawu bwà bwalu bwà Adàmà. Ne tudi tujandula kaaba aka mpindyewu ne, Evà wàkalela bàna bàà mapàsà bàbìdi. Ne umwe wa kùdìbo ùvwa wa Sàtaanà, umwe wa kùdìbo ùvwa wa Nzambi.

Mpindyewu wèwè udi wamba ne: “Uh-oh! To. Mpindyewu, Mwanèètù Branham!”

⁸² Anji indila kakesè. Mpetèlèku Mufùndu wùmwèpelè, mwaba kanà wònsò, wùdi wàmba ne Kayiinà ùvwa mwànà wa Adàmà. Mémè nènkuleejè mu Mifùndu mwaba wùdiYi myambè ne: “Kaayinà ùvwa mwànà wa mubi awu,” kàyi wa Adàmà to.

⁸³ Mpindyewu mònaayi pààkiimitàye kaaba aka. Tudi twanji kubangila ku nshapità mwi4, dyàmbedi.

Nènku Adàmà wàkamanya... mukàjèndè; ne yéyè wàkiimita, ne wàkalela Kaayinà, ne wàkamba ne: Ngààpeci... wàkamba mpindyewu ne: Ngààpetèdi mwànà wa balùmè ùfùmina kùdi MUKALENGE.

⁸⁴ Mu bushùwà bwà bwalu, s’ki mùvwàbi ne cyà kwikala. Nànsha byòbi ne ùvwa nndumbà anyi ní ncinyi cyònsò, cìvwa ne cyà kufùmina kùdi Nzambi, nwamònu’s, bwalu ndimiinu Dyèndè, mmukenji wa dimiinu Dyèndè, didi ne cyà kuvulangana nànsha byòbi ne ndimiinu dinyangùke, dimiinu dinyangakaja, anyi ní ncinyi cyònsò cidìdi aci. Didi ne cyà kuvulangana, nànsha bishi. Ndiyì Dyèndè ditùma.

Ne wàkalela kàbìdi mwanàabò wa balùme Abèlè.

85 Kàakamumanya kàbìdì to. Adàmà wàkamanyangana ne mukàjèndè, ne yèyè wàkalela Kaayinà ne wàkalela kàbìdì Abèlè, bânà bàà mapàsà. Sàtaanà ùvwa nendè mu dindà amu, Adàmà mu mapingaja amu.

86 Nudi numòna dikòkangana dinène mu cibèjibeji mwaba ewu, ngeela meeji, mu Tucson mpindyewu, dyà mukàjì udi mulelè mwànà mufiike ne mwànà mutòoke, musangu ùmwè awu. Mukàjì awu ùvwa mulààle ne bàyendè mu dindà amu, ne ne muntu awu mu mapingaja amu. Nènku mulùme awu ùvwa mwà kwangata bukùbì bwà. . . mulùme wa batòoke awu wàkamba ne neàngatè bukùbì bwà wendè mwànà sungasunga, kàdì mulùme wa bafìike awu ùvwa mwà kwangata bukùbì bwà wendè mwànà sungasunga. Nwamònu anyi? Ndi mumanyè ne, mu disambakaja dyà mamiinu à mbwa ne bikwàbò, s'ncyà bushùwà ne necyènzekè, piikalàbì ne mmèbà makesè paanyimà. Eci's cìdì cibùjaadika.

87 Mpindyewu bwà kuleeja kùdì dishidimuka difùmine, tùbalàayi mpindyewu Genèsè kaaba aka, mu nshapità mwi4 wa Genèsè ewu cyàkàbìdì, bwà tùmone ne mpenyi. Mvensà wa 16.

Nènku Kaayinà wàkapàtuka mu bwikadi bwà Nzambi, ne wàkasòmbela mu buloba bwà Nodà, ku luseke lwà ku esètè kwà Edènà.

Nènku Kaayinà wàkamanyangana ne mukàjèndè; ne yèyè wàkiimita, ne wàkalela Enòshà: ne yèyè wàkiibaka cimenga, ne wàkiinyika dinà dyà cimenga aci, bilondeshùle. . . dinà dyà mwanèndè, Enòshà.

88 Dishidimuka dyàkabanga. Docteur Scofield, mu Bible wanyì mèmè wa Scofield ewu emu, mmwambè ne: “Dishidimuka dyà kumpàla.” Mònaayi, pashìshe yèyè wàkalela bânà bàà balùme, ne bóbò bàkenza bisanjì byà orgues ne mìjikì. Wàkalonda wàkalela bânà bânà bàà balùme, ne yèyè wàkabanga kwenza bikwàbò bintu, maalu à kukèma, wàkiibaka bimenga, ne— ne wàkenza byamu byà mudimu byà kabanda, ne bintu byà mishindù yònsò. Nwamònu's, ki cyàkenzàye ncyòcì aci, cyàkalwà dishidimuka dyà kumpàla, divwà dyà cyena-Kaayinà. Yèyè's mmwenzè cintu cimwècimwè aci munda mwà bikondo.

89 Mpindyewu tükufikàayi ne mvensà wa 25, bwà tutangilè bwà kumòna ne wàkalonda yèyè ùvwa cinyì.

Nènku Adàmà wàkamanyangana cyàkàbìdì ne mukàjèndè, mpindyewu, ne yèyè wàkalela mwànà wa balùme, ne wàkamwinyika dinà ne Setè: Bwalu, mwàkambàye, Nzambi wàdongòlwèdì dimiinu dikwàbò pa kaaba kàà Abèlè udi Kaayinà mushebèye.

Nènku Setè. . . Nènku kùdì Setè, kùdiye kàbìdì kwàkalediibwa mwànà wa balùme; ne yèyè wàkamwinyika dinà ne Enòsà: ne dìbà adi bantu

bààkabanga kusòka dìnà dya MUKALENGE (bàà luseke lwà Setè, kí mbàà luseke lwà cyena Kaayinà to).

⁹⁰ Nwamònu's, munène wa mamanya à mu mutù utùtù twètù bònso beeyèmene awu's! Communisme leelù ewu ki cinyi pàaci's, nzambi wabò ncinyi? S'mmamanya à mu mitù awu, maalu à mamanya. Citùdi twenza ncinyi, nànsha bishi? Tudi ne mwoyi penyi? Elàngànaayi meeji pa méyi aa leelù ewu.

⁹¹ Patùdi twakulangana apa yéyè ùkaadi ne Edènà wa wèndè mùshindù, Sàtaanà awu ùdi nendè mpindyewu. Mu bidimu binunu bisambòmbò ebi, yéyè mmwenzè (kàyi mufùke to), kàdi, mmukònyàngàje buloba bujimà bwà Nzambi, bifùkiibwà Byèndè, nyama, ùyisambakaja, ùyisopakaja mamiinu; mici, bikùnyiiibwà, bantu; too ne ku ntèndeelèu mene, Bible, èkèleeziyà; mu mùshindù wà ne yéyè ùkaadi mudipètèle budimi bwà Edènà mu kaabujimà, wa maalu à mamanya, byònsò byènda ànu ku maalu à mamanya. Màshinyi ètù à tùdyèndelandelà, byònsò bitùdi naabi, mbitùpèesha ànu kùdi maalu à mamanya, bidì muntu mwenzè. Ne yéyè ùkaadi mupètè wèndè Edènà munène pànwapa; bwà kujaadika ne Mukenji ngwà cikondo cikumbàne menemene, bwà kujaadika ne kí ncíngà cikondo kàmpànda to ng'ànu cyà Bwàkabuulwibwà 10! Tangilàayi disopakaja dya mamiinu leelù ewu, bwà kwenza cyà citàmbe bwímpè, anyi, citàmbe bulenga, kí ncyà citàmbe bwímpè to. Tàngilàayi bânà bakesè leelù ewu.

⁹² Mvwa muyè ne mwanàanyi wa bakàji kwà ngàngàbukà wa mènù, makèèlèlè awu, kàdi kwambayè ne mènù èndè àvwa ènda àkònyangala. Mwanèètù kàmpànda wa balùme mu Tucson, Mwanèètù Norman, ùvwa ne mwanèndè mukesè wa bakàji, ne mènù èndè àvwa àtòloka matàngile pambèlu. Kàdi ngàngàbukà wa mènù awu ùdi wamba ne àbidi àdi pànshì aa, mùdiye wèla meeji, ne pàmwàpa mu matùkù àcilwalwà, bantu nebiikàlè bàlediiibwa, biikàlè ne mènù àtòloka mu mùshindù wònsò nàka. S'mbyàkudya bitùdyadyà abi, byàkudya bisopakaja.

⁹³ Nuvwakù babalè cikàndàkàndà cyà *Reader's Digest*, ngondo washàadi ewu, pa bidì bitangila Billy Graham, mutangadiki wa ngiikadilu milenga awu anyi? Nutukù numutèeleja anyi? Mémè ndi mmusambidila mpindyewu kutàmbe byà kwònsò eku. Pàvwàye wàkula ne bantu bàà mitèèlù yà nshìngù wa nkoolò abu, ne bikwàbò, dilòòlò adi, wàmbila balombodi bàà ntèndeelèu bwalu abu. Cintu kàmpànda's nciimwenzèkèlè. Dimwè dya ku matùkù aa, mémè ndi ntèkemena ne neàmònèku kaaba kènde kàdiye ùsanganyiiibwa, mònaayi, patùdi twakulangana apa ki kubiikilanganayè bwà kupàtuka mu Sodomà eku, mu cimenga cinyangakaja aci. Kàdi mpindyewu mònaayi cyòci eci mu *Reader's Digest*, Billy Graham ùvwa mushàale ne butekète bwà dikèma mu mùshindù wa kàciyiku nànsha mwà kwenza masangisha èndè to. Ne kumwambilabo ne bìvwa bikèngela kwikalayè ùnyeema lubilu, bwà kwibidija

mubidi, ne bikwàbò. Pa nàнку ùdi ùnyeema lubilu ntàntà wa kilòmèètà umwe ne citupà ku ditùkù, ngeela meeji ne mmwômò, anyi cintu kampànda, bwa kwìbidija mubidi.

⁹⁴ Muntu ùkaadi mubolè. Bukwàbantu bwònsò nkòòng bùkaadi bunyangùkàngàne. Byònsò bìdi ànu mwàkadìbi mu cikondo civwà cidyanjìdile cyà Noà amu. Bìdi menemene bitwisha katungu, bikùdimika, bishiilàngàne ne mulongo mululàme mùvwà Nzambi mubikùne awu. Mpèkaatù, kupicila ku maalu a mamanya ne diseeswisha, mmukònyàngàje bukwàbantu bwònsò nkòòng.

⁹⁵ Nuvwakù kàbìdì babalè lwà kwìnshì kwà kaabwalu aku, mùdiku kambè ne: “Mu matùkù aa, bânà bakesè bàà bakàji ne bàà balùmè abu bàkaadi mu cikondo cyàbò cyà bukùlumpè, bilondèshile diibakiibwa dyà mubidi, pankaci pàà bidimu makùmi àbìdì ne makùmi àbìdì ne bitaanu anyi?” Anji elàayi meeji pa bwalu abu.

⁹⁶ Mu dijingulula mu dilòòlò adi, mvwa mwangùle mwànà wa bakàji wa bidimu makùmi àbìdì ne bìbìdì, mu cipimu cyà kàciyi ùya ku mashi to, mémè kumubiikila bwà kulwayè. Ne ciinè aci ncìvwà ngàngàbukà wendè mumwambile’s.

⁹⁷ Nwamònu’s, cisà cyà dinyanguka cidishinde, cyà nsòmbelu wa kanyawù, ciikàle mu njila citangile mu ifernò. Ndi mumanyè ne aci cidi cyùmvwika kacyi cyà nsòmbelu wa bukàlàngà to, kàdi ncyà Bible, nwamònu’s, bwà ne ncilelèlà; ne cisà citùdì twètù basòmbèlemù eci, lukòngò lwà bantu elu.

⁹⁸ Mpindyewu mònaayi leelù ewu, bàsopakaja ngombe, bàsopakaja bikùnyiiibwa; ne maalu a mamanya àdi àlwa buludì paanyimà pààci, maalu à mamanya miinè àdi ènza nàнку awu, àmba ne: “Ki cidi cinyangakaja bukwàbantu bwònsò nkòòng ncyòci aci.” Nudi bacìbalè ànu mùndì mucibale pàànyì. Èè, kabèèna bàciimanyika bwà cinyi? Mbwalu kabèèna mwà kuciimanyika to. Dìyì dyà Nzambi’s ndidì dyambè ne neciikalè mùshindù awu. Kàdi bu ne bàvwakù mwà kwela meeji kakesè, bòbò’s ki byamù byà mudimu, bu Yudààsè Mpongoloki, bàteeka ànu menemene cintu citù Nzambi mwambè ne necyènzekè aci. Cidi cicyènza ànu menemene pa cishimikidi cyàbò bòbò biinè cyà maalu à mamanya aci.

⁹⁹ Ku bukèbikebi bwèndè bwà ku maalu a mamanya, mu citembelu cimwècimwè cyàkaseeswishàye naaci Evà aci, mmuseeswishe kàbìdì èkèleeziyà, uvwa Evà mwikàle cifwànyikijilu awu. Mpindyewu, mpindyewu Adàmà cifwànyikijilu mwaba awu kàbìdì, anyi, Evà’s wè, cyà èkèleeziyà, mònaayi cyàkenzàci. Ku dilalakana dyà wènda ùkèbangana ne dimanya, ùdi ùkafinunuka ùsambuka mukàlù pankaci pàà maalu mimpè ne maalu mabi, ku ditèèleja dyà dinyangakaja dyà Sàtaanà, anyi dikonyangala, dyà Dìyì dyà Nzambi dyà ku cibangidilu.

¹⁰⁰ Ne mpindyewu èkèleeziyà leelù ewu mmilwè mikònyangaja. Mpindyewu bāndi ngamba kí mbantu, bantu-nkààya to. Ndi ngaakula bwà cipaapu cyà èkèleeziyà. Ewu mmukònyangàja mu mùshindù kampànda, ne mukwàbò mu mukwàbò, ne, ku maalu à mamanya. Citembelu ànu cyòci cimwècimwè cyàkenzàye aci. Wàkumbaji mukànù wèndè, Sàtaanà awu's, wà Yeshàayi 14:12 awu.

¹⁰¹ Twānjàayi ànu kubala cyòci aci katanci kakesè cyanààna. Mu Mukànda wà Yeshàayi, tùbangilàayi ku nshapità wa 14, ku mvensà wa 12.

Mùshindù mwinè wùdi mukùlùke mu dyulu's, Éyi Lusifèrè wa yàaya, mwànà wa balùme wa lunkèèlù! Mùshindù mwinè wùdi mubyànkùdiibwe panshi, wèwè uwu mutekèshe matùnga awu!

Ewu n'Yeshàayi udi umumòna mu cikèèna-kumòna, nwamònu's, mu cikondo cìcilwalwà.

Bwalu wèwè udi mwambè munda mwà mwoyi wèbè ne: Nèmbandè mu dyulu, nènzangikè nkwasà wanyì wa butùmbi kumutù kwà mìtootò yà Nzambi: Nènkasòmbèlè kàbidi pa mukùnà wà disangisha, . . . nseke yà ku nord:

¹⁰² Kiipàcilà kàà Sàtaanà, kàà kacya ku Edènà aku, kàvwa nkàà kudyènzelayè wèndè Edènà wa sungasunga; ne kudizànjika yèyè mwinè kuulu, bwà mìtootò yà Nzambi yàmòna mwà kumukuukwila, bwà bānà bàà balùme bààmòna mwà kumukuukwila. Ne kakùyi mpatà to yèyè mmucikùmbàje patùdi twakulangana apa, ne piinè apu mpàkaadiye kwènzè cyòci eci ne mucibwèjè mu èkèleeziyà. Kàdi, mèmè ncyàkucisinsulula to. Yònsò wa kunùdi udi utèeleja mikàbà yà mèyi ayi mmumanyè bwalu bwàci. Adi—adi ki dībà menemene ditùdi ne mwoyi, ne Sàtaanà ngudi mucyènzèle ku ndongamu wa dilonga dyà tūlaasà, mutàmbe bwìmpè mukumbane, *cikampànda* citàmbe bwìmpè, ne *cikansanga* citàmbe bwìmpè. Kàdi kabàyi bamanyè, dībà dyònsò ne, bàdi munkaci mwà kwenda kubwela buludi mu lufù to. Bafofomija, biikàle bàlombola bampofò, balombodi bàà matùnga bafofomija, balombodi bàà maalu à mamanya bafofomija, balombodi bampofò bàà èkèleeziyà, bampofò bàlombola bampofò naabò. Yesù wàkamba ne: “Bàlekèlaayi, bùbidi bwàbò nebàdishindè mu mùkidi.”

¹⁰³ Mwab'ewu mònaayi cifwànyikijilu cyà Edènà yibidi ayi mifwànyikijiiibwe pāmwe, mu mùshindù wà mifwànyine kuseeswisha too ne Basungula mene. Maatàayi 24:24 mmwambè ne bìvwa mwà kwikala mùshindù awu. Kàdi ndi muswè bwà twimanèku katanci kakesè bwà kwelanganaku meeji pa miinè Edènà yibidi eyi, ne nangànangà cintu cimwèpelè, mùdi Bible útawàmbila ne Dìyi dyà Nzambi ndyàkapàtulà Edènà awu, ne

mùdi Díyì dyà Nzambì ditùdimwija ne mukwàbò Edènà awu ùvwa mwà kulwa.

¹⁰⁴ Mpindyewu, tudi kàbìdì bamanyè ne kùdi ne cyà kwikala mukwàbò Edènà, bu twètù kàbìdì mwà kutèeleja mupròfetà awu, Pòlò, mu Tesàlònìkà Mwibìdì ku nshapità mwi2 aku. Ndi mufwànyine kuMubala bu nwênù mwà kuswà nànkù.

Yèyè udi udizàngika yèyè mwinè awu; *ditùkù* adi *kadyàkulwa to*, dyà Mukalenge adi, pàdi *muntu wa mpèkaatù awu kàyi musokòlòdùbwe to*, . . .

. . .ewu udi musòmbe mu ntempèlù wa Nzambì, *udizàngika kumutù kwà cyònsò cidì cibùkidiibwà ne n'Nzambì aci*, bwà ne yèyè bu Nzambì àkuukwidiibwè bu Nzambì.

¹⁰⁵ Elààyibì meeji pa bwalu abu! Mpindyewu Yeshàayi 14, mupròfetà awu mmwambè ne wàkamòna “Lusifère, mu mwoyi wèndè,” ku cikèènà-kumòna ku disonsodiibwa dyà kùdi Nzambì, “wàmba ne yèyè ùvwa mwà kwenza cyôci aci.” Mu Yeshàayi, bidimu nkàmà mwandamukùlù kumpàlà kwà Pòlò, anyi bìipacila cyôci aci.

¹⁰⁶ Mpindyewu mwab'ewu, bidimu nkàmà mwamdakùlù bimanè kupita, Pòlò udi ùmumòna, ùfika pa kaaba kèndè aku. Mònaayi, ùdi ùlombola's, wèndè Edènà awu; Edènà wèndè wa maalu à mamanya awu, ne buloba bwèndè bwà maalu à mamanya abu, ne èkèleeziyà-mukàji-musèla wà maalu à mamanya, byònsò abi mwínshi mwà—mwà díyì dyà “dimanya,” sèminèrè minène, màpòlomè manène, ndongamu yà dilonga dyà tùlaasà.

¹⁰⁷ Tèelejàaku, mwanèètù wa balùme, mwanèètù wa bakàji, yònsò wa kutùdi neikalè mwà kwendela mu njila udi Florence mwendèle awu. Ndi nnùlombakù, mu Dìnà dyà Yesù, bwà nùtwekù Cyôci eci mushinga. Kì nkuntwà mèmè mushinga to. Mèmè ndi mwanèènù. Aci—aci kì ncidì ne bwalu to. Twàyì Díyì dindì ngamba mushinga, dyà mu Bible wa Nzambì edi. Ne nùtangilàayi too ne ku ndekeelu, cishìndikiibwe ànu menemene mu Díyì Sungasunga dyà Nzambì, mu cikondo citùdi ne mwoyi eci, mwaba wutùkaadi ewu.

¹⁰⁸ Kakùyì mpatà to ndongamu eyi mmifwilakanyi ne Kilistò, mu yòyi miinè. Mpindyewu, bidi bikèngela bwà kupetayè Edènà kampànda, yèyè ngudi mwambè ne ùvwa mwà kumupeta. S'ki Díyì dipwekèlè dyà Nzambì ndyòdi edi dyàmba ne yèyè ùvwa mwà kucyènza, ne ki twètù aba tutàngila ne tumumòna ùcyènza. Mmucyènzè ne mukàjèndè-musèla wa mamanya à mu mitù, wa ku maalu à mamanya, wa cyena-màngumba awu. Yèyè ki wíkala mwà kwangata bumfùmù, òmwè dyà ku matùkù aa, mu Nsangilu kampànda wa Maèkèleeziyà wa Buloba bujimà watèèkabò awu. Byònsò nebiikalè kùdiye yèyè.

109 Ûteeta bantu, kabìyi ne mbwalu mbantu babì to; bàvwa bakùnyìibwe mu dibùulà dilulàme adi, bu ditalà, kàdi Sàtaanà kumyaminayè bilàmbalàmba, bidibo bàbiikila ne mmaalu à mamanya, bukèbikebi, dilonga dyà tùlaasà, màpòlomè à bu-docteurs abi. Míngà misangu kabààkukwitabilakù ubànda mu cyambilu pawùdi kùyi mwà kuleeja dipòlomè dyà bu-docteur dyà ku sèminèrè wa ku mwaba kampànda to. Byònsò abi mbìbì! Kì mbantu to; ndongamu ngudi mubì. Kàdi mpindyewu ncyenzè cinyì? Byònsò abi mbilombòdiibwe cyàkàbìdi, ne bikafikishe buloba bujimà (ku musumbà wà disopakaja dyà mamiinu, dinyangakaja dyà Dimiinu dyà Nzambi dyà ku cibangidilu) ku cikwàbò cimvundù cinène cyà mîdimà.

110 Kàdi mèmè ndi ne disànkà dyàbúngi dyà mùdi Nzambi mutùvùlùkekù cyàkàbìdi twètù aba, bwa mùcidiYe ànu mwà kukwata mudimu munkaci mwà byònsò ebi. Yéyè mmulayè ne Ûvwa mwà kucyènza, ne kubìikila kasumbù kakesè kàa mìkòòkò kàvwa mwà kwikala Mukàj'Èndè-musèla.

111 Mònaayi cyàkàbìdi mpindyewu kaaba aka, mùdi èkèleeziyà eyi miikàle cifwànyikijilu cipwàngane, anyi Edènà eyi.

112 Nzambi, ku Dimiinu dyà Dìyi Dyèndè! Ne kùdi cintu ànu cimwèpelè cidiku mwà kufùlùlula Dìyi, n'Nyumà, bwalu Yéyè ki Mufidi wa Mwoyi kùdi Dìyi. Ne pàdi Mwoyi munda mwà Dìyi wùtwilangana ne Mwoyi wà Nyumà, Wùdi wùpàtula cyònsò cidi Dimiinu aci.

113 Mpindyewu monaayaaku cyàkenzekà. Mu budimi bwà Edènà mùvwa cibùcilu cyà Nzambi cyà butòòkè bwà munda, ne cyòci aci ki civwà cimwè cyà ku—ku bipungu. Cipungu cyà kumpàlà civwa cyà butòòkè bwà munda, bantu kabàvwa bamanyè mpèkaatù nànsha umwe to. Kabàvwa bamanyè kantu nànsha kàmwè pa bwalu bwà mpèkaatù to. Adàmà ne Evà bùbìdi bwàbò bàvwa butakà, kàdi bàvwa babàsokòka ku butakà bwàbò abu, kùdi cibwikilu cyà nyumà civwà kwisù kwàbò aci. Kabàvwakù bamanyè ne bàvwa butakà to, nànsha kakesè, bwalu bàvwa babàsokòka. Bwalu, cibwikilu cyà Nzambi mu meeji àbò sungasunga, kabàvwa bamanyè civwà maalu mimpè ne maalu mabì to. Nènku bònsò bàbìdi abu biimàne mwab'awu butakà, bìvwa bìleeja ne dimanya kadìvwa dyanji kulwa kùdìbo to, nwamònu's, dyà ne bàvwa butakà adi. Bùbìdi bwàbò bàvwa butakà kàdi kabàyi bacimanyè to.

114 Mpindyewu bu nwènù mwà kubuulula, bu nwènù mwà kuswà, anyi kucifùnda, mu Bwàkabuulwibwà, nshapità mwi3. Nyumà Mwìmpè mwikàle ùdyànji kwamba bwà cikondo cyà ndekeelu eci, wàmbila Cikondo cyà Èkèleeziyà wa Laòdikiyà wa Mpenta mu matùkù à ndekeelu, mMwambe ne: "Wèwè udi butakà, ne mpofo, kàdi kùyi mucimanyè to."

115 Ki Dimiinu dyà Nzambi ndyòdi adi, mwínshì mwà butòòkè bwà munda, kadìyikù dimanyè nànsha kakesè ne bàvwa butakà

to, mwînshì mwà cibwikilu cyà Nyumà Mwîmpè, cibàbwikile ku mpèkaatù.

¹¹⁶ Nènku mpindyewu mu cikondo cyà ndekeelu cyà èkèleeziyà, tudi tusangana apa ne bàdi cyàkàbìdì butakà, kàdi kabàyi bacìmanyè to. Kàdi kî ncibwikilu cyà Nyumà Mwîmpè nànsha. Ncibwikilu cìvwà Sàtaanà mubwikile Evà kwàka nàka aci, cibwikilu cyà dyalakana, cibwikilu cyà dyalakana. Mbakooyike ànu menemene mu mùshindù wà kabàyikù bamanyè ne bàdi butakà to, bakàjì bèètù mu mùsèèsù, bavwàle tùpùtulù, mvwàdilù wa ùsalulangana masandi.

¹¹⁷ Muntu kampànda mmuntùmìne kapesè kàà cibèjibeji ditùkù adi, kàà nkanzu mupyamùpyà wìkalabò mwà kuvwàla ewu, ngeela meeji, wa bule bwà sàntimètrè makùmi àsàtù ne yisambòmbò kuumukila mu cifùka, anyi cintu kampànda. Kàdi ndi ndìkonka ne bakàjì bèètù—bèètù aba bàdikù bàfika ku dyumvwa ne ncibwikilu cyà dyalakana anyi?

¹¹⁸ Mpindyewu wèwè—wèwè udi mufwànyine kwamba ne: “Mèmè ndi mwà kujaadika, kumpàlà kwà Nzambi ne, ndi ne butòòkè bwà munda pa bìdì bitàngilà masandi kùdì bàyaanyi, anyi ne ndi—ndi . . . byònsò ebi.”

¹¹⁹ Kadi nànsha nànkù, ku Cilumbulwidi, newikalè mwà kubùkidiibwa ne “ngèndààmàsàndì.” Bible ngudi mwambè nànkù. Yesù wàkamba ne: “Ewu yònsò ukàtàngidi muntu mukàjì bwà kumwalakana, wàmanyi kwenda nendè masandi munda mwà mwoyi wèndè.”

¹²⁰ “Mpofo, butakà, kàdi kàyi mucìmanyè to!” Kì mbakàjì bakesè bàdi bakwàte ne byà luse bàdi pambèlù pàapa bàba to; kakwèna cintu nànsha cìmwè cìndìku mbàlwisha naaci to. Mbubi abu! Ne ndongolwelu wa èkèleeziyà ngudi umwèka bu ne mmupangè kucìjingulula anyi kucìlwisha; bàbalekela bàbebula nsukì yàbò, bàdilaaba bilaabu byà kwìsù, ne bàvwala tùpùtulù ne bikwàbò byònsò, mu dìnà dyà bwena Kilistò. Cintu cibi kaayìpu’s wè! Nwamònu’s, bàdi cyàkàbìdì butakà, mu Edènà wa Sàtaanà, kàdi kabàyi bacìmanyè to. Kì mbacìmanyè to.

¹²¹ Ngeela meeji ne ndi mmòna, pàmwàpa, pàndì ntàngila kaaba aka apa, ciinà cyà màyi cyà dyowela, mùdì bakàjì abu mpindyewu. Mukàjì awu wìkalakù mufikè ku dyumvwa cìdiye wèza aci’s, kàdi kî mmucìmanyè to. Yèyè ùdi butakà. Mubidi wèndè’s mmunsantu. Ùdi ùvùla bilàmbà bìdì Nzambi mumuvwàdike, ne ciseba, bwà lukòngò elu. Ùdi ubikòsa dìbà dyònsò. Yèyè ùdi butakà, ku bwenzèji bwa mwakù ewu wà “dishidimuka, dilonga dyà kàlaasà ditàmbe kutùmbuka, dishidimuka ditàmbe bwîmpè, nsòmbelu wa bukàlàngà mutàmbe kutùmbuka.” Lekèlaayi ntwishiibwèku ne eci cidi cibwela mu ndòndò. Byònsò abi mbyà kùdì dyabulù, ne nebìbutudiibwè ku Dilwa dyà Mukalenge Yesù. Nebìbutudiibwè, kantu ne kantu. Kakwàkushààla kantu nànsha kàmwè to.

122 Kàdi, kaa, mulundà wanyì, mu ditùngà dijimà, panùdi munkaci mwà kuntèèlejila muneemu mu Phoenix emu apa, elànganaayi meeji pa bintu abi! Nudi pànwapa mwĩnshì mwà bukòokeshi bwàbì. Mpindyewu, Yesù wàkamba ne: “Bìwva mwà kuseeswisha Basungula bu ne bìwva mwà kwenzeka.”

123 Nyumà wa kumpàlà ùwva . . . cibwikilu cyà kumpàlà cìwva ncibwikilu cyà cijila, Nyumà Mwĩmpè, ne mukàjì kàwva ne cyà kutàngila pambèlù pàà Cyôci aci to. Kàdi pàà—pààkabangà Sàtaanà kwosha nendè muyiikì pa bìdì bìtàngilà dimanya, kukèngelabi ànu bwà yèyè kutàpakù kaadisù ku maalu à pa buloba.

124 Nèku aci ki cyôci menemene cidì mwanèndè wa bakàjì, èkèleeziyà, mwenzè. Bikèngela ùmonè, bikèngela ùwvalè mùdì mukàjàànà kampànda udi mwendè luumù wa mu nsèndemà awu, anyì bikèngela bwà nsongààlùmè yà bitende yènzè maalu bu Elvis Presley anyì—anyì bu Pat Boone, anyì—anyì mùdì bàmwè bàà ku bantu abu bènza, mu dìnà dyà ntèndeleeleu.

125 Pat Boone ngwa mu Église de Christ. Elvis Presley mmwena Mpenta. Bantu bàbìdì bavwijìibwe baadémons bàdì bakùpe bàà pa buloba mu cimvundù cinènè cyà citàmbe bubì kutàmbe mwàkenza Yudaàsè Mpongoloki ku ditungila dyà Yesù Kilistò. Bòbò kí mbacimanyè to. Nsongààlùmè ayi kí mmimanyè cyôci aci to. Ncyèna ne cintu nànsha cimwè cyà dilwisha naaci yôyi—yôyi nsongààlùmè ayi to, bòbò balùmè abu, nyumà awu ngudi ucyènzeja.

126 Anjàayi ànu kupìcila kakesè ku lwólò luseke alu, cìlambalàmbe aci cyànji kujìngila ànu kakesè cyanàànà cizubu cyà ditalà adi, musangu ànu wùmwe, kàdi ùtangilè cidì cyènzekà; ditalà adi's bwàdì mbutùùke. Kaa, èyowà's, s'cikaadi cimanè kumupyà. Nànku mùshindù awu ki wàcyènzàci. Necicyènzè musangu wònsò. Byàkakèngela bwà Evà kutàpayè ànu kaadisù cyanàànà ku maalu à pa buloba.

127 Nèku lekèlaayi nnwàmbilèku bwalu kampànda, wèwè mwanèètù wa balùmè ne wèwè mwanèètù wa bakàjì. Mu Yone wa Kumpàla, nshapità mwi2 ku mvensà wa 15, tudi mwà kuMubala panwìkalà baswè, Bible ùdì wàmbe ne:

. . . Twètù *banangè buloba*, anyì maalu à pa buloba, mbwalu *dinanga dyà* Nzambì *kadyèna* mene *munda* mwètù to.

128 Mpindyewu, mwakù wùdì mwaba awu awu kí *mbuloba* to; mmwakù wa mu cyena-Ngelikà, wùdì *kosmos*, wùdì wùmvwija ne “ndongolwelu wa bàà pa buloba.” Twètù tunanga myòdelè yà pa buloba, buloba, twètù tunanga nkwaaka wa ditùkù edì, twètù twela meeji ne “eci ncikondo cilenga be, kaa, tudi ne bintu byònsò ebi,” wèwè wela meeji nànku, mbwalu ngeelèlù webè wa meeji mmubi. Mmunyangakaja kùdì dyabùlù. “Bwalu wèwè munangè ndongolwelu wa bàà pa buloba, ne buloba

bùdiku mpindyewu ebu, mbwalu dinanga dyà Nzambi kadyèna mene munda mwèbè to.” Vùlukàayi aci. Èyi Nzambi wa yàaya! Tàngilàku kutùyaaya twètù batàngile’s wè!

129 Mwab’ewu ndi muswè kwimanakù ndambù bwà kunùlondela kaabwalu kakesè. Ngákumvwa muiishi kampànda wa mu bàsàlaayi wa mu Mvità yà Kumpàlà yà Buloba bujima. Bàvwa beelè. . .

130 Ànu mùvwà Sàtaanà ku cibangidilu, pàakabwelàye mu budimi bwà Edènà. Yèyè kàvwakù mwà kajuula Mamiinu awu to. Kàvwakù mwà kuàbùtula to. Kadi yèyè wàkaapwidijila mulungù, nènku wàkakònyangaja Dimiinu adi, kadyàkavulangana bilondeshile mùshindù wàdi mujalame to. Wàkakònyangaja Dimiinu dyà ku cibangidilu.

131 Nènku ki cidì ndongamu yònsò yà ntèndeleele eyi. Bàdi ànu bàna bàà balùmè ne bàà bakàji bàà Nzambi, kàdi mbakònyangaja. Bàdi bàya mu èkèleeziyà, bàjinga kwenza cidì cijaalàme. Mudyàmbike mukaji kàtukù ùbwela mu cisòmbedi cyà badyàmbike bwà kwikalayè mukàji wa lwonji to. Mwambi kàtu ùlonga kàlaasà ànu bwà kwikala mu—mu—muntu mubì to. Wèwè kùtukù ukashàala wa mu èkèleeziyà, ne ulabulangana ku cyanza, ufùndisha dìnà dyèbè mu mukànda, anyi cyònsò cyùtù wenza mu èkèleeziyà webè aci, bwà kwikala muntu mubì to. Udi ubyènza mbwà kwikala muntu mwimpè. Kàdi diseeswisha, dikònyangala adi ndidi dicyènza. Sàtaanà ngudi mudipwidijè. Nwamònu anyi? Kacya Nzambi kàtukù mwenzè bulongolodi nànsha. Kakùtukù cintu bu nànkù cisanganyiibwa mwaba nànsha wùmwè mu Mèyi à Nzambi to.

132 Nzambi ki bwètù bulongolodi, twètù tudi balongolwela mu Yèyè, Mubidi, mu Nzambi, mu Dyulu. Ncyà bushùwà. Mènà ètù adi mu Mukànda wà Mwoyi wà Mwànà wa mùkòòkò. Mònaayi.

133 Kàdi, nwamònu’s, ndi mumanyè ne mbicolè menemene, kàdi ndi—ndi muswè bwà nwènù kutwàlakù ànu bwà katancì kakesè cyanàana bu nwènù mwà kuswà. Mu cikondo cyà mvità yà buloba bujima. . . Mfwilaayikù luse bwà mùndi museesùke ku cyena-bwalu cyanyi.

134 Kàdi bwà kutòokèsha bwalu ebu, mvwa—mvwa muswè kunùpèeshakù ditaata dyànyì mèmè dyà cidì Sàtaanà mwenzè mu Edènà: mupwidijè mulungù mubì be. Nudikù baswè kumanya ne cìvwayè mupwidijè aci ncinyì anyi? Mèmè ndi mwà kunwàmbila. Ndi ne dìnà dyàci, mèyi àbìdi: bupidyà, cidì cibèngàngàne ne diitabuujà, yèyè wàkapwidijà bupidyà, mpatà. Ne maalù à mamanya ngàdi mùje kaaba kàaci. Mwaba wùdi disòsò awu, ki wùdici cibwelèle mu Dimiinu, Sàtaanà mmùje disòsò adi ne dimanya ne maalù à mamanya ne dishidimuka, nènku ncikònyàngàje bufùki bujima bwà Nzambi, bwònsò nkòong.

¹³⁵ Ndi mumanyè ne nudi nwela meeji ne ndi munkaci mwà kwenda kunùsàka ku ndekeelu kwà ditàmbà, kàdi mèmè's ndi neenù pa dyòdi ditàmbà adi. Ne tudi bônso kaaba aka mbwà kuteeta bwà kupeta ne citùdi mwà kwenza ncinganyì. Katwèna twamba maalu aa bwà kwikala bapangàkàne to. Tudi ne cyà kwikala ne meeji matòòke.

¹³⁶ Twètù, muntu ne muntu, tuyààya too ne ku ndekeelu kwà njila, kutwikalà ne cyà kulumbulula bwà díyì ne díyì dyónsò. Mpindyewu mene, tudi bamanyè ne mèyì ètù... Patùdi tulediibwa, kaamwadi kèètù kakesè kàà kumpàla aku kàdi kàya kónsò pa mukàbà kampànda wa mèyì. Nebàwèlè cyàkàbìdi ku Ditùkù dyà Cilumbulwidi. Nànsha mene bilàmbà byùdi uvwàle nebileejiibwè kumpàlà kwèbè, mu Ditùkù dyà Cilumbulwidi. Nànsha maalu à mamanya mene mmajandùle cyòci aci, ku mùshindù wà ntèlèviziyò. Nwamònu's, ntèlèviziyò awu kàtu ùkwàtakaja cimfwànyì to, ùdi yèyè ànu ùcipicishila mu kajila kampànda. Diikala dyà bilàmbà, musangu wónsò wùdi unyungakana, meeji ónsò àdi mu mutù wèbè awu, kakùyì mpatà to mbilamiibwe pa mukàbà wà mèyì wà Nzambì. Nènku cintu cinène aci neciteekiibwè ànu kumpàlà kwèbè mene, yónsò wa ku nkanzu mikooyike yúvwà uvwàle ayi; musangu wónsò wùdi muyè kwà mulongolodi wa nsukì awu, mukakòsèshe nsukì yìdi Nzambì mukupèèshe ayi. Neciikalèku. Wèwè's neùlumbululè bwà bwalu bwàci. Kwènàku mwà kunyungakana mwaba awu mene, nànsha mene meeji a munda mwà mwoyi wèbè paùdi uèla apu, nebàèlè ànu kumpàlà kwebe aku mene. Neùpandukè bishi's? "Netùpandukè bishi patwikalà balèngùlùle lupàndù bunène nùnkù?" Nwamònu anyi? Katwàkupàndukakù to. Dinyungakana dyónsò, ne meeji a munda mwà mwoyi, bìdi ànu bìkwàciibwa pa mukàbà mu cipaapu cikwàbò, nànsha diikala dyà bilàmbà byùdi uvwàle. Ntèlèviziyò, ntèlèviziyò wa meekala ùdi ùcijaadika patòòke, ùdi ùcikoka ne ùcileeja, nwamònu's, nènku cyòci aci cidi ànu mu cipaapu cimwèpelè ku luseka lwà bìsàtù bitùdi basòmbèle ebi. Nwamònu anyi?

¹³⁷ Mpindyewu mùshindù mwinè wùdi mulùngù awu mukalengè èkèleeziyà, mukalengè buloba's! Mulùngù wà Sàtaanà awu pa Mamiinu, mmutùbùle masòsò mu dimiinu ne mwenzè ne diikalè dikònyàngàle. Ànu nànkù ànu nànkù, yèyè ùdi ùpweka ya ndòndò menemene wa myoyi yà maèkèleeziyà, ne mu myoyi yà bantu ne bikwàbò byónsò, maalu à mamanya, maalu a mamanya. Too ne mwàlubi kufika ku ne bukwàbantu, ku diikala basòpàkàjiibwe... Ndi ngeela meeji ne bìvwà bìkèngela bwà dimiinu ne dimiinu dyónsò kuvulanganadi bilondèshile mùshindù wàdi. Nènku bukwàbantu, ne bikùnyiiibwà, ne byónsò abi bisopàkàjiibwe, mbitùfikìshe mu mwaba kampànda; mu kudya kwà byàkudya byètù bìdi bifùma ku buloba ebi, mbyenzè ne, mibidi yètù, yikaadi misopàkàjiibwe, bikaadi bivwijè meeji ètù ónsò... Mpindyewu, piikalàbi ne mibidi yètù yikaadi

yipuutuka, kubangila patùdi ne bidimu makùmi àbìdì too ne ku makùmi àbìdì ne bitaanu, bwà tubùlù twà mashi twatùke, bwà byàkudyà bisopakaja, tubùlù twà mashi twà bwongò bwètù kî ntwatùke anyi? Tubùlù twà mashi atu, kî ntwatùke pààtù anyi? S'ki bwà cinyi Ricky ùdì wènda ùnyeemakana eku ne eku mu mùsèsù emu, ne kàshinyi kèndè kàà kapelu aku; pàdì Ricketta, tu-Elvitta, ne bààbùngì bàà kùdìbo, mutùdì bafwànyìne kubàbiikila's, pambèlu apa bavwàle bu bàdì kabàyi bavwàle kumpàlà kwà bantu, lungènyi lumanè kubàjika, kabàcìyi ne mmwènenenu wa nsòmbelu yà kaneemu anyi nsòmbelu milenga to.

¹³⁸ Tùyaayi ku kaabwalu kàànyi kakesè aku. Muiishi wa mu bàsàlaayi ewu kwambayè ne ùvwa muyè mu lùpitaadi, ne kwambayè ne mùvwa nsongàalumè bùngì cyanààna milàadika mu ntentà, yimwè... Yèyè ùcivwa ùfuminakù pambèlu. Yèyè ne wàkaya kuntwaku, ki munène kampànda wa bukòokeshi wa bàsàlaayi kumwambilayè, wamba ne: "Muyiishi, tudi baswè kupàtukakù ne màshinyi, kwa kutàpakù dísù mu mpàta pambèlu pàapa." Bàvwa beelè gaz wa mùtáda ne wa chlore ewu, mùvwàbo bènga mu miinè matùkù awu.

¹³⁹ Ki yèyè ne: "Mémè kupàtuka pambèlu apu, Mwanèètù Branham," yèyè ne, "kakùvwakù cizubu ku mucì to, kakùvwakù kushààle kasoosa to. Mùvwa mmu dindà dyà Paasàkà." Yèyè ne: "Kùvwa ndambù wa tutùmbà twà mvità tunyangùke kuntwaku, bìvwa bikèngela bwà munène wa bukòokeshi wa bàsàlaayi awu kufùndayè bùngì bwàtù, ne kumònayè ní kùvwakù cintu kampànda cyà kwenzabò bwà twòtò atu, pabwìpi ne Diitu dinèndè dyà Argonne adi." Yèyè ne: "Pàmvwà mwimàne nkààyaanyi mwab'awu apu," yèyè ne, "dyà ntùpula mèsù, mémè ne: 'Èyi Nzambi wa yààya, s'ki kwàfikàbì byònsò eku's.'" Ncyà bushùwà, kwòkò aku ki kwàfikàbì byònsò. Byònsò bìvwa bibùtùke butubutu, kakùyi mwoyi mwaba nànsha wùmwè, mashinda ònsò mwoshìke; mucì, ku gaz ayi, micì mishebeya, byònsò bìvwa bishebeya, bikònyangaja, bilembèlèlè, myaba yìvwà màzaji ne bikwàbò biyitùbùle masòsò masòsò ayi.

¹⁴⁰ Aci cyòcì kacìyi cimfwànyì cyà buloba leelù ewu to, mùdì Sàtaanà munkaci mwà kupwìdija bupidyà bwèndè, disòpakaja dyèndè, maalu èndè à mamanya, dimanya dyèndè! Mu mùshindù wà ne, cìvwàku ku cibangdilu aci, pàvwà Nzambi mutèèke Adàmà ne Evà mu budimi amu apu, mpàlàdiizò mulenga wa kàyi ne lufù awu, kàyi dísàamà, kàyi tunyinganyinga awu, ne byònsò ànu mu bulongàme bupwàngàne, tàngilàayi cidì bwanga bwà DDT bwa Sàtaanà abu bwènzè! Buloba's bùkaadi cimvundù cinène. Kakùcyèna cidì cishààlemù nànsha cimwè to.

¹⁴¹ Kwambayè ne: "Mémè kwasa mwadi. Mémè kwalukila cyànyimà, ntèmà yànyì kukòkiibwayì kùdì dibwe kampànda." Yèyè ne: "Mémè kuseemena ànu kuntwaku ne kutàngila dibwe adi, kuditònkola. Mwinshi mwà dibwe adi mùvwa kaacilòngò

kakesè katòòke kiikàle kàtòloka, kantu kàmwèpelè kàvwà ne mwoyi kàvwàku kashààle, bwalu bàvwa bakàbwikile kùdi dibwe.”

¹⁴² Nzambì, Lubwebwe lwànyì, watùbwikilakù leelù ewu’s, Éyì Nzambì wa yààyà, pàdi milùngù eyi yibùùka myaba yònsò mu dìnà dyà maalu à mamanya ne dilonga dyà tùlaasà apa. Útùbwikilèku. Ùndamèku too ne ku diinè ditùkù adi, Éyì Nzambì, ki disambila dyànyì. Mpindyewu ndi ntèkemenakù ne twètù, muntu ne muntu, tudi mwínshì mwà Lubwebwe alu, Kilistò.

¹⁴³ Ndi mufùme ku diyiisha ditùkù adi, bààbùngì bàà kunùdi bàvwa bacyùmvwè. Mvwa ngenda nkòsolwela mu diitu, ngenda ndemba nyama, ki mèmè kukòkiibwa ntèmà bwà mèmè kukènzakana. Dyà ntàngila, kùvwa mwaba awu cizubu anyì dibùki dyà mfwankà dyà munda mutupù, anyì munùdi nucibiikila amu. Nènku cidi nnkùmpànyì, ncyèna ndyùmvwà ne bìvwa binkèngela kutèèla dìnà dyèndè to, kàdi kùmpànyì wa mfwankà awu ùvwa ne . . . bàdi ne cikèmù cyà ne: “Kataacilu kàà muntu udi wela meeji, mwenya wà muntu munù wa mfwankà.”

¹⁴⁴ Mèmè kutungunuka ngenda mpweka nda—ndambù kumpàla mu diitu amu, kàdi Cintu kampàndà kunkòkaci ntèmà ne: “Alùkìlè ku dibùki dyà mfwankà adi.”

¹⁴⁵ Mèmè kudyàmbidila ne: “Taatu wa mu Dyulu, mèmè’s ndi ngenda nya ku mucì wàwa kùvwà Wèwè mwambè dīyì nshìndì kufukiibwayi aku, mu dindà kampànda. Bwà cinyi Udi ungaaluja?”

¹⁴⁶ Ki Cintu kampàndà kwambaci ne: “S’udi ne diyiisha kumpàlà eku bwà mu dyàlumingu. Cyena-bwalu cyèbè’s ncifùndapù.”

Mèmè kudyàmbidila ne: “Pa dibùki dyà mfwankà?” Mèmè kwalukila.

¹⁴⁷ Ki mèmè kubanga kudyàmbidila ne: “Kataacilu kàà muntu udi wela meeji,” ndiseeswishangana kaayi dyàdya’s wè! Muntu yèyè mwikàle muntu udi wela meeji, kàvwaku mwà kunwa mfwankà to nànsha kakesè. Kàdi, nudi numòna’s, bantu bòbò bàdi bàpwiita ciinè aci’s.

¹⁴⁸ Ngeela meeji ne kùkaadi bidimu bìbìdi, pàmvwà nsanganyibwa mu umwe wa ku mpungilu, mvwa muyè ku cisalu cyà cinsangànsàngà cyà buloba bujimà pààkenzekàci ku Côte Ouest kwàka. Nènku bàvwa ne fòtò wa Yul Brynner ne yàbùngì mikwàbo kuntwaku. Nènku beena maalu à mamanya, bààbùngì, bàvwa bàsanganyibwa mu cibambalu cyalàbàlè cimwè, bwà bwalu bwà njiwù yà dìnà dyà mfwankà. Mùshindù wàkakòkelabo mwìshì awu lwà pa kapese kampànda kàà mààbì, ne kwangatabo kaalusongo kakesè kàà ndànda ne bàngacilakù bulùngù bwà mfwankà ne kubwèlabo mpùku pa mwongo, kàdi kumwela mu nsànji, munda mwà matùkù mwandamutekètè

mpùku awu ùvwa muneka kùdì kànsèrè mu mùshindù wa kàciyiku mwà kwenda to. Nwamònu anyi? Kwambayè... Kubùkòkelabò mu mâyi.

Kwambabò ne: “Kataacilu!”

¹⁴⁹ Bòbò ne: “Kataacilu? Cintu bu nàнку kacitukù to.” Bòbò ne: “Wèwè...” Mpindyewu, aba’s mbeena maalu à mamanya bòbò nkààyaabò. Bòbò ne: “Kwèna mwà kupeta mwishi kùyi ne bulùngù to. Bulùngù’s mbùdì bwènta mwîshì.”

¹⁵⁰ Nènku cintu cimwèpelè cidici, ndiyelè bwà kusùmbishabò mfwankà yàbùngì, pàdì aci...Pùikalà...Ncyèna ntèkemena ne nudi nwela meeji ne ndi munyangakaji wa cijila anyi mukoleshi wa maalu to. Démon awu munda mwà muntu, udi umufikisha ku dinwà dyà mfwankà awu, mbwà kudishebeyayè yèyè mwinè. Pàdiye yèyè—yèyè muswè kupeta bulùngù bwà mucì wà mfwankà wùmwèpelè, aci’s cidi cikumbaja dijinga dyèndè adi, kàdi mpindyewu kùmpànyi awu ùdi unyunguluka ùlwa ne diyelè dyà diseeswishangana naadi edi, wàmba ne: “Kataacilu kàà muntu udi wela meeji.” S’nebikengelè bwà kunwàye micì yà mfwankà yìnaayi anyi yìtaanu, bwà kukùmbaja bùngì bwà bulùngù mu wèwè (bwà kumumana nyòòtà’s) mùvwà wenza ne mucì wùmwèpelè amu. Beena Àmèrikè bàdi munkaci mwà kusùmbisha lufù kùdì bàna bàabò bàà balùme ne bàà bakàjì’s! Mèmè’s mbimpicile.

¹⁵¹ Kàdi pààbì’s, mwômò amu, mèmè kudyàmbidila ne: “Kùdì Kataacilu kàà muntu udi wela meeji kàdi kajaalàme.”

¹⁵² Mpindyewu, bu muntu mwà kwikala ùnwa mfwankà, vùlukààyi ne, cidi cìfila mwenya wà muntu munù wa mfwankà. Pashìishe, wèwè kùyi mwà kupeta dijin-...kumana nyòòtà yà dinwà dyà mfwankà too ne paùdì upetamù mwishi, ùpeta... bìdì bìkèngela bwà cìfilè mwenya awu, pa nàнку, udi unwà micì yà mfwankà yìnaayi, anyi yìtaanu, uyitùùdila mfrangà yàbùngì, mipìte yà wèwè munwè ànu mucì wùmwèpelè cyanààna wà cìibidilu ewu. Nwamònu’s, cintu’s ndiyelè, diyelè dyà kusùmbisha naadi; bàseeswisha bantu, beena Àmèrikè aba’s. Pàndì ngeela meeji bwà Valley Forge, bwà George Washington; mwikàle ne byà bisàtù bibidì byà bàsàlaayi bèndè, kabàyi ne bisàbaata ku makàsà to, mu ditùkù dyà mashika adi, bwà kutwenzela twètù aba cibùcilu citùdì tutùnkà nààci eci! Kàdi pashìishe beena Àmèrikè bàsùmbisha mwena Àmèrikè naabo, mwanààbò wa balùme ne mwanààbò wa bakàjì, lufù, ku diyelè dyà mafi, bwà kupeta mfrangà mibì yà bukooyà, muji wà bubì bwònsò. Lukùkà, dinanga dyà mfrangà. Cintu mu kaabujimà cyàpeci mukupa, kabàyikù bamanyè ne cintu cyònsò eci mu kaabujimà necibutukè to! Kàdi wèwè kùyi mupetè mwishi nànsha mukesè to, kwèna mwà kuumvwa mwenya awu to.

¹⁵³ Pashìishe mèmè kudyàmbidila ne: “Kùdikù Kataacilu kàà muntu udi wela meeji.” Kataacilu kàà muntu udi wela meeji!

Ki mèmè kwangacila cyena-bwalu cyànyì ku ne “Kataacilu kàà muntu udi wela meeji kàdi kàfila mwenya wà muntu wa cijila.”

¹⁵⁴ Ki mèmè kudyãmbidila ne màngumba ètù mmenzè nàнку bikolè, bàbwejamù bantu ne badibiikila mùdìbo beena Kilistò bàdi ànu bàà mùshindù kanà wònsò. Bwà cinyì? Bàdi bàbàpeta bapite bùngì mu dīgumba dyàbò anyì mu malongolodi àbò. Tudi tubàpetamù bapite bùngì bwalu tudi tubàlekela bàbwelela ku *cikampànda*, *cikansanga*, ne *cikankènga*, ne ku cintu cyònsò nàka. “Aci kacyèna ne cìdici cìshintulula to, pàdiye ànu ùfùnda dìnà dyèndè mu mukàndà ne wàmba mudiyè mwena Kilistò. Kwàjiki. Kaa, ‘ku diitabuuja nkunùdi basùngìdiibwe.’ Bùdi naabù mbwà kwitabuuja.” Dyabulu’s ùtu wènzà cintu cìmwècìmwè aci. Èyowà’s.

¹⁵⁵ Bidi bìkèngela ùlediibwè cyàkàbìdi, ne aci cìdi cìpicila mu Kataacilu kàà Nzambi! Mpindyewu, kùdi Kataacilu kàà muntu udi wela meeji. Nyewù ndi muKàkwàte mu cyanza cyànyì emu. Kakààkutwàlakù mwenya wà cyena-màngumba to, kàdi ncyà bushùwà neKàmanè nyòòtá yà muntu wa cijila, nudi bamanyè’s.

¹⁵⁶ Mmunyì mùdìku mukàji wa nsuki mibebula mufwànyine kupicila mu kiinè Kataacilu aka’s? Mmunyì mùdìku mukàji muvwàle kàpùtulù mufwànyine kupicilaMù, anyì muvwàle mùpanù, pàdi Bible wàmba ne: “Ncinyangu ku mèsù kwà Nzambi, bwà muntu mukàji kuvwàlayè mene civwàlù cìdi cìkùmbànyine muntu mulùme”? Ne mmunyì mùdìku muntu mulùme udi uditwaku musinga, mufwànyine kupàtuka apa ne kuvwàla bilàmbà bu bantu bakàji, ùlekela nsuki yileepa bu ya muntu mukàji, mimupwekèle mwísù, ne mwalala wà nsuki, ne mivùnga mùshindù ewu? Yèyè’s mmuvwàle bilàmbà byà mwìnshì byà mukajèndè. Mukajèndè mmuvwàle bilàmbà byà pamutù byà bàyèndè. Kataacilu kàà muntu udi wela meeji? Mulùme udi wela meeji kààkwenzakù aci to, anyì mukàji udi wela meeji kààkucyenzakù to. Dìyì dyà Nzambi kadyàkucipicishakù to.

¹⁵⁷ Kakwènàkù cintu nànsha cìmwè cìdi cìfwànyine kupicila mu Dìyì adi to. Awu n’Nyumà Mwìmpè, ne Yèyè ùdi ùbweja Dìyì munda mwèbè, ne Yèyè ùdi ùfla mwenya wà muntu wa cijila.

¹⁵⁸ Tàngilàayi leelù ewu, Ricketta mu mùsèèsù, mulènga, ne mubidi mulènga kumòna wùdi Nzambi mumupèeshe awu, kàdi Sàtaanà ùkwàta naawù mudimu’s. Ne ùdi ùvwàla mvwàdilu wa masandi, kàyi mumanyèku ne mu lumingu lùmwè kuumukila ku leelù ewu yèyè ùdi mwà kwikala munkaci mwà kubola mu majambu to.

¹⁵⁹ Mvwà ngenda mpweka ne mùsèèsù mwab’ewu ànu àbìdi àdi panshì aa. Mvwa nyiisha ku mpungilu kampànda mu Assemblées de Dieu lwà ku Côte Ouest kwàka, mu disangisha kampànda ku Cìlongelu cyà Bible cyà ku Sud Ouest kwàka. Inàbànzà mutekète kampànda wènda ùpweka ne njila, twà tukesè atu’s. . . muvwàle tulàmbà tukesè atu, tuubikini’s, mwònsò munùdi

nutùbiikila amu, ne luzemba lulembèlè, mwase cifulu ne bikumbà byà ba-kobòòyi. Mémè mvwa ngenda mbànda ne njila. Mémè kudyàmbidila ne: “Kakwàcikwètù kakwàte ne byà luse, mwànà wetù ewu mulelangana nendè kùdi maamù kampànda ne taatù, uvwa mutèèkìibwe pànwapa apa bwà kwikala mwànà wa bakàji wa Nzambi, kàdi mulwè cìshì cyà ku ndòbò cyà dyabùlù kutèyanganayè naaci.” Mémè kudyàmbidila ne: “Ngeela meeji ne nènkuDIMUKÈ ngààlukilè, bwà ngàmbilèku mwànà wàwa.” Úvwa ùmwèka wa mulongo wùmwè ne Sarah wanyi wàwa, bidimu dikùmi ne mwandamutekète, bidimu dikùmi ne bisambòmbò, anyi cintu kampànda. Mémè kudyàmbidila ne: “Bwàlà, nkwepi kungààlwa kubooya dipondo. Nénye ànu kuntweku mu njila emu nkamusambidilè. Muntu yéyè mummòne ngiimana nyiikila nendè, mbîmpè ncìcyènjì to.”

¹⁶⁰ Mpindyewu, kàdi tèelejààyi, nwènù bânà bàà balùmè bàà Nzambi, nudi nubwela mu mwaba wà bwena awu, ba-Izàbèlà bàà leelù ewu aba banùlaabidila, kàdi mulùme udi wela meeji neànji kwela meeji dyàmbedi. Mukàji udi mwà kwikala mulènga kwìsù, bifwànyne kwikala byà ne “Ndi mufwànyìnekù kutwà nendè mùsa,” kàdi’s necikujìmìjijè musùukà wèbè, wèwè mulùmyàna; bàmwè bàà kunùdi nwènù nsongààkàjì, kùdi ba-Rickys aba! Kataacilu kàà muntu udi wela meeji kàdi kàfila mwenya wà muntu wa cijila.

¹⁶¹ Nwènù balùme bàkaadi basèlàngàne, panùdi numòna bakàji abu mu mùsèèsù mùshindù awu, nwènù bânà bàà balùmè bàà Nzambi, kanwènaayikù nufika ku dimanya cyàkenzekà ku cibangidilu menemene aci anyi? Pàvwà maalu à mamanya mavwijè bakàji balenga menemene mu cikondo cìvwà cidyanjìdile mvùlà yà Noà, mu mùshindù wà ne bânà bàà balùmè bàà Nzambi bàakangata bânà bàà bakàji bàà bantu (kì mbânà bàà bakàji bàà Nzambi to), ne Nzambi kàtu mucipwekù mwoyi nànsha. Bòbò bàakanyanga cintu cyònsò nkòòng; maalu à mamanya’s, batàmbe kulengela. Kale wàwa bivwa ne. . . Panùdi numòna bulenga bwà bakàji bwènda búbànda cipidi mu matùkù à ndekeelu, s’ncimanyinu cyà nshìikidilu; Nzambi’s wàcìjaadiki. Pa nànkù, kwàta mudimu ne Kataacilu kàà muntu udi wela meeji, neupètè mwenya wà muntu wa cijila. Necikujìmìjijè dìkù dyèbè. Necikujìmìjijè mudimu wèbè. Necikujìmìjijè byònsò byùdi naabi; pa kuumusha abi, musùukà wèbè’s! Necipandakajè dìkù dyèbè. Bidi mwà kwenzeka ne mukwàbò mulùme àkoleshè bânà bèbè, anyi mukwàbò mukàji àkoleshè bânà bèbè.

¹⁶² Angàtà Kataacilu kàà muntu udi wela meeji, nekàfilè mwenya wà mukàji wa cijila. Paùdi wasa lwendu mutàngile kwà mukòshanganyi wa nsuki, anyi cintu kampànda cikwabo, ne bòbò bàkwambile ne: “Wèwè’s neupètè disaamà dyà mutù, udi mumanyè’s.” Angàtà Kataacilu kàà muntu udi wela meeji, cidi Bible mwambè aci, wamònu’s, pashìishe ucibèngè. Wamònu anyi? Kùcyènjìku to.

163 Mémè ndi mwanèènù, ne ndi munùangè. Ncyèna neenù ne bwalu to. Nzambi mmumanyè. Ne cyòci aci ncidi cìmfikishà ku dyamba bintu bìndi ngamba ebi, mbwà bwalu bwà—bwà dinanga dyà Nzambi bwènù nwènù. Bu muntu mwà kupátuka kàdi kàyi ùkwambila to, mpaasàtà webè ùkulekela musòmbe mwaba awu mwikàle wenza maalu mùshindù awu, kî mmukunangè to. Yèyè kèna mwà kukunanga to. Mémè ncyènakú mufwànyine kuswà dinanga dyà mùshindù awu bwà bakàji to. Mémè ntu muswè kwikala ne mwenya wà cijila bwà mwanèètù wa bakàji. Ndi muswè bwà ikalè menemene mwanèètù wa bakàji. Kaciyi cidi muntu kampàndà mwà kwamba, cidi muntu kampàndà wàmba bwà mwanèètù wa bakàji awu mùdiye mulenga wa dikèma ne mùshindù wùdiye, ne baakaayòwa-wabayombò abu ne: “Yèyè awu ùtu ùkùmbangana ne wanyì. . .” Huh-huh. To. Mémè ndi muswè bwà kwikalayè inàbànzá!

164 Éyi Mukalenge, ndamèku mwînshì mwà Lubwebwe alu. Éyowà's. Mu Efèsò 5:26, mùshindù wùmwpèlè wùdiku mwà kupicila mu lwòlò Lubwebwe alu, ngwà ne: “Musukula kùdi màyi à ditàpulula ku Diyì.” Ncyà bushùwà.

165 Mpindyewu, kùlekedikù démon ewu ùkupwidijila dilonga dyèndè dyà tùlaasà adi to. To, to. Nedishipè bwenzeji bwèbè. Kùlekedikù dyabùlù wàngata aci to ne: “Èè, mémè's ndi wa mu èkèleeziyà mùvwà wanyì mààmù amu, mùvwà wanyì tààtù, mùvwà wanyì kaakù mukàji.” Kùlekedikù dyabùlù ùkupwidijila aci to. Bible ùkaadi mumanè kwamba, pa Bikondo Mwandamutekètè byà Èkèleeziyà, ne bikwàbò abi ne, byònsò abi bikaadi bipangile bwalu! Ncyà bushùwà. Cintu cyònsò nkòong cikaadi cibolè. Cintu cyònsò nkòong cikaadi mputà mibolè. Kùmulekèdiku ùkupwidijilabi to, wàmba ne: “Èè, nnsòmbelu wa bukàlàngà mutàmbe kutùmbuka. Tukàadi balongè tùlaasà kutàmbe mutùvwà mu matùkù à kale awu's.” Kùlekedikù dyabùlù ùkwela abi pambidi nànsha. Nkàadi munùleejè ndongamu wendè wa dishidimuka awu mu kaabujimà, wa dilonga dyà tùlaasà ne maalu à mamanya awu. Mmumubwejè buludi mu èkèleeziyà, nènku kùmutèèlejìkù to. Umùshà mutù webè mu ntèlèviziyo mibolè yà kale ayi ne bikwàbò!

166 Nènku mutù wètù wà mwandà wùdi wàmba ne: “Kanùdifwànyikijìkù, kàdi ikàlaayi nwènù bashintùlùke.” Kî nkubwelamu kàdi kwamba ne: “Mvwa mushindìkùbwe, mu dyàlumingu amu.” To. Bwelàmu kàdi ùshintulukè mpindyewu mene, mushintùlùke muumùke ku cyùdi aci, muyè ku cidi Nzambi muswè bwà wèwè kwikala.

167 Mpindyewu, mbilààle ku mùshindù wà dimiinu didi munda mwèbè. Piikalà dimiinu dyà mamanya à mu mutù, dyà dilonga dyà tùlaasà ndidi ditèèkùbwe munda mwèbè, kùdi cintu ànu cìmwèpèlè cididi mwà kwenza, nkukukònyangaja, kwàjiki, kuumusha ku diikala mwànà wa balùme anyì wa bakàji wa Nzambi. Ki cintu cìmwèpèlè cidici mwà kwenza. Bantu leelù

ewu, pândi mêmè ntàngila pambèlu, bàdi benza maalu ànu bu ne kabèènakù bìitabuuja ne kùdikù Nzambi kampànda to.

168 Nwamfwilaayikù luse bwà cyakwidi eci. Muntu yèyè mutàpìke ku mwoyi kùdi cyòci eci, kí ncìndi ncyàmbila to. Kwènjì ndambù wa maadyàlumingu kùmvwà mubiikidìibwe, kùdi mwanàanyi mulela wa bakàji, bwà ndwe kubandila ndongamu wa ntèlèviziyô ne kubandila ngimbilù wa misambu yà batèdeleedi. Wùtu wènzeka mu dyàlumingu mu dindà. Mvwa mêmè muswè kutèleja Oral Roberts mu ndongamu wendè, mùmvwà mubàmbile bwà kummanyishabò. Kwambayè ne: “Tèèlejàbi eci, eci’s mmuyenga mulenga wà dikèma.” Mwanàanyi wa balùme mwimàne mwaba awu’s, ùcingambila, yèyè pèndè. Kì mêmè kukàngula ndongamu awu . . .

169 Tutu tufucila kwà mukàji kampànda udi ne ntèlèviziyô mu nzùbù mwèndè. Mêmè ncítukù ne meeji a kwikala nendè mwànyì mu nzùbu to. To, mukalenge. Mêmè ncítu muswè cintàkanyì aci mu nzùbù mwànyì to. Ndi mufwànyine kucitàayisha ne cingoma cyànyì aci. Ncyèna muswè kwikala ne cyà dyanza ne cintàkanyì cibi aci to. To, mukalenge! Kàdi kwangata . . .

170 Ngǎnjì nnwǎmbilèku nwènù beena Arizona bàdi kaaba aka aba. S’nuvwa bamòne ditaata adi ditùkù adi, pa bilongelu, kí mmwòmò anyì? Makùmì mwandamùkùlù à bânà pa lukàmà mu bilongelu byà mu Arizona bàdi bàsaama dishààdila dyà mu byeledi byà meeji, makùmì àsambòmbò ne mwandamutekètè pa lukama bàà kùdìbo cìvwa cìfùmìne ku dibandilabandila dyà ntèlèviziyô. Bwà aci nudi nwamba bishi?

171 S’mbìmpè bu wèwè mwà kwambula cingoma cyèbè aci’s! Nwamònu anyì? Mpindyewu, kùlekedikù dyabùlù ùkupwìdijila abi to. To, mukalenge. Mpindyewu bantu, ànu mungǎmbì amu, bantu bàdi bènza maalu ànu bu ne kabààdyakupitakù ku Cilumbulwidi to.

172 Nsongàalùmè ne nsongàakàji ayi, bàvwa ne fàmiyè kampànda wa ba-Indiens, ne bintu bùngì cyanààna. Ngeela meeji ne muntu kampànda dìnà dyèndè Mukalenge Pool ngudi mutàngidi waci. Kàdi ní nkàadikù mumòne miyenga yà dyelulwilangana naayi yà cyena-leelù, s’cìvwa mmùshindù wùvwàbò bàcyènza awu; musumbà wà tu-Rickys twimàne mwaba awu, bàzakaja byanza bàbìbàndisha bàbìpwekesha.

173 Ncyà bushùwà ne ngǎnyishìku nsongàalùmè wa citende awu mu dindà emu, wìmbi awu, ne mmwènekèlu wa kaneemu, bu mulùme wa cyà bushùwà. Mêmè—mêmè ntu munangè byà nànkù awu. Panùdi nwènù—nwènù beena kantu-ku-byanza aba mungǎ musangu kaaba aka nupeta musumbà wà tu-Rickys tütù twimàna kaaba aka etu, twèla mbilà mikolè ne tütuuta mikòbolo, ne twènza bintu byà lukutukutu, ne tükòka myoyi yà munda mu mùshindù wà tunyanga ne kwìsù kwàtù kwònsò; kàdi aci kí nkwinba misambu to, aci’s cidì ànu dyanza dyà

ne, yéyè ùvwa ne meeji matùma kùdì Nzambì, ùvwa ùkuukwila Nzambì, ùvwa ne èkèleeziyà, wàkaasa cyoshelu, wàkafila mulàmbù, wàkasambila, wàkakuukwila, kàdì's wàkabèngiibwa. Nànsha mùvwàbi ne... Esawù pèndè, ki mùvwàye. Nwamònu anyi?

¹⁷⁹ Ntèndeleeleu, nwamònu's, awu's ki mudimu wùdì Sàtaanà ùkwàta; kacìyi bwà kushebeya cintu cyònsò mu kaabujimà to, kàdì ànu bwà kucitampakajila twìshì cyanàànà. Kwàjiki. Yéyè kààkushebeya cintu cyònsò mu kaabujimà to. Kaa, kí mba-communistes to; to, to, mufwilakanyi ne Kilistò kí n'communiste to. Bible mmwambè ne: "Ncifwànyìne kuseeswisha ne Basungula mene bu ne bìvwa mwà kwenzeka." Kanwìkadi numòna ridò wa cyamù cifìike awu to, kàdì mukùnzùbile awu's. Uh-huh.

¹⁸⁰ Kàdì, mònaayi, Kaayinà wàkalwa bwà kukuukwila, kàdì ùvwa ne dimiinu dibì munda mwèndè, dimiinu dyà nyòka. Kashibà kàà nyòka kààkamudidila pamutù, bwalu yéyè ùvwa dimiinu dyà mukàji awu. Ùvwa mumanyè diswa dipwàngànè dyà Nzambì, kàdì wàkabènga bwà kudyènza. Nuvwakù bamanyè aci anyi? Sàtaanà mmumanyè diswa dyà Nzambì, kàdì ùbenga ànu bwà kudyènza.

¹⁸¹ Mònaayi, yéyè ùkaavwakù mumòne Nzambì ùshindika mukenji wà Abèlè. Mpindyewu ndi muswè bwà nwèlanganààyikù meeji, nùkwatèku mudimu ne Kataacilu kèènù kàà muntu udi wela meeji aku mpindyewu bwà katancì kakesè. Mukenji mujaalàmè wà Abèlè awu, wàkashindikà Nzambì ne m'Bulelèlè awu! Nudi munkacì mwà kuzòla mpindyewu anyi? Uh-huh. Mukenji wà Abèlè wùvwà mwitàbìibwe, ne Kaayinà kucimònayè ne kumanyayè ne Nzambì ùvwa mushindike mukenji awu ne ngwà cyà bushùwà. Kàdì kàvwa ànu mufwànyìne kucyènza to. Maditàmishi èndè àkamupangishacì. Ncyà bushùwà, maditàmishi èndè ngààkamupangishà bwà kucyènza. Wàkamòna Nzambì ùshindika mukenji awu.

¹⁸² Pa nàнку mbimwèke mpindyewu ne, mbikolè bè bwà bantu kudìpwekeshabò kumpàlà kwà Dìyi dyà Nzambì. Bòbò—bòbò—bòbò kabèèna ànu baswè kucyènza nànsha. Nebàdìpwekeshè kumpàlà kwà twitabàayi wa èkèleeziyà, bushùwà, kàdì kí nkumpàlà kwà Dìyi dyà Nzambì nànsha.

¹⁸³ Pawikalà muswè kupeta cyòci eci, ndà ku... Mèmè ndi ne Mufùndu kaaba aka, ki cìndì ntèèla kaaba aka. Genèsè 4:6 ne 7, Nzambì wàkambila Kaayinà, kwamba ne: "Mbwà cinyi bùdì mnyangile kwìsù kwèbè nàнку? Udi mùle yònsò tètè ne ciiji nàнку bwà cinyi, wenda utwà eku utwà eku? Udi ufùma ku dyumvwa mukenji wùdì mukuyumbakaje." Yéyè ne: "Èè, cyùdi wenzela nàнку ncinyi? Udi munyange cimfwanyi cyèbè bwà

cinyi, ànu bwalu Ncyèna mubwelè mu webè èkèleeziyà anyi? Kàdi udi mwenzè nànkù bwà cinyi?”

Udikù munkaci mwà kukwàta mudimu ne Kataacilu kàà muntu udi wela meeji anyi? Nwamònu anyi?

¹⁸⁴ Anyi ne: “Bwà cinyi kùvwakù. . . Udi ne awu mmwènekèlu bwà cinyi?” Yèyè ne: “Bu wèwè mwà kwenza bîmpè, uya kenza mùdi mwanèènu wènza mwàmwa, s’Nènkwitabè ne nkubènèshè. S’Nènkwenzèlè cintu cìmwècìmwè aci.” Kàdi kàvwa ànu mufwànyine kucyènza to. KwambaYe ne: “Mpindyewu, wèwè kùyi mucyènzè to, mpèkaatù wa bupidyà mmulààle ku ciibi cyèbè.”

¹⁸⁵ Mpindyewu pàdibo bàtwàmbila ne: “Matùkù à bishimà àkaadi mamanè kupita apu”, pààbò’s mbacimòne cishindikìibwe ne cijaadikìibwe mu mùshindù mupwàngàne, nudi numòna’s, bintu byònsò bitù Nzambi mulayè ne Yèyè ùvwa mwà kubyènza mu matùkù à ndekeelu, byà Bwàkabuulwibwà 10 ne Maalàki 4 ebi, bintu byònsò bìdi bishindikìibwe mu mùshindù mupwàngàne menemene abi, mbwalu kaayi ebu’s, bânà bèètu? Ncilumbù kaayi eci, nwamònu anyi?

¹⁸⁶ Bòbò kabàyi bàcyènza to; bupidyà, bùdi mpèkaatù abu. Kùdi mpèkaatu ànu umwèpelè, mbwena kwamba ne, bupidyà. Ncyà bushùwà. Kwèna upiìshiiibwa ne mbwalu udi unwà maalà, unwà mfwankà, ucyànkunya mfwankà, uvwàla tùpùtulù, wenza cyònsò cyùdi muswè kwenza aci to. To, aci kî ncidi cìkupiìsha to. Mbwa paùdi kùyi witabuuja. Bu wèwè witabuuja, kwàkwenza aci to. Nwamònu anyi? Mwena kwitabuuja kàtu wènza aci to. Yèyè ùdi wàngata Kataacilu kàà mulùme udi wela meeji, nwamònu’s, nwamònu’s, anyi Kataacilu kàà mukàji udi wela meeji, ewu anyi ewu. Eyo. Kàdi, nudi numòna’s, mpèkaatù mmulààle ku ciibi.

¹⁸⁷ Mpindyewu mònayyi cìvwà cyòci aci cyenzèle Kaayinà, ne neciikalè cyà dyàcimwe leelù ewu. Cyàkafikisha Kaayinà ku dyumuka è kuya, ngènzàmpèkàatù wa ku bukolè. Yèyè ùvwa mubènge kutùmikila ku bukolè. Muntu yònsò neikalè mùshindù wùmwèwùmwè awu. Mubènge kutùmikila ku bukolè paanyimà pàà mumanè kumòna mukenji wà Abèlè mushindikìibwe ànu menemene kùdi Nzambi ne, wùvwa bulelèlè, kàdi kubèngayè bwà kucyènza. Wàkenza cintu cìmwècìmwè aci musangu awu. Dìbà adi kusambukayè mukàlù.

¹⁸⁸ Kùdi mukàlù wùdi mwà kusambuka. Nudi bamanyè aci, kî mmwòmò anyi? Mpindyewu, nwènù bambi, ne bàdi apa ne bàdi pambèlu ku—ku tèlefonè mu citùpà cidi tudyòmà etu tükafika mu ditùnga dijimà abu, nudikù nufika ku dicyùm vwa anyi? Paùdi umòna ne m’Mufùndu, kàdi kùyi ucyènza to, Nzambi kààkwikala misangu yònsò ànu mwà. . . Yèyè neikalè mwà. . . Kàà, wèwè’s neütungunukè, mwikàle mubèneshiiibwe. Ki mwàkadìbi kàbìdi ne yònsò wa ku beena

Izàlèèlà, bàakashààla ànu ne mwoyi mu cipèèlà amu mene, ne bàakakolesha bânà, ne bikùnyiiibwà, ne bààkabèneshiibwa, ne bikwàbò byònsò, kàdi “yònsò wa kùdibo mutàpuluke Cyendèlèèlè ne Nzambi.” Yesù ngwákamba nànkù. Kaa, èyowà’s, Nzambi neàtungukè ànu ne kukubènesha, kàdi’s kwèbè kumanè kutjika. Cyà bushùwà. Ki cidi Bible wàmba mpindyewu, ki cidiYe mwambè. Mònaayi, wèwè’s udi mwà kusambuka mukàlù. Nudi nwitabuuja nànkù anyi? Kaayinà’s wàkawùsambuka.

¹⁸⁹ Twǎnjì—twǎnjì kubuululabì ànu mwab’ewu kakesè, ndi ne Ebèlù 10:26. Tùmonààyibì ní ndi mwà kupeta cyòci aci lùkàsàlùkàsà. Mukàndà wà Ebèlù, nshapità wa 10 ku . . . ngeela meejì, mvensà wa 26. Ndi mumufunde kaaba aka. Bwà katanci kakesè cyanàànà, bu nwènu mwà kuntwàlakù, nènku twǎnjàayi kuCibala bwà katanci kakesè cyanàànà. Èyo, ki pòpò apa.

Bwalu twètù twenza mpèkaatù ku bukolè paanyimà pàa twètù . . .bapetè dimanya dyà bulelèlà, kakwèna kùshààla kàbìdi mulàmbù bwà mpèkaatù to,

Ànu dindila dilelèlà dyà dikwàcisha bwòwà dyà cilumbulwidi ne ciiji cyà cilakuka kapyà, cyàbutulà mulwishì.

¹⁹⁰ Aci ng’EMU MMÙDÌ DÍYÌ DYÀ CIJILA DYÀ NZAMBÌ DYÀMBA. Twètù tubènga kwitabuuja ku bukolè paanyimà pàa bamanè kuCimòna ne kuCitèèleja, dībà adi twásambùkù mukàlù. Kakwàkwikalakù kàbìdi difwidiibwa dyà luse bwà bwalu abu to, wèwè wàmanyi kusambuka mukàlù.

“Kaa,” mùdi wamba, “Nzambi’s nyewù ùcidi ànu ùmbènesha.” Kaa, èyowà’s.

¹⁹¹ Vùlukàayi Izàlèèlà, mikàlù ayi, pààkabàpèeshà Nzambi mulayi, dyàmwàmwa mu Buloba bwà Cijila, mu . . .mu buloba amu, bùvwa bwìmpè, bwà mabèèle ne bwìci, kàdi Mòsà pààkatumàye Kaalèbà ne Yoshùwà, ne batentekedi abu, bwà kuyabò dyàmwàmwa adi, bwà kutentekelabò buloba abu, ne kwalukilabò ne cileeji cishindikiiibwe aci, dikùmì baa kùdibo kwambabò ne: “Katwèna mwà kucyènza to, katwènakù bakumbanè to, tàngilàayi lutàtù lùdiku alu, s’netwikalè bakoleshi bàà maalu’s, nyewù tudi ne tuntu tukesè etu bwà kulwangana naatù, tàngilàayi bìdibo bóbò naabi, twètù—twètù katwèna mwà kucyènzakù to, katwènakù ne bukolè bwà kucyènza to.”

¹⁹² Yoshùwà ne Kaalèbà kwambabò ne: “Twètù tudi batàmbe ne bukolè bwà kucyènza, Nzambi ngudi mufile mulayi.”

¹⁹³ Nènku, vùlukàayi ne, bààkaalukila cyànyimà. Kùvwa nku Kaadèsà-baanè. Nènku bààkaalukila cyànyimà ne bàakashààla balalakanyi mu cipèèlà. Ne yònsò wa kùdibo wàkafwà, ne mmujimine Cyendèlèèlè. Ki mwàkambà Yesù.

194 Kùsambuku mukàlù awu to, wamònu's. "Paùdi mumanyè kwenza cìdì cìmpè, kàdi kùyi ucyenza to, bwèbè wèwè mmpèkaatù."

195 Izàlèèlà wàkenza cintu cìmwècìmwè aci. Paanyimà pàà bamanè kumòna Mòsà mushindikiibwe, kàdi pashiishe kulekelabò Baalàmà ùbàpwidijila, Dimiinu dishindika dyà mushinga mukolè adi. Mpaasàtà, kudìdingikù (musangu wèbè nànsha wùmwè) wàmba kantu kabì nànsha kàmwè bwà Dìyi edi to. Tàngilàayi Baalàmà, yéyè's ùwà mupròfetà, ne mumòne Dimiinu dyà Nzambì dishindika. Kàdi mu bukòòkeshi bwà dìngumba dyèndè dinènè dyà sungasunga mùvwàye musòmbèle amu, Moàbà wàkamòna musùmbà wa balalakanyi abu bàkòsolwela mu ditùnga adi, kucìpwidijayè, ne kwambayè ne: "Èè, anjì indìlaayi kakesè tǔng. Twètù bònsò tudi beena Kilistò. Tudi bònsò beena kwitabuuja. Mòna's, baatatwètù ne baatatwènù's bàdi cintu cìmwè. Twètù aba katwèna bàna bàà Lotà anyi? Lotà kàvwa mwànà wa balùme wa mwanàabò ne Abraham anyi? Twètù bònsò katwèna bantu bàmwè anyi? Tùselanganàayi munkacì mwètù."

196 Ki Izàlèèlà, bu Evà mu budimi bwà Edènà, kulekela Sàtaanà ùmupwidijila, kupwidijilayè kabìdì Izàlèèlà kupicila ku mupròfetà kampànda wa mashimi. Pààbì, mupròfetà mulelèlà mwikàle naabò, ne Dìyi dishindika. Kàdi ku mmwènenu kampànda wa ku dimanya dyà mu mutù, yéyè kubàpwidijila. Anjì elàngànaayikù meeji pa bwalu abu. Mpindyewu, kacya kacyakafwidiibwakù luse to, kacya mpèkaatù awu kàakafwidiibwakù luse to.

197 Mamiinu awu kubolelawù ànu mu kajila kàà mudimu mene amu, mu njila wa ku buloba bulaya. Dyònsò dyà kùdiwu dyàkabùtuka ne dyàkabola, ànu buludì mu èkèleeziyà, mu kajila kàà mudimu, munkacì mwà kwenda kulonda Nzambì. Nènku kulekelabò Sàtaanà ùbàpwidijila bwanga bwà mamanya à mu mitù abu, mmwènenu wa dilonga dyà tulaasà, wa mamanya à mu mitù, bàmba ne: "Mona's, twètù's tudi bònsò bantu bàmwè, s'tudi bònsò bàna bàà Nzambì." Kì ncinùdì to! Kàdi kulekelayè mulongeshi wa mashimi awu ùbàpwidijila mmwènenu wa Ci wa mamanya à mu mitù uwayè nendè yéyè awu.

198 Ne ànu mùdì Nsangilu wa Bukwántèndeleele wènza mpindyewu mene emu, nwamònu's, cintu cìmwècìmwè aci, "Mòna's, twètù bònsò netùdisangè pàmwè mu bulongolodì bunènè bùmwpèlè." Ndongolwelu wenù mu kaabujimà wa cyena-bulongolodì awu's ngwa dyabulù. S'ncimanyinu cyà nyama wa lwonji, mu Bible. Nèngikalapu ne mukàndà, àbìdì àdi pànshì aa, bu Mukalenge mwà kwanyisha.

199 Mònaayi, mu cikondo cyà Noà, bamòne Dìyi munkacì mwà kwibakiibwa, bwà kulèlemadì. Mpindyewu lekèlaayi ngàmbèku kaadìyi kakesè mwab'ewu kàà kushààla batàbàlèèle, Dìyi

munkaci mwà kukùngwijiibwa bwà kushintuludiibwa bwà kuumuka pa buloba kuya mu maulu. Bàmona dilamakajiibwa dyà bitùpà byà cintu aci; kàdi biikàle ne mmwènenenu yàbò yà mamanya à mu mitù ayi, kusekabò mupròfetà awu bamutàngile mu mpàla, Noà, pàvwàye wàmba cipròfetà cyà cikondo cyà nshùikidilu apu. Kadi ncinyi cìvwà... Dilamakajiibwa dya bitùpà byà cintu aci òvwà dyenjiiibwe ne Dìyi dyà Nzambi, cimeta munda ne pambèlu, cimeta ne disambila ne diitabuuja. Pàakalwà mvùla ayi, mmwènenenu yònsò yà mamanya à mu mitù yà ntèndeleele ayi yàkafwà ne yàkabola ànu mu... ànu mu èkèleeziyà yàbò amu mene, ànu pa buloba apu mene. Kàdi bwàtù bwàkalèlema kumutù kwà byònsò abi. Dimiinu dyà maalu à mamanya dipwidijà adi dyàkabola ànu mu cilumbulwidi mene amu.

²⁰⁰ Citùdi twètù tuteeta bwà kwenza ncinyi's, twamb'eku twamb'eku, tudi tuteeta bwà kushindamija èkèleeziyà wetù twètù anyi tudi tuteeta bwà kushindamija Dìyi dyà Nzambi? Citùdi twètù tuteeta bwà kwenza ncinyi? Tudi munkaci mwà kukwata mudimu wà cinyi? Tudikù munkaci mwà kuteeta bwà kwaluja bantu mu Eci anyi? Evà munène ewu cidiye munkaci mwa kuteeta bwà kwenza ncinyi mu matùkù à ndekeelu emu, Evà-èkèleeziyà ewu?

²⁰¹ Nebikengelè bwà mémè kwimanyika dyàkàmwè, mwanèètù, bwalu dîbà—dîbà dîkaadi dîmane kuya bikolè be. Mpèèshaayikù ànu tusunsa tukwàbò dikùmi ne tùtaanu cyanààna, nènku nèngiimanyikilè pa Mifundù yànyi—yànyi eyi. [Mwanèètù wa balùme kampàndà ùdi wàmba ne: “Cyà bushùwà, tùngunukà.”—Muf.] Èyowà. Bîmpè. Ndi mumanyè. Èè, pàmwàpa bantu mbaswè kubwela mùneemu emu bwà kukolopa mwaba ewu. Kàdi mbimwènèke ànu bu ne mbinkolèle bwà kwimanyika's. Nèndwijakajè. Èyo.

²⁰² Tàngilàayi, Evà munène wa maalu à mamanya, wa dilonga dyà tulaasà, musopakaja, udi ubiikidiibwa ne ng'èkèleeziyà ewu, cidiye ùteeta bwà kwenza ncinyi? Ùdi ùteeta bwà kuzànjika Dìyi dyà Nzambi, kàdi ùlekela bantu bènza mùdibo bènza amu anyi? Bòbò kabèena bàkwàta mudimu ne Kataacilu kàà muntu udi weela meeji to, anyi, Kataacilu kàà Nzambi. Tàngilàayi cidìbo bòbò bàtwàla. Bàdi bàdizànjika bòbò biinè. Èkèleeziya ùdi, mu dimiinu dyèndè dikònyangaja dyà ndongamu wa dimanya awu, mmufikishe bukwàbantu mu kaabujimà bulwè mu mùshindù wà maalu à mamanya bupangi bwà Dìyi dyà Nzambi to. Mpindyewu nèngambè mèyi awu, ncyàkushààla muàlàma ntàntà mupitèpìte bule mpindyewu to, bwà mfikèku ku dijikija. Mu mùshindù wà maalu à mamanya bapangi! Pàdìbi ne Nzambi, panshi pa buloba mene apa, munkaci mwà kwenza bintu bìdiYe wènza ebi, ku Dìyi Dyèndè dilaya, kàdi bòbò kabàyi baDìcyùkàkù to kàdi biikàle bàseemena kule bwalu mu mùshindù wà maalu à mamanya mbapangi. Mu mùshindù wà maalu à mamanya bapangi!

203 Mvwa mfùkisha mimwemwe pa dîbà adi bwalu Mwanèètù Williams ewu, mmufunde pa kabèjì apa ne: “Udi mwà kushààlapù mu mapingaja majimà emu,” cintu kampànda. Kàdi, ndi ngaanyisha cyôci aci, abi mbilenga byà menemene. Nwamònu anyi?

204 Kàdi bantu bàdi—bàdi bènza mpèkaatù ku bukolè. Byàlu kubweja ndongamu wa bukwàèkèleeziyà mu—mujimà leelù ewu mu mpèkaatù wa ku bukolè wa bènzela Nzambi. Mòna’s, nsòmbelu wa kaneemu wetù wa ciibidilu ewu’s nèakujaadikilè ne nCyà bushùwà. Èyo. Cibwikilu cyà dyalakana ncidì cimufòmije mèsù, bwà kàmònu Dìyì dyà Nzambi to, nènku ùdi ùdisangana cyàkàbìdì butakà. Nudi bamanyè’s, Nzambi, mu Bwàkabuulwibwà 3, mmwambè ne: “Lwâ, ùsumbè Kùndì bwanga bwà mèsù, bwà mèsù èbè àtabalè.” Nwamònu’s, Bwanga bwà mèsù n’Dìyì Dyèndè.

205 Nudi bamanyè’s, bôbò bàdi bàmba ne: “Èè, muntu ewu’s ùtu mulongè munda mwà bidimu makùmi ànaayi, bwà kupetayè màpòlomè èndè awu. Yèyè ùdi B.L.D., D.D., ne byònsò ebi.”

206 Nudi bamanyè cyàkambà Yesù pa bwalu abu anyi? Wàkamba ne: “Muntu àdìpidyè yèyè mwiinè.” Pòlò wàkadìpidya.

Wèwè udi wamba ne: “Kacyèna cyùmvwija aci to.”

207 Èè, nàнку, Pòlò wàkacìlonda bwà cinyi? Yèyè wàkamba ne: “Kacya ncyàkalwakù kunùdi ne mèyi a àtwishishangana à lungènyi lwà bantu to, bwalu nuvwà bafwànyine kwibakila ditèkemena dyènù pa cyôci aci. Kàdi ngàkalwa kunùdi mu bukolè ne dimwèneshiibwa dyà Nyumà Mwìmpè, bwà dîyì dyènù kwikaladi. . . diitabuuja dyènù kwibakiibwadì pa Dìyì dyà Nzambi, kabìyi pa dimwèneshiibwa dyà lungenyi kampànda nànsha.”

208 Mbyenzè ànu bu ne bantu mbajimije nsòmbelu wabò wa kaneemu wa ciibidilu ewu ne dicincika dyà myandà. Kabàcyèna mùvwàbo pa ciibidilu to. Kale wàwa, pàvwà mupròfètà wàmba ne: “EMU MMÛDÌ MUKALENGE WÀMBA,” bantu bàvwa bàzakala. Èyowà’s, ncyà bushùwà ne bàvwa bàzakala. Bantu bàvwa bànyunga, bwalu bàvwa bàciina. Kàdi mpindyewu bàkaadi bajimije diciinà dyàbò dyònsò dyàCì adi. Kabèèna bàciina Nzambi to.

209 Solòmò wàkamba ne: “Di—diciinà dyà Nzambi ki cibangidilu cyà lungènyi,” ànu cibangidilu cyàlù cyanààna.

210 Kàdi mupròfètà ùdi mwà kwamba ne EMU MMÛDÌ MUKALENGE WÀMBA; bantu bàmba ne “mmacimbu’s!” Nwamònu’s, kakwèna ditèkemena bwàbò bôbò to. Bidi, bôbò bàdi bàmba ne: “Mòna’s, twètù’s tudi ne meeji matwè. Tudi beena mamanya à mu mitù, kabyèna bitùkèngela bwà kwangata cintàkanyì cyà mùshindù awu to! Twètù’s tudi bamanyè bitùdi twamba abi!”

uvwa mumòne Sàtaanà mu matùkù à ndekeelu aa awu, nwamònu's, à ndongolwelu wa dilonga dyà tùlaasà ne bikwàbò bìdìye naabi abi ewu, ndongolwelu wa butèndeleeedi. Mupròfeta umwèumwè awu, Yeshàayi 9:6, wàkamba ne: "Bátùlelèdì Mwànà, bātùpèeshi Mwànà wa balùme; ne Dìnà Dyèndè nedibiikidiibwè ne 'Mubedyanganyi, Mfùmù wa Ditalala, Nzambi Mukolè, Taatù wa Kashidi.' Ne ku Bwèndè bukòòkeshi kakwàkwikalakù ndekeelu nànsha." Ne Dìyì adi's n'Dìyì dyà Nzambi. Nènku Nyumà wàkalwa pa Dìyì adi, ne Wàkadivùnga munda mwà virgò kampànda. Amen. "Mwànà wa balùme wàlediiibù," kàyi mufùkiibwe to, "mulediiibwe."

²¹⁶ Sàtaanà kuteetayè ne kuteetayè kàbidì, bwà kuCipwidijila. KuMubàndishayè kuulu è kwambayè ne: "Ní Udi cyŪdì wamba ne ncyŪdì aci, nànkù anjì ngenzèlèku ndambù wa dyondopa kaaba aka tũng. Anjì ndeejèku mŪdì mwà kucyènza tũng. Anjì kùdimunàbi eci, dyàmpana edi, ne mabwe aa àndamùkè màmpana. Twànjibi kumòna mŪdì udyèla panshì, bwalu Mufùndu's mmwambè ne neŪcyènzè."

²¹⁷ Nudi numòna démons yà butèndeleeedi ayi leelù ewu mùdìyi miicikàle yàmba ànu cintu cìmwècìmwè aci anyi? "Cintu pàaci ne ndyondopa dyà kùdì Nzambi ní citukù; s'ki Mwanèètù *Kampànda* ewu mulàadika apa, twànji tükumonèbi ùmwondòpè."

²¹⁸ Démon umwèumwè awu wàkiimana ku nkùrusè wa Yesù, kwambayè ne: "Wèwè ní udi Mwànà wa Nzambi, tùulukà ku nkùrusè aku patòòke mpaapa."

²¹⁹ Dìyì's òvwa dyambè ne Yèyè òvwa Mwànà wa Nzambi. Nyumà's wàkajaadika ne Yèyè òvwa Mwànà wa Nzambi. Yeshàayi 9:6's wàkuula. Ne dilòlò adì, bààbùngì bàà kunùdì bàdì bàtèelejilà ku tudyòmbà's nuvwa bumvwè mutùvwà bafìle Mifùndu makùmi àsambòmbò majimà ne byà mu njila, mitwè ku bùngì abu, ngeela meeji, pa bìdì bitàngilà dijaadika dyà ne Mifùndù mmyambè ne Ūvwa n'Yèyè.

²²⁰ Kaa, Sàtaanà kuteetayè ne kuteetayè kàbidì, kwenzayè byònsò. Dilòlò kampànda, mulàadile lwà paanyimà pàa màzuwà, kuMumònayè mulàale tulù. Ki kwambayè ne: "Kàdi ngààmubùtulu kwòkò ànu mpindyewu mene." Kàdi kàvwakù mwà kucyènza to.

²²¹ Wàkateeta bwà kuMuteeta bwà àbwelè mu dyenza cintu kampànda cyà cibì, kàdi kààkacikookeshakù nànsha. Bwà cinyi? Yèyè ùkaavwa mumana kupwidijila ne cisàkisaki cyà didyanjila-kulongolola. Kabèèna mwà kuseeswishiiibwakù to. To, to. Dìyì ndyambè ne Yèyè òvwa mwà kwikala kaaba aka. Amen. Kakwènakù démon nànsha umwe wìkala mwà kuMutàcisha to, ne nànsha mukwàbò mwànà wa Nzambi nànsha umwe, udikù mudyànjila kulongolola bwà kwangatayè kaaba Kèndè. Yèyè mmupwidijila ne cisàkisaki. Lulengu lwà Sàtaanà, ba-docteurs

bàà cyeena-màngumba kabèèna nànsha mene bàMulengakù to nànsha kakesè. Yèyè ùdi wènda ùya ànu kumpàla, cintu nànsha cimwè kacyàkuMutàcishakù to, nwamònu's. Kacìvwakù ne bwenzeji nànsha bukesè pa Yèyè to.

222 “Èè, mèmè nènKuvwijè mwèpiskòpò wa buloba bujimà. Mèmè ngudipù ne bukòòkeshi. Wèwè ànu munkuukwìle, mulwè kushààla wa mu cisumbù cyànyì mèmè, mèmè—mèmè nènKuvwijè mukòòkeshi. Mèmè nèmpwekè, nKubàndishè wèwè.”

223 Yèyè kwamba ne: “Yilà paanyimà Pàànyì, Sàtaanà. Bààkafùnda ne: ‘Nèukuukwìlè Nzambi, Dìyì, ne Yèyè nkààyèndè ki uwàkwàcilà mudimu.’” Pashìshe dīngà ditùkù . . .

Pa Mupèsonà munène ewu, ndi muswè kwanjì kushààlapù ndambù.

224 Kàdi dīngà ditùkù, Nyumà kulwaYè cyàkàbìdì pambidi Pèndè; bwalu kùvwa Dìyì kampànda dīvwà difùndiibwe bwà bwalu Bwèndè, difùmìne kùdì Nzambi, dīvwìle kùdì mupròfètà ne: “Ne Yèyè wàkalombodiibwa ku cishipeelu, bu mwànà wa mùkooko.” Ki Nyumà kulwaYè pambidi Pèndè, ne kuMulombolaYè, ne kuMutùmaYè ku nkùrusè wa Kàlvaryò. KufwilaYè kuntwaku. Ne byònsò bivwà byakùdìibwe bwà bwalu Bwèndè mu lufù Lwèndè, kuulabì, bwà kutwàdila Dimiinu dyònsò dyà Nzambi didyànjlila kulongolola dīvwà pa buloba adi Bukènkè ne Mwoyi. Yèyè wàkatwàla mùshindù wà kucyènza. Dimiinu *ndyòdì edì*, Nyumà ùdi utwàla Mwoyi; ùshintulula bânà bàà balùmè ne bàà bakàjì bàà Nzambi, ùbùùmusha ku maalù àà pa buloba mu cimvundù cinènè cyà mīdimà eci, bwà kwikalabò bânà bàà balùmè ne bàà bakàjì bàà Nzambi.

225 Kanwikadi's nwàlwa kulèndukila pa mwakù wa “didyànjlila-kulongolola awu to.” Ndi mumanyè ne nutu nulèndukilapù. Kàdi, tèèlejààyi, Kì mmwakù wànyì mèmè to. Ndimwè dyà ku Mèyi à Nzambi. Panwikalà baswè kuwùbala, balààyi mu Efesò 1:5, cidi ne: “Yèyè wàkadyànjlila kutùlongolola ku ditèèkiibwa dyà bânà bàà balùmè ku Yesù Kilistò.” Nwamònu anyi?

226 Ngǎnjì nci tòòkesaku ànu bwà katanci kakesè cyanàànà, ànu bwà katanci kakesè cyanàànà, bwà kutòòkeshakù cyòci eci mu meeji ènù amu. Tàngilààyi. Ànu mùvwà wèwè awu munda mwà tatwèbè, ku cibangidilu amu, mutòlokù wà dimiinu. Nuvwakù bamanye cyòci aci anyì, yònsò wa kunùdì? Wèwè uvwa munda mwà tatwèndè wa kakwèndè wa kakwèbè, wèwè pèèbè, uvwakù bamanye ciinè aci anyì?

227 Balààyi Mukàndà wà Ebèlù, mutùdì tusangana ne Lewi wàkafuta byàdiikùmì pàcìvwàye mu mivungu yà Abraham, nkòngò yinaayi paanyimà pèndè. Pààkafutà Abraham byàdiikùmì kùdì Melekisedekè apu, cyàkabadiibwa bwà mwikùlù wa mwikùlù wa mwikùlwèndè kwinshì kwèndè, ne

yêyè ùcìvwa díbà adi mu mivungu yà Abraham. Ki bwalu mbwòbù abu's. Nwamònu anyi?

228 Wêwè uvwa mu mivungu yà tatwèbè, kàdi tatwèbè kàvwakù mwà kubwela neebè mu bwobùmwè paùvwà kùyi mushintùlùke mulwè mubidi wà misunya apu to.

229 Mwanàanyi wa balùme wàwa ùvwa munda mwànyi. Mémè—mémè—mémè mvwa njinga mwànà wa balùme, kàdi yêyè ùvwa munda mwànyi piinè apu. Nwamònu anyi? Ùvwa munda mwànyi piinè apu. Kàdi ku nsòmbelu wa bantu basèlàngàne, ki yêyè kushintuludiibwa è kulwayè muntu mündi mémè emu, ne pashìishe kulwayè bu mémè.

230 Ne wêwè wàkalwa mùdi baledi bèèbè, nwamònu's, bwalu cìvwa mu wêwè, ànu kwìnè kwònsò aku. Mpindyewu piikalàbi ne twètù tudi bânà bàà Nzambi, byambiibwà Byèndè. . . Bwalu, wêwè udi cyambiibwà cyà tatwèbè, kí ncyà mamwèbè to; cyà tatwèbè. Mùtòlokù wùdi wùsanganyiibwa munda mwà tatwèbè. Nwamònu anyi? Nènku mpindyewu mamwèbè yêyè ùvwa cyamù cyà ditooyishila mayi cìvwa cìkwambùle, cyambùle dimiinu dyà tatwèbè. Nwamònu anyi?

231 Nènku buloba, mu mubidi, bùdi pààbù cyamù cyà ditooyishila mayi cìdi cyambùle dimiinu dyà Nzambi. Nwamònu's, ànu menemene. Kí mbuloba, mùdi buloba bunène amu to; mmùdi Nzambi wàkabwènza awu munène. Nwamònu anyi? Nwamònu anyi?

232 Mpindyewu piikalàbi ne wêwè udi mwànà wa balùme ne wa bakàji wa Nzambi, nànkù's uvwa munda mwà Nzambi ku cibangidilu. Udi cyambiibwà Cyèndè. Piikalàbi ne kùvwamù díbà adi to, nànkù kùvwakù kacya anyi kwàdyàkwikalakù nànsha.

233 Bwalu, mémè ncyèna mwà kwambula, mu mivungu yànyi, mwànà wa balùme wa *ewu* muntu anyi wa *wàwa* muntu to, mémè ndi mwà kwambula ànu baanyi bânà sungasunga, ne bóbò mbàdi bafwànyine kwangata cifwànyikijilu cyànyi. Alèluuyàh. Nwacyùmvù anyi?

234 Bânà bàà balùme ne bàà bakàji bàvwa munda mwà Nzambi ku cibangidilu. Mpindyewu tàngilàayi. Wêwè udi ne Mwoyi wà Cyendèlèlèlè, mùdi wamba. Tudi tuciitabuujà ne, tudi ne Mwoyi wà Cyendèlèlèlè. Èè, kùdi mùshindù ànu wùmwèpelè wà Mwoyi wà Cyendèlèlèlè, ne mwinè awu n'Nzambi. Ki cintu cìmwèpelèlè cìdi cyà Cyendèlèlèlè, n'Nzambi. Díbà adi piikalàbi ne wêwè udi ne Mwoyi wà Cyendèlèlèlè, Mwoyi wùdi munda mwèbè awu wùvwa ànkù misangu yònsò, ne wêwè uvwa mu mivungu yà Nzambi kumpàlà mene kwà kwikalakù dyulu kampàndà ne buloba. Nènku pàdi Dìyi Dyòdi diinè. . . Yesù Yêyè mwinè's ùtu ùbiikidiibwa ne n'Dìyi, ne mu Yone Munsantu 1, mbambè ne: "Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi. Ne Dìyi dyàkavwijiibwa

mubidi ne dyàkasòmbela munkaci mwètù.” Dìbà adi wêwè uvwa mu mivungu yà Yesù, ne wákaya Nendè ku Kalvàriyò. Wêwè wákafwà Nendè, ne wákabiika Nendè ku lufù. Ne leelù ewu tudi basòmbè mu myaba yà mu Dyulu munda Mwèndè, buujìbwe tètè ne Nyumà Wendè, bânà bàà balùmè ne bàà bakàji bàà Nzambi. Bafwè pàmwè Nendè, babiike Nendè ku lufù. Bushùwà’s.

²³⁵ Mpindyewu dîbà adi, mpindyewu, mpindyewu udi mwà kubwela Nendè mu bwobùmwè. Kùvwa mwà kucyènza kale wàwa to, bwalu wêwè uvwa ànu Dîyi cyanààna munda Mwèndè, dimiinu. Kàdi mpindyewu Yèyè wàkumwèneshi, nènku mpindyewu Yèyè mmuswè bwà wêwè kubwela Nendè mu bwobùmwè. Dîbà adi Yèyè kutùuluka, kuvwijibwe mubidi bwà Wàmòna mwà kubwela neebè mu bwobùmwè mu mùshindù mupwàngàne. Nudi numòna bwobùmwè bupwàngàne abu anyi? Kaa, ekèlekèle, maalu-masokoka a mu ndòndò à Nzambi awu’s wè! Mùshindù mwìnè wùdibi bilenga’s wè! Nwamònu’s, Nzambi kàvwakù mwà kubwela mu bwobùmwè mu Nyumà to, ki Nzambi kulwaYè muntu mùmwè neetù.

²³⁶ Yesù Kilistò ùvwa Nzambi Yèyè mwìnè, mumwènèshìibwe, bwalu, Ùvwa Mwànà bwalu Wàkalediibwa, kàdi cìvwa ànu ntentà cyanààna wa Yèyè kusòmbelamù. “Muntu nànsha umwe kàtukù mwanji kumòna Nzambi musangu nànsha wùmwe to, kàdi Mulela umwèpelè wa Taatù ngudi muMuleje.” Nzambi wàkaDìibakila nzùbu, mubidi wà kusòsombelamù, kulwa panshi bwà nwamònakù mwà kuMulenga. Timòtè wa Kumpàla 3:16: “Kakùyi dikòkangana to, bwalu busokoka bwà difwànà dyà Nzambi mbunène; bwalu Nzambi wàkamwèneshìibwa mu mubidi, mumwènèke kùdi Banjèlo, mwitàbùùjìbwe, mwangàcìibwe mu Dyulu.” Nwamònu anyi? Mpindyewu Yèyè. . .

²³⁷ Wêwè mwikàle mubidi, ne Yèyè mwikàle mubidi, dîbà adi wêwè’s udi mwà kubwela mu bwobùmwè mpindyewu, bwalu Yèyè ùvwa cyambiibwà cyà dinanga cyà Nzambi. Nzambi ùdi dinanga. Mmwòmò anyi? Ne Yesù ùvwa cyambiibwà cyà dinanga dyà Nzambi. Nènku pàakaleejiibwà patòòke cyambiibwà cyà dinanga aci, ciine aci’s, cìvwa n’Nzambi Yèyè mwìnè; byambiibwà byònsò bìvwà bikùlame kùdiYe abi, byàkalwa kùdiYe: “Bònsò bàdi Taatù muMpèeshe, nebàlwe kùNdi.” Bushùwà, bìvwà bikèngela bwà kudyànjlàbò kulongolodiibwa. Kabiya nànkù to, wêwè kwàkwikalakù to. Kwajiki’s. Cyà bushùwà.

²³⁸ Mpindyewu tudikù mwà kubwela mu bwobùmwè, cìvwa nku—nku mabanji à Dîyi Dyèndè, ne munùdi citùpà cyàwù amu. Wêwè udi citùpà cyà Dîyi; bu mùvwàYe Dîyi ku cibangidilu, wêwè udi Dîyi mpindyewu. Nwamònu anyi? Nèngiikalè mwà kuyiisha dilòòlò edi, anyi mu dyàlumingu anyi òmwè dyà ku

matùkù à pàngààlwà, pa ne Dìyì didi cinyì, nwamònu's. Nènku mpindyewu wèwè udi citùpà cyà Dìyì.

²³⁹ Tèelejàayi. Kùdi cintu cìmwèpelè cìndi ncìyikù mwà kwenza to. Ncyèna mwà kuditwa makùmbù bwà bankambwà bàànyì to. To, mèmè ndi mupàtùkile mu bukooyà bwà bubi be. Wanyì tààtù ùvwa Irlandais. Mààmù yèyè ùvwa Indienne wa mukùna ku dikàsà, Indienne ku luseke lùmwe; mamwèndè ùvwa Indienne, ùvwa ùpeta mfrangà yà pààsiyò. Mpindyewu, bóbò bònsò, bakwàciki bàà maalà, pàmwe ne bònsò mbafwè ne bisàbaatà ku makàsà, balwanganyi bàà mvità, balwanganyi bàà mvità yà bingoma, ne bikwàbò. Mèmè ncyèna mwà kuditwakù makùmbù bwà cintu nànsha cìmwè pa cyòcì aci to, bwalu bàànyì bankambwà ne mudibù wà wanyì fàmiyè mbantu bàà bwalu bukolè.

²⁴⁰ Kàdi, mwanèètù, kùdi cintu cìmwèpelè cìndiku mwà kuditwila makùmbù, ndi mwà kuditwa makùmbù bwà Mukalenge wanyì Yesù Udi mumpikùle. Ne ku bukolè Bwèndè bushintuludi mmukùne dimiinu, ku didyànjila-kulongolola, ne mèmè kuDìmòna. Ndi mwàna wa nganyì mpindyewu? Èyowà. Ndikù mwà kuditwa makùmbù Bwèndè Yèyè. Ne ndi mupicishe bidimu makùmi àsàtù ne bisàtù byà mwoyi wànyì wà pànu, ku diMutwà makùmbù. Bu Yèyè mwà kundamakù bidimu makùmi àsàtù ne bisàtù bikwàbò, nènteetè bwà kutàmba kuditwa makùmbù Bwèndè Yèyè. Nwamònu anyi? Ndi mwà kuditwa makùmbù bwà Nkambwà wanyì awu, àlèluuyàh, Yèyè udi mumpikùle ne mukùne dimiinu dyà Mwoyi munda *emu* awu, ne mumpèeshe mùshindù wà mèmè kutàpakù dísù pa Dìyì edì awu, mutùme Nyumà Wendè panshì apa mwambè ne: “N'Dyòdi edì. Ambà *cikampànda*, ne ncyèzekè. Enzà *cikansanga*.” Nènku kaa, ekèlekèle, ndi mwà kuditwa makùmbù Bwèndè Yèyè! Mmuniyì mwàkacyènzàYe? Ku dyowesha dyà màyi à ku Dìyì, màyi a ditàpulula. Mvw'a kujingakù twacyùmvwija's.

²⁴¹ Beena kwitabuuja balelèlà badyànjila kulongolola nebàshaalè ne Dìyì bwalu bàdi citùpà cyà Dìyì adi.

²⁴² Kaa, nwènù mìtootò milalakanyi, nenùlalanè too ne dìbà kaayi? Nwènù ba-Méthodistes, ba-Baptistes, ba-Presbytériens, nwènù beena pambèlu, cyònsò cinùdi bafwànyìne kwikala aci, mìtootò milalakanyi, nuumuka ku èkèleeziyà nuyà ku mukwàbò èkèleeziyà, nuumuka ku dikunji nuya ku mwaba kampànda, ne ku ntèlèvizìyò nuya ku ntèlèvizìyò, ku maalu a pa buloba nuya ku maalu a pa buloba, bwà cinyì kanùyikù nulwa? Yèyè's ùdi ùjinga wàmba kufwa bwà kubwela neebè mu bwobùmwe. Udi ùkujinga wàmba kufwà. Mmuswè kukushintulula ku divwiulula dyà meeji èbè mpyamàpyà, kaciyi ku èkèleeziyà anyì ku dìngumba to, kàdi ku Dìyì Dyèndè, bu mùdibi ne, wèwè udi citùpà cyàdi pìikalàbi ne dijinga adi didi munda mwèbè.

*Bàà disànka ng'aba bàdi ne nzàla ne nyòòtà yà
bwakàne, bwalu bóbò nebùkùcìshùbwè. (Nwamònu
anyi? Uh-huh.)*

²⁴³ Ne Yêyè mmutùme Bukolè Bwèndè bushintuludi abu, bwà kukupàtula mu dikònyangajiibwa dyà butèndeledi mùdi usanganyiibwa emu. Mu cimvundù cinène cyà dikònyangajiibwa mutùdi tusanganyiibwa emu, Nzambi mmutùme bukolè Bwèndè bushintuludi, Díyi Dyèndè, dishindika, dijaadika, bwà kukupàtula mu dikònyangajiibwa dyà ku dipanga dyùdi wendelamu edi, “butakà, mpofo, mwena dikènga, kàdi kùyi mucimanyè to.” Anji elàâyibi meeji ku bwalu abu, nwènù balundà bàanyi.

²⁴⁴ Nudi bamanyè's, Nzambi wàkatùma bukolè Bwèndè bushintuludi bwà kuuja Díyi Dyèndè, ne wàkashintulula mubidi wònsò nkòng wà Sarah ne wà Abraham. Kushintulula mulùme mukùlakàji ne mukàji mukùlakàji, bwalu Wàkalaya ne Ûwva mwà kucyèza.

²⁴⁵ Ne cidì Nzambi ùlaya bwà kwenza aci, ki cyènzàYe. Kakwènakù cintu nànsha cimwè, cintu kampànda...Cintu cinyagakaja nànsha cimwè, Nzambi kèna mwà kwenzakù naaci kantu nànsha kàmwè to. Kàdi Yêyè neàshaalè mukwàte ku Díyi Dyèndè, ne Yêyè neatumè Nyumà Wendè! “Mémè Mukalenge ngudi muCikùne. Mémè ngwaCimyamina màyi muntu ne bufùku, bwà wantu kiikadi wàlwa kuCituula ku byanza Byànyi.” Bible ngudi wamba nàнку awu.

²⁴⁶ Kaa, nwènù mìtootò milalakanyi, nwènù bàdi ne dijinga mu myoyi yènù abu! Bidi bikèngela nwikalè naadi, cynààna kanùvwakù mwà kwikala basòmbe mwab'ewu mu dindà emu to. Ne kanùvwakù bafwànyine kusanganyiibwa mu èkèleeziyà ayi ne mabàlaasà, ne mu bikwàbò munùdi amu, pambèlu apu ne mu ditungà dijimà amu to, bu Cintu kampànda kaciyi cinùbwejèmu to. Muntu kampànda ngudikù mwakùle neebè. Kùyi kupita apu to. Kùdi dyoweshiibwa dyà ne màyi ku Díyi, dyòdi adi nedikuvwijè mutòoke bu nêjè. Kaa, nwènù bânà bàà balumè bàà Nzambi, tèlejaàyi! Kanùshààdikù mu dikònyangajiibwa adi to. Pàtukààyimù. Abraham wàkiitabuua Nzambi, ne wàkabiikila cyònsò cìvwà cibèngàngàne. . .

²⁴⁷ Wèwè udi wamba ne: “Mmunyi mùndiku mufwànyine kudya? Mmunyi mùndiku mufwànyine kwenza *cikampànda*?” Abu bwalu's mbwà Nzambi. “Mmunyi mùndiku mufwànyine kucyèza? Beena dyànyi's mbafwànyine kumbènga.”

²⁴⁸ Nzambi mmwambè ne: “Ewu wàlekela tatwèndè mumuledi, mamwèndè, mukàjèndè, bàyèndè, mèkù, nzùbu; Mémè nèmmpupè mèkù ne nzùbu, Nèmmpupè baataatù ne baamaamù, ne bânà bààbò bàà balumè ne bàà bakàji, mu buloba ebu, ne Mwoyi wà Cyendèlèlè mu buloba bùcilwalwà.” S'mmulayi's, mulundà wanyi. Aci, kaa, aci's bidi bikèngela cimyaminyiibwè màyi!

Mulayi wónsò wùdi Nzambi ùfla wùdi wùkùmbana. Dimiinu dyónsò dyà Nzambi ditu mmulayi.

²⁴⁹ Nènku, mwanèètù wa bakàji, lekèlè dibebula dyà nsukì ayi, bwalu ncintu cidì kaciyi cikùmbànyine kumpàlà kwà Nzambi to. Lekèlè divwàlà dyà bilàmbà abi, ncinyangu Bwèndè Yèyè!

²⁵⁰ Nwènu bânà bèètù bàà balùme, nwènu bantu balùme, lekèlaayi kwinyika mpàla kumpàlà kwà màngumba awu, mu kwenza kwà bintu ebi, ne kulekela bakàji bèènu bènza bintu byà mùshindù awu. Kí ncikùmbànyine beena Kilistò to.

²⁵¹ Alùkilaayi ku Díyi! Angàtaayi Díyi adi, neDìkolè. Didi ne cyà kukola. Bukolè bushintuludi bwà Nzambi bùvwà buDitòlwèshe ku ntwàdijilu abu, Yèyè ùdi ànu mu njila Wèndè wa dyalukila, mwikàle ùDyàluja mpindyewu. Yèyè ùdi munkaci mwà kwalukila buludì kùvwàci aku.

²⁵² Henòkà wàkatentemunyiibwa, kuumushiibwa ku lufù, kùdi bukolè bushintuludi bwà Nzambi. Cyàkenzelà Nzambi aci ncinyi? Mbu cifwànyikijilu cyà Èkèleeziyà ulwàlwa wìkala mwà kwambwibwa. Èyowà's. Bivwa byà mwomùmwe bwà Eliyà.

²⁵³ Mubidi wà Yesù wàkafùùlùludiibwa paanyimà pàà wòwò mumanè kufwà. Nènku mu lukità, mubidi wa Yesù wàkafùùlùludiibwa kùdi Díyi dyà Nzambi; ne wàkashintuludiibwa, kuumushiibwa ku cimfwànyì cifwè, cyà mashikà, kuya ku Mwànà wa Nzambi mubiike ku lufù, mutùmbishiibwe. Bwalu mupròfetà, Misambu 16:10, panwikalà baswè kucifùnda, 16:10, mmwambè ne: “Ncyàkulekela musùùkà Wèndè mu ifernò, anyi Ncyàkwitaba bwà Wa Cijila Wanyi àmonè dibola nànsha.” Èyi Nzambi wa yààya!

²⁵⁴ Díyi adi didi ne cyà kwenzeka, Didi n'Díyi dyà Nzambi! Wèwè uDìkùnè munda mwà mwoyi wèbè, pawikalà muswè kuya mu Dyambwibwa. Panwikalà baswè kwikala beena Kilistò bashùwashùwààlè, tèekaayi Díyi edi. Bu mùndì ngiitabuuja ne ùvwa n'Yèhezèkèlè, Nzambi kwamba ne: “Angàtà mukàndà muvùnga awu ùwùdyè,” bwà mupròfetà awu ne Díyi kulwabò cintu cimwè. Nènku bìdi bikèngela bwà mulayi ne mulayi wónsò muntwamu wùdimwènèshè, bwalu n'Dimiinu dyà ku cibangidilu dyà Nzambi. Kanùlekedikù bwà mwena tèòlòjì kampànda mulongè tùlaasà pambèlu apa àtèètè bwà yèyè kunùpatulaCì ne mpompì wèndè munda mwènu to. Kanùmulekèdikù ùnùpwidijila maalu à mamanya à musunya ne dimanya adi, ne dilonga dyà tùlaasà adi to. Itàbùùjaayi Nzambi!

²⁵⁵ Abraham kààkangatakù bukèbikebi bwà maalu à mamanya bwà mu ditùkù dyèndè to, wàmba ne: “Nkàadi mutàmbe kukùlakaja be bwà kupeta mwànà, nkàadi muyè kule be. Nkàadi mwenzè *cikampànda*, *cikansanga*, anyi *cikankènga*.” Kàdi yèyè wàkabiikila cintu kanà cyónsò cìvwà cibèngàngàne, ne Díyi dyà Nzambi aci, bu ne kacìvwakù to. Ne yèyè kààkatènkakanakù ku mulayi wà Nzambi nànsha, ku bupidyà; kàdi ùvwa ne dikàndà,

mwikàle ùfila butùmbì kùdì Nzambì. Ùvwa mumanyè ne Nzambì ùvwa ne bukolè bwà kwenza cìvwà Ye mulayè aci.

²⁵⁶ Kaa, nwènu bânà balalakanyi, bakònyàngàja kùdì bilàmbalàmbà byà pa buloba ebu abi! Nwènu bânà bèètù bàà bakàji balalakanyi, bàkaadi myaba ne myòdèlè yà pa buloba ebu mikòke abu! Kàdi, mwanèètù wa bakàji munanga, udi mufwànyine kungangata bu mukùlákàji wa cimfiikààmùndà, kàdi òmòwè dyà ku matùkù aa pàwàtwilanganà ne cìdì Florence Shakarian mutwilàngàne naaci ditùkù adi aci; yèyè pèndè, ùvwa musòmbe mu cibambalu emu, mu mwaba ewu's, munùdì bamanyè. Pawàtwilanganà ne cyòci aci, neùjandulè ne, kí mmémè to, kàdi Díyi edì ndìdì dìbingè. Dìtòlaayi kule ne tuzùbù twà dikòsheshila nsuki atu, tuzùbù twà myòdèlè atu. Dìtòlaayi kule ne bintàkanyi abi.

²⁵⁷ Wèwè udi wamba ne: “Bwà cinyi kùyikù ubàlongesha bintu binène abi, mùdì mwà kwikala *cikampànda*?” Anji bangà ànu ne ABC yèbè ayi, nènku pashìishe netùkafikè ku makùmi à makolè. Nwamònu anyi? Anji bangà ànu ne kuyiila, “cìdì mudimu wènu wà meeji.”

Ki bwà cinyi ndi nnùsèngeleela, bânà bèètù, ku luse lwà Nzambì, bwà nwènu kufila mubidi wènu bu mulàmbù wùdì ne mwoyi, wà cijila, ne wà wìtabiibwa kùdì Nzambì, cìdì mudimu wènu wà meeji.

²⁵⁸ Enzà wèwè ànu “mudimu wèbè wà meeji” awu cyanààna, Nzambì neàtangilè bìdì bishààla; nwamònu's, ànu kulukakaja kwà lungènyi pa bintu byùdì mwà kulukakajilapù wèwè mwine lungènyi ne kwenza abi. Kacyènakù . . . Kacyènakù cyà dipànga dyà meeji bwà muntu mukàji kudìvùùlayè bilàmbà, ne kupàtuka pambèlu apa ne kwenza maalù mùshindù awu, pàdì Bible ùcìpiissha anyi? Kacyènakù cyà dipànga dyà meeji bwà muntu mulùme kudyèlayè mu díyi diswikà dyà bu mutùdì naadi leelù ewu emu, ne bintàkanyi byònsò ebi kaaba aka, ne bintàkanyi byònsò byà sèminèrè ebi, ne bintàkanyi byà mùshindù awu, pàdìbì kakùyì mpatà to bibèngangana ne Díyi dyà Nzambì anyi? Nwamònu anyi?

²⁵⁹ Mishikù yà Yeshàayi, yèyè ùvwa ànu muntu wetù wa pàtupù wa mishikù mibiipe ewu. Kwambayè ne: “Mukalenge, ndi munkaci mwà bantu babiipe, ne mémè ndi ne mishikù mibiipe. Dyàkabi dyànyi bwalu ngàmònu Nzambì.” Ki Mwanjèlò kampànda kupwekayè, kwangatayè Kapyà, Kapyà kàà Cijila kàà pa cyoshelu cyà Nzambì, ne kushintululayè mishikù yèndè; kuyùumusha ku mishikù yà muntu mulalakanyi, kuyìvwija mishikù yà mupròfetà mwikàle ne EMU MMÙDÌ MUKALENGE WÀMBA. Bukolè bushintuludi bwà Nzambì's!

²⁶⁰ Balòbi lukàmà ne makùmi àbìdì, ne—ne basùmbishi bakesè bàà bilàmbà bikùnzùbile, byà bakàji, ne bòbò bàvwà basangile mu cibambalu cyà kuulu bakàngè biibi abu, bàmwè bàà kùdìbo

kabàyiku ne kàlaasà kalonga kakùmbàne bwà kufùndabù ménà àbò sungasunga to. Nzambi wàkabàshintulula kubùùmusha ku balòbi bàà mishipa, kubàvwija balòbi bàà bantu; kubùùmusha ku balùmè ne bakàji bàà mu mìsèèsù, kubàvwija bansantu bàà Nzambi, bàdi kabàyi mwà kufwà to. Bukolè bushintuludi bwà Nzambi's!

²⁶¹ Pòlò, cidimba cyà èkèleeziyà wa pa kaaba, Presbytérien, Méthodiste, Baptiste, mwena Mpenta, anyi cintu kampànda; kupwekayè ne mùsèèsù, mwikàle ne nyumà wendè munène wa dyelangana dyà tudyòmbò awu munda mwèndè amu, wa ne yèyè nguvwa mumanyè kutàmba nì nganyi yònsò wa kùdibo. Yèyè ùvwa mukolèle ku makàsà a Gàmaalihèlè, umwe wa ku balongeshi bàvwà batàmbe bwìmpè mu ditùnga. Cyàkenzekà ncinyi mu njila mutàngile ku Damàsèkè, bwà kakwàta musùmbà wà bantu bàvwà biitàbùuje Diyì dyà Nzambi abu? Pàvwàye mu njila mutàngile kuntwaku, wàkabyànkudiibwa panshì mbyànkung, ne wàkuumvwa Mukenji kampànda. Nènku kumushintulula Wù kuumusha ku cidimba cyà èkèleeziyà ne ku muyi wa mu èkèleeziyà; kumuvwija mupròfètà wa Nzambi, wàkafùnda Diyì dyà Nzambi, mu Dipungila Dipyadìpyà. Kuumuka ku cidimba cyà èkèleeziyà kuya ku munsantu!

²⁶² Kaa, mùtootò mulalakanyi wa yààyà, twìmanèku's. Wèwè mwànà mulalakanyi, Dimiinu dilalakanyi didi dyàya apa dyàya pààpa, mu dikònyangajiibwa edi; kùdimukàayi, mu dindà emu, nwènù bânà. Bu nwènù mwà kuswa ntèèlejaayiku mèmè bu—bu muntu udi uteetakù bwà kwimana pankaci pàà bàà mwoyi ne bafwè.

²⁶³ Mu ditùngà mu myaba yidì tudyòmbà tùfika pìikalàbi ne nucidi ku nshinga, nwènù bàdi balalàkànèlálàkàne mu mwaba awu abu, bu nwènù mwà kuswà anjì sòmbaayikù kàbìdi katanci. Ndi mumanyè ne dibà dikaadi dipite muneemu mu Tucson anyi, nùmfwilèku luse, mu Phoenix, nkushààle tusunsa makùmi àbìdi bwà dibà dikùmi ne ibidi kukùmbànadi. Kadi ndi mulamè bantu aba kaaba aka dindà dijimà edi. Ndi munùpùmbìshishe midimu yènù ne bikwàbò. Kadi tàngilàaku, wèwè mulundà wanyi munanga, s'udi mufwànyine kwikala kule ne Nzambi bwà kashidi. Swàku wàlukilè mu dindà emu. Kì mmwòmò anyi? Kùdi mwaba ku Mpokolo.

Mu cidilù cyà nyama kùkaadi ntàntà mule, ndi
mumanyè ne mmùdibi cyà bushùwà,
Mwànà wa mu dibòko wàkalediibwa bwà
kusùngila bantu ku mpèkaatù wabò.
Yone wàkaMumòna ku mwelelu wà màyi,
Mwànà wa mùkòòkò bwà kashidi,
Kaa, Kilistò, Mupoopela pa nkùrusè wa
Kàlvaryò awu.

Kaa, ndi munangè Mulùme wa mu Ngalèlè
 awu, wa mu Ngalèlè awu,
 Bwalu Yèyè mmungenzèle byàbûngì be.
 Yèyè wámfwidi luse ku mpèkaatù yànyi yònsò,
 wántèèki Nyumà Mwîmpè munda;
 Kaa, ndi munangè, ndi munangè Mulùme wa
 mu Ngalèlè awu.

Mumpùblikaanò kampàndà wàkaya bwà
 kusambila mu ntempèlù dîngà ditùkù,
 Wàkeela lubilà ne: “Èyi Mukalenge, ikàlaku
 naanyi luse!”

Kufwidiibwayè luse ku mpèkaatù ne mpèkaatù
 yònsò, ne ditalala dyà ndòndò kutèèkiibwadì
 munda mwèndè;

Kwambayè ne: “Kanùmonàayi Mulùme wa mu
 Ngalèlè ewu.” (Cyà bushùwà.)

Mulema wàkafikishiibwa ku dyendela kuulu,
 kamàmà kàakafikishiibwa ku dyakula,
 Bukolè abu bwàkambiibwa ne dinanga pa
 mbù;

Mpofo wàkafikishiibwa ku dimòna, ndi
 mumanyè ne cìvwa mwà kwikala ànu
 Luse lwà Mulùme wa mu Ngalèlè awu.

²⁶⁴ Fwànyikijàayaaku aci ne mudimu wa bwambi leelù ewu.

Mukàji wa ku ciinà cyà mâyi awu, Yèyè
 wàkamwambila mpèkaatù yèndè yònsò,
 Mùvwàye ne balùmè bàtaanu mwinè musangu
 awu.

Kufwidiibwayè luse ku mpèkaatù ne mpèkaatù
 yònsò, ne ditalala dyà ndòndò kutèèkiibwadì
 munda mwèndè;

Kwelayè lubilà ne: “Kanùmonàayi Mulùme wa
 mu Ngalèlè ewu!”

²⁶⁵ Wèwè mukàji, Yèyè's ùdi mwà kwenza cintu cìmwècìmwè
 aci. Yèyè's wàbadì mu mwoyi wèbè amu mu dindà emu. Wèwè
 mulùme, Yèyè's wàbadì mu mwoyi wèbè amu. Kaa, wèwè
 mumpùblikaanò, túsambilè's!

Kaa, ndi munangè Mulùme wa mu Ngalèlè, wa
 mu Ngalèlè awu,

Bwalu Yèyè mmungenzèle byàbûngì be.

Yèyè wámfwidi luse ku mpèkaatù yànyi yònsò,
 wántèèki Nyumà Mwîmpè munda;

Kaa, ndi munangè, ndi munange Mulùme wa
 mu Ngalèlè awu.

²⁶⁶ Kwènàku muswè kuMunanga anyi, pàmwè naanyi,
 mu dindà emu? Kaa, wèwè ngènzàmpèkàatù wa mutù
 mukole, mulalakanyi, mwaba ewu anyi pambèlu paùdi mwà

kusanganyiibwa apu, udikù muswè bwà kwitaba Mukalenge wanyi mu dindà emu anyi? Yèyè ùdi Dìyì, ne Dìyì dyátwàdiibu kùdi. Kwènàku muswè bwà kuMwitaba mu dindà emu anyi? Nudikù mwà kwela ànu byanza muulu anyi kujuukila kuulu, anyi cintu kampànda, ne kusambila, kwamba ne: “Ndi muswè kuMwitaba mpindyewu mene. Mwanèètu, ndi muswè. Ndi muswè mpindyewu mene kuMwitaba.” Swàku ùjuukilè kuulu, yònsò uvwa muswè bwà kumusambidilabò awu, wámbe ne: “Ndi. . .” bwà kumusambidilabò’s wè: “Mémè ndi ngènzàmpèkààtù. Ndi muswè. . .” Nzambi àkubènèshè, mukalenge. Muntu mukwabò anyi? Bantu bònsò sambilaayi mpindyewu, katanci kakesè cyanààna.

Kaa, mu cidiilu cyà nyama aci kùkaadi ntàntà mule, (Mùvwa mmu cimvundù cinène, nudi bamanyè’s, mùvwa bàà pa buloba bàsanganyiibwa.) ne ndi mumanyè ne mmùdibi cyà bushùwà,
 Mwànà mukesè wa mu dibòko wàkalediibwa bwà kusungila bantu ku mpèkaatù wabò.
 PààkaMumònà Yone ku mwelelu wa màyi, Yèyè ùvwa Mwànà wa mùkòòkò awu bwà kashidi, (Umwèumwè Awu leelù ewu.)
 Kaa, Yèyè ùdi Kilistò, Mupoopela pa nkùrusè wa Kàlvaryò awu.

²⁶⁷ Kwènàku muswè kuMunanga leelù ewu ne mwoyi wèbè wònsò, bwà wamònaku mwà kupàtuka mu ngiikàdilù wa buloba wùdi musòmbèlemù ewu anyi? Nwènù bakàji, nwènù balùme, kaa, cinùdi basòmbele kaaba aka díbà dyònsò edi ncinyi? S’bìdi bìleeja ne kùdi cintu kampànda munda mwènù amu, mùdi cintu kampànda ciikàle ne nzala ne nyòòtà. Kanùvwakù bafwànyine kwikala basòmbe kaaba aka munda mwà mèbà àbìdì anyi àsàtù aa to, basòmbe mu nzu bu emu mùshindù ewu; kùdi cintu kampànda. Kanwènaayikù baswè ànu kukùtùma ntémà leelù ewu anyi? Myòdelè yà mvwàdilù ne maalu à mamanya, ne bintu byònsò byà pa buloba, bijiminè mu meeji èbè ànu patùdi twakulangana apa, mwanèètu wa balùme munanga anyi mwanèètu wa bakàji munanga.

Èkèleeziyà yìdi munkaci mwà kudisanga, matungà manène àdi munkaci mwà kukòsoloka, Izàlèlèlà ùdi munkaci mwà kutàbuluka,
 Bimanyinu byàkadyànjlà bapròfetà kwamba abi;
 Matùkù à bàà Bisàmbà byà bendè mmabala ku minu, mùle tètè ne bikwàcishi byà bwòwà;
 “Alùkilaayi, Éyì nwènù bàdi batangàlàke, kùdi bàà kwènu sungasunga.”

Ditùkù dyà bupikudi dikaadi pabwîpi,
 Myoyi yà bantu yidi yamba kwimana bwà
 bwôwà;
 Ujiiwbwâyi ne Nyumà, ikàlaayi ne myëndù yènu
 milongolola kayiyi ne dikàlà ne mitòokesha,
 Bàndulukàayi! Bupikudi bwènù bùkaadi
 pabwîpi.

Bapròfeta bàà mashimi bàdi bàdinga, bàdi
 bàvila Bulelèlà bwà Nzambi,
 Bwà ne Yesù Kilistò ki udi Nzambi wetù.

²⁶⁸ Mpindyewu, aci ncilelèlà. Aci nudi bamanyè, twètù bônso ne,
 ditùkù ditùdi ne mwoyi edi. Kàdi Yèyè wákamba ne:

Nekwikalè Bukênkè lwà ku ibaamulòòlò,
 Njila wa ku Butumbi nenùmupetè bushùwà.

²⁶⁹ Ki ditùkù ditùdi ne mwoyi mpindyewu mene ndyôdi adi.
 Bukênkè nebùteemè ànu lwà ku dilòòlò menemene piikalà
 midimà mwà kukùluka, dība bitaayitaayi, mùtootò wà dilòòlò.

Dība bitaayitaayi ne mùtootò wà dilòòlò,
 Ne paanyimà pàà aci mmîdimà!
 Kakwikadikù dibungama dyà dilayangana to,
 Ndekeelu wa byónso pângiikalà mubànde mu
 màzuwà;

Bwalu byónso pambèlu mmukàlù wà cikondo
 ne cibwàshibwàshì,
 Ne nkwaka yidi mwà kungambula kuya naanyi
 kule,
 Kadi ndi njinga kumòna Mwendeshi wanyì
 mpàla ne mpàla
 Pângiikalà mupite muyè dyàmwàmwà dyà
 mukàlù awu.

Kùngambidìku to, mu nombà yà myadi ne,
 Mwoyi wùdi ànu cilòòtà cyà munda mutupu
 cyanàànà!
 Ne musùukà wùdi mulààle tulù mmufwè,
 Ne bintu kabyèna cidibi bimwèka eci to.

Èyowà, mwoyi ncintu cyà bushùwà! Ne mwoyi
 ncyeyà!
 Ne lukita kí nndekeelu wawù nànsha;
 Bwalu wèwè udi lupwishi, newàlukilè ku
 lupwishi,
 Kacyàkambiibwa bwà musùukà to.

Nsòmbelu yà bantu banène yidi yitùvùlwija
 bônso,
 Kàbidi tudi mwà kuvwija yètù nsòmbelu
 milenga yà dikèma,

Ne, mu kutàpuluka, tudi tushiya paanyimà
 pèètu,
 Bidyacilu byà makàsà pa nsenga yà bikondo;
 Bidyacilu byà makàsà, bìdì pàmwàpa
 mukwàbò,
 Pàdìye wendela mu màzuwà pa mbû wa kàyi
 tuseku wà mwoyi wà pànwapa,
 Mwanèètù udi kàciyi ne ditèkemenà ne mupetè
 njìwù,
 Pààmònàye, wàpetululakù dikima.
 Twikalàayi biimàne kuulu, dîbà adi, ne biikàle
 twenza,
 Ne mwoyi bwà dikòkangana kanà dyònsò;
 Kanwikadi bu ngombe ya tumàmà, misàka to!
 Ikàlà cilòbo mu dikòkangana adi!

²⁷⁰ Nzambì munanga, m'Èèbè Wèwè. Ngàmònu bantu balùmè
 bàbìdì bajuukè kuulu, Taatù. Ndi ndòmba, Nzambì, bwà
 Ùbàngàtèku mpindyewu. Mbaswè kwikala bânà Bèèbè.
 Mbajuukè ku dipanga dyà nsòmbelu udibò nendè, ne mpindyewu
 mbaswè kwikala bavwijìbwe bapyabàpyà, cyàkàbìdì, ne
 dibàtiiza dyà Nyumà Mwímpè pa Dimiinu didì dikùnyìbwe mu
 myoyi yàbò ditùkù edi adi. Nzambì wa Cyendèlèlè, Mufùki
 wa bintu byònsò, Wèwè wàkenza Dìyì Dyèbè awu, ne ndi
 ngiitabuuja ne Wèwè uvwa mumanyè ne bantu aba bàvwa
 mwà kwenza ciinè eci mu dindà emu. Ndi ndòmba, Mukalenge,
 bwà Wèwè kumyamina Dìyì adi màyi, muunya ne bufuku, ne
 kùlekedikù Sàtaanà wùdituula mu byanza Byèbè nànsha. Swàku
 bwà kwikalawu mucì wùdi misangu mikwàbò, mu Mpàladiizò
 wa Nzambì, piikalàye mwalùjìbwe yònsò cyàkàbìdì, bwalu
 Dìyì Dyèbè kadyèna mwà kupangila to, nedìikalèku cyàkàbìdì.
 Bwalu ebu buloba . . .

²⁷¹ Ne kakwàkwikala dishidimuka dyà mùshindù ewu mu
 buloba bùcilwalwà abu to. Kamwàkwikala ní màshinyì à
 tùdyèndelendèlà anyì cintu nànsha cimwe cìtù maalu à mamanya
 menzè to. Kakwàkwikalakù bintu bu nànkù mu buloba
 bùcilwalwà to. Kàdi neciikalè dishidimuka dyà mùshindù
 wà sungasunga wà Nzambì dyàtèèkàYe mu bukòkeshi bwà
 butùmbi abu. Bwalu, mu edi dishidimuka mùdi mabèèdì,
 lufù, tunyinganyinga, nkità, ne lukèngelu. Kàdi mu Bukalenge
 bùcilwalwà abu, kamwèna ní ndufù, ní ntuninganyinga, ní
 mmabèèdì, ní mbukùlākàjì to. Éyì Nzambì, byònsò nebiikalè
 bipyabìpyà muntwamu, mu dishidimuka Dyèbè Wèwè amu.

²⁷² Nzambì, tùshintùlùlèku leelù ewu, ku bukòlè Bwèbè, ku
 divwijulula dyà meeji ètù mapyamàpyà, bwà twètù kushintuluka
 kuumuka ku tuubintu tukesè twà buloba ebu mpindyewu, kuya
 ku Dìyì dyà Nzambì. Nènku swàku tùvwijìbwe bapyabàpyà
 ku bukòlè bushintuludi bwà Nzambì pa Dimiinu didì mu

mwoyi wètù, ditùdi twitabuuja edi, tuya ku bifúkiiwbwà bìdi bìbiiikiidiwbwà ne mbànà bàà balùmè ne bàà bakàji bàà Nzambi. Edi ki dyànyì disambila Kùdì, Taatù, bwà cisàmbà, mu Dîná dyà Yesù. Amen.

273 Mpindyewu bwènù nwènù bàdi pambèlù mu myaba yìdi tudyòmà tùfika, kwònsò kunùdi nusanganyiiwbwa aku, ndi muswè bwà nwàkidilè Kilistò kunùdi aku, bu Musùngidi wenù sungasunga, ne nùùjiibwè ntèntè ne Nyumà Wendè. Mèyi àdi mambiibwe mu dindà emu aa, Amatèku munda mwà mwoyi wèbè. Ne swàku wàkidilèmu Yesù. Nènku ùtangilèku nsòmbelu webè, kàdi ùmonè nsòmbelu wùdi nendè paanyimà. Nènku wàngatè Kataacilu kàà muntu udi wela meeji kàdi mwab'ewu aka. Wèwè mudimòne wenza cintu kampàndà cyà cibèngàngàne ne Dîyi edi, ùmukèku, ne lùkàsà lwònsò. Nwamònu anyi? Bwalu, kùdi Kataacilu kàdi kàkwepulà ku lufù, n'Dîyi dyà Nzambi. Mèyi Èndè àdi Mwoyi, ne Ówò neàkulamè ku lufù.

274 Nwènù bàdi mwab'ewu mu dibàlaasà emu aba, ndi munùlamè kaaba aka ntàntà mule. Ndi nnùsàkidila bwà dilwa dyènù. Ndi ndòmba bwà Nzambi kiiikadikù wàlekela Dimiinuu edi difwa nànsha. Ndi ntèkemena ne kanwèna nwela meeji ne ndi mwimàne kaaba aka bwà kwamba maalu aa ànu bwà kupangakana to. Ndi mbyàmba mbwà dinanga; ne mumanyè ne bu mùndi wa cifwàkà, mùndi mpindyewu emu, ki cikondo cimwèpèlè cindiku mwa kuyiisha bantu. Ne ndi munangè Yesù Kilistò. Yèyè m'Musùngidi wanyi. Nènku vùlukàayi ne, mèmè ewu mvwa mufwànyine kwikala nsanganyiiwbwa pambèlù pààpa mu mùsèèsù bu kabùyi Bwendè Yèyè. Nùnkù ndi nsanganyiiwbwa pambèlù pààpa; baledi bàanyi bònsò, bàà kwètù bònsò, bàvwa bangènzàmpèkààtù. Kàdi Nzambi, ne bukolè Bwendè bushintuludi, ndi mumanyè ne bwòbù mbùdi bumvwijè cifúkiiwbwà cishiilàngàne ebu. Nènku ndi mwà—ndi mwà kukupèèsha mubelu bwà wèwè kubwàngata, bwà wèwè kwikala mwimpè. Ne bwòbù nebùkulamè mu mèmè à lutàtù. Nànsha dyà lufù, ku ciibi, kùyikù ne bwòwà to. “Kakwèna cintu nànsha cimwè cidì mwà kutùpandulula ne dinanga dyà Nzambi, didì mu Kilistò to.” Nzambi àbeneshèku yònsò wa kunùdi, ne ànùpèèshè Mwoyi wà Cyendèlèlè.

275 Mbanganyi kaaba aka bàdi kabàyi ne Dimiinuu dyà Nzambi, dibàtiiza dyà Nyumà Mwimpè? Swàku wèlè ànu cianza muulu cyanààna, wàmbè ne: “Wamvùlukakù, Mwanèètù Branham, bwà ngàpetakù Nyumà Mwimpè awu.” Mpindyewu angàtà Dîyi munda mwà wèbè—munda mwà mwoyi wèbè, ùDitàbùùjè. Mpindyewu wèwè. . . Udi mwà kuditàngila. Ndà ùkaditàngilè mu lumwènù, nènku udi mwà kumòna ne udi penyì. Wamònu's, udi mwà kumanya.

276 Wèwè udi wamba ne: “Èè, mèmè ncivwa mwelè cianza muulu to, bwalu ndi ngiitabuuja ne ndi Nendè.”

277 Ditàngilèbi mu lumwènu, díbà adi neùmone ne nnyumà wa mùshindù kaayi udi ukuseeswisha awu, wamònu's. Meeji maseeswishi's wè! "Kùdi njila udi umwèka mwímpè kùdi muntu, kàdi ndekeelu wendè mwikàle njila wa lufù." Ncyà bushùwà anyi?

Ku nkùrusè kwàkafwilà Musùngidi wanyì,
Kwòkù aku nkúngààkadilà bwà kukezudiibwa
ku mpèkaatù wanyì;
Kaa, kwòkù aku nkwàkalaabiibwà Mashi ku
mwoyi wànyì;
Butùmbì . . .

278 Bwitàayi ànu kwísù cyanààna, katancì kakesè mpindyewu, nènku nùMwimbilaayiwu ànu cyanààna. Twèlàayi ànu byanza muulu cyanààna.

Butùmbì kùdi Dìna Dyèndè! (Dìna Dyèndè dyà
mushinga mukolè!)
Butùmbì kùdi Dìna Dyèndè!
Kwòkù aku nkwàkalaabiibwà Mashi ku mwoyi
wànyì;
Butùmbì kùdi Dyèndè . . .

279 Ndi muswè bwà nwènu beena Kilistò nùlabulanganàayi ku cyanza muntu ne mukwèndè, nwènu bàdi basùngidìibwe abu.

Ndi musùngidìibwe mu mùshindù wà dikèma
ku mpèkaatù,
Yesù mmusòmbèle munda mwanyì ne kalolo
kònsò,
Ku nkùrusè aku nkwàkambwejilàYe;
Butùmbì kùdi Dìna Dyèndè!
Butùmbì kùdi Dìna Dyèndè! (Dìna dyà
mushinga mukolè!)
Butùmbì kùdi Dìna Dyèndè!
Kaa, kwòkù aku nkwakalaabiibwà Mashi ku
mwoyi wànyì;
Butùmbì kùdi Dìna Dyèndè!

280 Mashi àdi ne mùtòlokù wà Mwoyi mu Ówò amu, nudi bamanyè's. Eci mbwà aba bàdi kabàyi baMumanyè:

Kaa, lwàku ku Mpokolo mubanjiike bikolè ne
wa kalolo ewu;
Elà musùükà wèbè wùdi mukwàte ne byà luse
awu ku makàsà à Musùngidi;
Kaa, dyèlèmu leelù ewu, bwà ùpwangajiibwè;
Butùmbì kùdi Dìna Dyèndè!

Kaa, butùmbì kùdi . . .

Twìnyikàayaaku mitù yètù mpindyewu patùdi tuwimba apa.

Butùmbì kùdì Dìna Dyèndè!
 Kwôkù aku nkwàkalaabiibwà Mashi ku mwoyi
 wànyì;
 Butùmbì kùdì Dìna Dyèndè!

²⁸¹ Nudi baMunangè anyì? [Disangisha dìdì dyàmbe ne: “Amen.”—Muf.] Pòlò mmwambè ne: “Nèngìmbè mu Nyumà. Nènkuukwilè mu Nyumà.” Tùwimbaàyi cyàkàbìdì bitùùlùbitùùlù menemene, ne byanza byètù byeela muulu.

²⁸² Nudi bamanyè's, lutàtù lùdì ne, twètù beena Mpenta, tukàadi bajìmìje disànkà dyètù, tukàadi bajìmìje masaluka ètù. Ànu mùvwà Billy Graham mwambè dilòlò adi ne: “Bayiishi abu, ne mitèèlù yà nshìngù yà nkoolò, bàpweka ku Sud kwàka, bàtuuta bikàshì, ne bàtuuta makàsà panshì myaba yònsò bàbànda bàpweka, bàtwa mikùmà, bàvwa ne cintu kampànda cìvwàbo bumvwile disànkà.” Èè, èyowà's, mèmè ndi ne Cintu kampànda cìndì mumvwile disànkà. Nwamònu anyì? Nwamònu anyì? Èyowà. Èyowà, tukàadi bajìmìje disaluka dyètù.

²⁸³ Mpindyewu twèlàayi ànu byanza byètù muulu cyanàana. Kanùtácishi meeji bwà binsònji to, kabyàkunùtapa mpùtà to, nwamònu's. Aci kacìtu cìtápangana mpùtà to. “Èwu udi uya wènda ùmyamina, ne binsònji, kakùyì mpatà to yèyè neàlukilè kàbìdì, mwambùle bimpampa byà blé.” Èyo.

Butùmbì kùdì Dìna Dyèndè! (Dìna dyà
 mushinga mukolè!)
 Butùmbì kùdì Dìna Dyèndè!
 Kwôkù aku nkwàkalaabiibwà Mashi ku mwoyi
 wànyì;
 Butùmbì kùdì Dìna Dyèndè!
 Butùmbì kùdì Dyèndè... (Éyì Nzambi!
 Nzambi àtumbè!)
 Butùmbì kùdì Dìna Dyèndè!

Pwekèshàku Dimiinu, Mukalenge, munda mwà mwoyi!

...kwàkalaabiibwà Mashi ku mwoyi wànyì;
 Butùmbì kùdì Dìna Dyèndè!



BUKOLÈ BWÀ NZAMBÌ BWÀ KUSHINTULULA LUA65-0911

(God's Power To Transform)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambòmbò mu dindà, mu matùkù 11 à ngondo wa citèèmà, cidimu cyà 1965, ku didyà dyà mu dindà bwà Bwobùmwè bwà Buloba bujimà bwà Beena Kantu-ku-byanza bàà Èvànjeeliyò mu Kaabujimà ku Ramada Inn mu Phoenix, Arizona, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org